



يوسف اريس

# المحنة الأرضية

عبدالله

مطبوعات مكتبة المنار

# المحضرة الأرضية

تأليف

يوسف إدريس

الناشر

مكتبة مصر  
٣ شارع كامل صدقي - الفيحاء

دار مصر للطباعة

سعيد جودة السحار وشركاه

## مقدمة

في مثل هذه الأيام أو قبلها بقليل منذ عامين ، كتبت في مجلة « الكاتب » ثلاث مقالات أعطيتها اسما « نحو مسرح مصرى » ، كان الهدف منها زلزلة العقيدة التي كانت لدى نفر من مثقفينا زمنا والتي لا تزال قائمة إلى الآن ، وهي أن المسرح ظاهرة أوروبية محضة كل ما علينا حياله أن نتلقاه عن الإغريق والأوروبيين المعاصرين ونحاول أن ننسج على منواله ، وكل ما نستطيع أن نفعل من أجل تمصيره أن نتناول داخل هذا « الشكل » المسرحى الأوروبى والعالمى موضوعات مصرية ، باعتبار أن الشكل المسرحى الأوروبى هو الشكل العلمى الذى تواضعت وانتهت إليه البشرية ، ولا سبيل إلى تغييره أو تبديله .

ولست أدري لماذا ؟ ولكنى منذ أول وهلة سمعت فيها هذا الافتراض وأنا بكل كياني أعارضة . ليس هناك مانع قطعاً أن يستولى هذا الفرض على عقول بعض كتابنا ونقادنا ، ولكن المشكلة الرئيسية أنى أشك شكاً كثيراً فى صحته . إن هذا الإيمان الذى يعتقد باختلاف العقلية والوجدان البشرى ، حتى ليقول إن هناك عقليات بشرية درامية وعقليات غير درامية ، إيمان قد ينتهى بنا إلى تصديق النظريات النازية عن تميز بعض العقول عن غيرها وتمتعها بسمو أكبر وذكاء أكبر . إني أو من — والعلم معى يؤكد — وحدة العقل البشرى وعالمية إمكانياته . قد تختلف القدرات الفردية ، ولكن هذه القدرات إذا تجمعت على هيئة شعب فإنها تتساوى بحيث لا نستطيع أن نقول إن بعض الشعوب أذكى من بعضها الآخر ، أو أن عقليات بعض الشعوب

أكثر قابلية للتعقيد من الشعوب الأخرى .  
من أجل هذا لا أستطيع أن أصدق أن المسرح هبط على الشعب الإغريقي  
من قمة الأوليمب دون غيره من الشعوب ، باعتبار أن السماء قد اختصته بهذه  
الميزة . إن المسرح خاصية من خصائص كل شعب ، فكما أن لكل شعب لغته  
ولكل شعب رقصه ورسمه وموسيقاه وغناؤه ، فكل شعب لديه ميل غريزي  
إلى المحاكاة ( أى التمثيل ) ، وكل شعب لديه تجمعاته الخاصة التى تتم فيها هذه  
المحاكاة وتوجد في حالة « التمسرح » التى طالما أشرت إليها .  
كل ما فى الأمر أن العبادة الإغريقية اتخذت طقوسها من أفعال الجماعات  
البشرية ، وبالذات من فن المحاكاة وحالات التمسرح ، بمعنى آخر أباحت  
العبادة ، بل وشجعت كافة فنون الإنسان المعروفة آنذاك وأبرزها النحت  
والشعر وتلك الظواهر المسرحية التى كانت بدائية ، ثم بالتطوير على أيدي  
شعراء عظام متخصصين اتخذت شكل الرواية المسرحية ، وشكل حركة  
مسرحية نامية متطورة متجددة وصلت إلى الحد الذى وضعت فيه للمسرح  
تعريفات وقوانين على أيدي أرسطو وغيره ، وتميز من بينها نوعان أساسيان :  
التراجيديا والكوميديا .  
وقد ظل هذا يحدث إلى أن جاءت الديانة المسيحية فأوقفت نمو هذه  
الأنواع من الفنون ، بل حرمتها باعتبارها أشكالا من العبادة الوثنية ، وكما  
حرمت الكنيسة رسم الجسم البشرى عاريا فكذلك اختنق المسرح ، إذ  
كيف فى عالم مسيحي يصور الإنسان باعتباره ضحية للجنة الآلهة ، أو وقد  
حدد مصيره ومنتاه بأحكامها ؟ ولم ينتعش المسرح إلا مع بدايات عصور  
النهضة حين خفت قبضة الكنيسة على الشعوب وعاداتها ، وهكذا عاد  
لمسرح من حيث انتهى عند الإغريق ، وإن كان بمفهومات أخرى ليكون

المسرح الأوربي الذي ظل يتطور إلى يومنا هذا . الحقيقة هي أن ( الكوميديا ديلارتي ) ظهرت في إيطاليا ، والحقيقة أنها لم تنشأ وتظهر . الحقيقة أنها كانت طوال تلك العصور المسيحية قائمة وموجودة ويزاولها الشعب في تجمعاته الصغيرة على أضييق حدود .. يزاوها خلسة فهي إحدى ظواهر التمسرح الغريزية لدى كل شعب من الشعوب . كل ما في الأمر أنها أصبحت ، مع بداية عصر النهضة ، تؤدي في الأسواق العامة والتجمعات الكبيرة ، وإن كان يقال إنها أيضا كانت تؤدي بشبه خلسة ، إذ كان الممثلون يضعون الأقنعة على وجوههم حتى لا يتعرف عليهم أحد .

هذه التي يسمونها الكوميديا ديلارتي هي بنصها وفصها السامر الشعبي المصري . ذلك الشكل البدائي من حالات التمسرح الذي كان قائما وموجودا منذ عصور ضاربة في القدم ، والذي لا يزال موجودا إلى يومنا هذا . كل ما في الأمر أن السامر لم يعن بدراسته أحد ، ولم يجد له « خواجا » يعطيه اسما لاتينيا عويضا ويثبته في كتاب . أليس يضحك ما يذكره بعض من كبار الدارسين لشئون المسرح ، من أن سامرنا الشعبي هذا ليس نابعا منا وإنما نحن قد اقتبسناه من إيطاليا من الكوميديا ديلارتي ؟ أقول يضحك لأنهم يفسرون هذا الانتقال الغريب بقولهم إنه ربما حدث من خلال بعض الفنانين الفرنسيين الذي صاحبوا الحملة الفرنسية على مصر ، الذين قلدهم بعد هذا الفنانون المصريون ، وانتشر هذا الفن بعد ذلك في قرى مصر وانحائها . إذا كان من الممكن أن تنقل الحملة الفرنسية مسرحا ، فلماذا لم تنقل المسرح التقليدي ؟ لماذا لم تنقل مولير وغيره ، وتعتمد على نقل هذه الكوميديا ديلارتي التي لا نصوص مكتوبة لها إذ هي تعتمد على ارتجال الممثل لدوره ؟ .. وكيف يمكن

أن يحدث هذا كله في غيبة الجبرتي ، ذلك الذي لم يفته مما جلبه الفرنسيون إلينا شيء ؟ أليس الأسهل والأعقل والأكثر علمية أن نقول إن فن المحاكاة المرتجل « الكوميديا ديلارتي » ظاهرة مسرحية شعبية بدائية موجودة لدى كل شعب من الشعوب ؟ كانت موجودة لدى الإغريق وظلوا يطورونها إلى أن أوصلوها للكوميديا والتراجيديا ، وكانت موجودة لدى الإيطاليين ولم يكشف عنها الغطاء إلا بزوال تحريم المحاكاة ، وكانت ولا تزال موجودة لدينا في مصر . كل ما في الأمر أن أحدا لم يهتم بالبحث عنها ورصدها وإعطائها اسما !؟

ولأني أو من بهذا فإني أو من أيضا أن المسرح — مثله مثل الموسيقى وكل الفنون — لا يوجد شكل عالمي له ، إنما لا بد أن يتخذ لدى كل شعب من الشعوب شكلا . كل ما في الأمر أن هذا الشكل « العالمي » — أو الذي نظنه عالميا — ليس إلا الشكل الأوروبي المتطور عن الشكل الإغريقي . ولا يمكن أن يصلح هذا الشكل لإيصالنا إلى حالات التمسرح التي نصل إليها في قمتها ، لا بد لنا من البحث الشاق الدائب عن شكلنا المسرحي المستمد من بيئتنا وتاريخ وجداننا وظروفه . قال لي أحد كبار نقادنا مرة : إن هذا الشكل العالمي للمسرح هو التطور في تكتيكية المسرح ، تطور علمي في الشكل لا علاقة له بمضمون العمل المسرحي . تطور في الشكل ممكن أن تضع له أنت ما شئت من مضمون ليصبح مصرية أو كينيا أو فيتناميا ، بالضبط مثله مثل السيمفونية والأوبرا في الموسيقى .

ولكن المشكلة أني أرى أيضا أن السيمفونية والأوبرا ليست أشكالا عالمية ، وإنما هي أشكال خاصة بالموسيقى الأوروبية ولا يمكن أن تصلح للتعبير عن مضمون مصري . ففي الفن لا يوجد شكل ومضمون ، إن

الشكل مضمون فنى والمضمون شكل فنى ، وإذا تطورت موسيقانا فإنها ستصل إلى أشكال أخرى غير السيمفونية والكونسيرت ، إذ هذه الأشكال إنما خلقها المضمون الموسيقى الأوروبى .. أشكال خلقها الوجدان الأوروبى ليخاطب بها نفسه مثلما خلق اللغات الأوربية لتتفاهم بها عقوله ..

ألا ترون معى أن الموضوع جد خطير ، وأنا بنقاشه إنما نضع ألف باء مفهومنا ليس فقط لمسرحنا وإنما لفنوننا عامة ؟

فالفنون تختلف اختلافا جذريا عن العلوم ، باعتبار أن العلم عالمى فى شكله ومضمونه ، فى حين أن الفن على الدوام محلى الموضوع والمضمون . ومن هنا تنشأ عالميته .

إنى أو من إذن أن هناك ظواهر بدائية للمسرح موجودة فى بلادنا أسميها ظواهر بدائية لحالات التمسرح ، تلك التى ينسى فيها كل فرد قائم ذاته ويندمج فى الذات الجمالية الأكبر ، باعتبار أن الخاصية الأولى لأى فن هى جماعيته ، مثل السامر وحفلات الذكر والاحتفالات بالموتى والأراجوز وخيال الظل ، وحتى الجلوس على المقاهى إنه حالة بليدة من حالات التمسرح . وإنه بالبده من هنا ، وبأخذ هذه الظواهر وتطويرها للوصول بها إلى المستوى الفنى والموضوعى الذى وصل إليه المسرح الأوروبى ، ممكن ليس فقط أن ننشئ مسرحا يقف إلى جوار المسرح الأوروبى ، وإنما من الممكن أن نضيف ونسهم به فى إثراء الظاهرة المسرحية فى العالم كله .

يوسف إدريس

## الشخصيات

٤٥ — ٥٠ سنة	طبيب مفتش الصحة	حكيم
٣٨ سنة		محمد الأول
٣٠ سنة		محمد الثاني
٢٩ سنة	أولاد المرحوم الطيب قارون	محمد الثالث
٤٥ سنة	التومرجى والساعى	صفر
شخصية واحدة تقوم بدور :		
٣٠ سنة	زوجة محمد الثالث المزعومة	( أ ) نونو
٣٠ سنة	زوجة محمد الأول	( ب ) نوال
٥٥ سنة	حرم الطيب قارون	( ج ) الأم
٢٠ سنة	طالبة جامعة وطليلة محمد الثالث	( د ) زهرة
٤٠ سنة	زوجة الدكتور حكيم	حنفية
محمد الطيب محمد قارون		
٦٥ سنة	الأب	
١٦ سنة	الجد — على هيئة صبي	محمد قارون
كومبارس		



## الفصل الأول

من المسلم به قطعاً أن لأي مخرج الحق في تفهم نص هذه المسرحية بالطريقة التي يراها أفضل ، ولكنى أؤثر شخصياً — ولجو المسرحية العام وللطريقة التي كتبت بها— أن تقدم على هيئة حلم لا واقعي ، بحيث تتحرك الشخصيات حركة غير واقعية ، وتتحدث بطريقة أيضاً لا تمت إلى الواقع .

وأقترح أن تكون الموسيقى المستعملة في هذه المسرحية عبارة عن أصوات من الطبيعة ، وتذاع في الوقت المناسب .. موسيقى الافتتاح شريط مسجل للأصوات الكثيرة المتنافرة والمنسجمة المتصاعدة من فناء محطة مصر الداخلى .. حين تفتح الستار الأولى نجد ستارة أخرى بيضاء مكتوبا عليها بالخط الكبير .. الدنيا ما فيهاش فقر .. إنما فيها قلة رأى ، والإمضاء « فلاح مصرى عجوز » ممكن أن تظهر إمضاءه ، أو تحتها صورة له كموتيف ..

المنظر بعد ارتفاع الستارة الثانية .. حجرة كبيرة في نسبها شذوذ .. يتصدرها مكتب ضخيم جدا قديم موجود بالناحية اليسرى .. كرسيه على المسند مثل كراسي المقرئين في المآتم .. الحجرة لها بابان أحدهما الرئيسي في الوسط .. نصفه الأعلى من الزجاج المصنفر مكتوب عليه كلمة مفتش الصحة بالمقلوب .. والآخر إلى اليمين .. اللوحة التقليدية لفحص النظر تحتل ركنا بارزا من الحجرة ، حروفها مكرر كل حرف منها كظل ثلاث أو أربع مرات . الحائط الأيسر المجاور لمكتب المفتش تحتله كله لوحة ضخمة على نسق لوحات الدعاية الصحية ، وفيها رجل يمسك بالجوزة يشربها ويحلم حلم

المخدرات الذي لا نهاية له ، والمجسد بطريقة تدل على بدائية الفنان الذي رسم الصورة .. الحلم عبارة عن أن المدمن يتصور نفسه هارون الرشيد جالسا في ساعة هو وحوله الجوارى والراقصات والمغنيات ، وبدلا من صواني الطعام والشراب هناك صينية عليها عدة الكيف وجوزة تقوم بإمساكها جارية تسقى منها هارون الرشيد .. أولاد الحشاش وزوجته عرايا مهلهلين متناثرين حوله ، وزوجته على صدرها طفل رضيع تمد يدها إليه وكأنها تستحلفه .. وهو يضرب يدها مشمئزا .. هناك عسكري ضخيم جدا هائل يمد يده ويمسك الحشاش من ياقة جلبابه استعدادا لأخذه للسجن . في مكان واسع مناسب من الصورة جملة تقول . « احذروا المخدرات فهي تخرب البيوت » .

بجوار المكتب هناك فتحة في الحائط فيها تليفون بحيث يمكن استعماله للحجرتين معا . بقية أثاث الحجرة لا تتعدى كنبه إسطنبولي وكريسيين أسيوطي في حالة يرثى لها . عند فتح الستار نجد جميع الأشخاص الموجودين بالمنظر ثابتين بلا حركة ، وكأن المنظر صورة راين مشهدا حيا .

إلى المكتب يجلس المفتش وهو رجل صغير دقيق بالقياس إلى حجم المكتب ، لا تستطيع أن تحدد له عمرا .. من ملامحه تشع نظرة محبوبة ساحرة كتلك التي صنعت من جحا جحا ، ومن أبي نواس أبا نواس ..

على الناحية اليسرى منحنيا .. مندفعاً ناحية الدكتور وكأنما بهم بمحادثته ، رجل طويل رفيع ذو قتب يلبس بدلة الساعة وفوقها فوطة التمورجي ..

أمام المكتب — وتكاد تملأ الحجرة — مجموعة من الأشخاص من مختلف الأعمار والمهن .. بعضهم سيدات على درجات متفاوتة من الأناقة .. وهم

موجودون بشكل مستمر لا ينقطع إلا في المواقف الحادة .. بحيث يخلو المسرح منهم ويعودون إليه حين تنتهى حدة الموقف .. وبالذات هناك .. أقرب ما يكون إلى المكتب .. أفندى فى الثانية والأربعين من عمره بادهى الأناقة ، وإن كنت تحس أن ملابسه الداخلىة مثلا ليست فى نظافة بدلته ، صلعه خفيف وشاربه دو جلاس شديد السواد مصبوغ .. هادىء .. ناعم مقنع .. بجواره أفندى آخر نامى الشعر مهوشه . لم يخلق منذ شهرين على الأقل ، أو هكذا يدل منظر قفاه ، رفيع الوجه مستطيله ، حليق اللحية والشارب ، على عينه اليمنى آثار كدمة سوداء ، مكتف بقميص الكتاف .. وحين يفك عنه يظل طول الوقت يعبث بحب شباب موهوم فى وجهه ويفتشه وكأنه يتخلص منه بعصبية .

سيدة رغم كل محاولاتها لإضفاء الاحترام والتقدير على نفسها وزينتها وتوالتيتها ، إلا أنها لا تستطيع أن تخفى « المعلمة » الكامنة فيها .. وكأنها عملت لفترة من حياتها صاحبة صلاة أو ربما ناظرة مدرسة باليه أهلى .. حواجبها وعيناها بالذات تنطق بهذا ..

أفندى ثالث فى الباكجراوند وإن كان سيظهر بعد وقت .. هليلهى .. مذعور فى حالة « روشة » مستمرة .. عسكرى رفيع ذو كرش كالبطيخة .. بندقيته رفيعة أيضا وطويلة ويستعملها كمسند لذراعه الذى يستعمله كمسند لرأسه .. يقف أقرب ما يكون بجوار العسكرى الذى فى الصورة ..

التومرجى : ( منحيا ناحيته بلهجة لا دهشة فيها ولا لهفة ) سعادة البية ..

سعادة البية .  
الدكتور : ( منهمكا في إمضاء كومة عالية من شهادات الميلاد ) أيوه

ياصفر ؟  
صفر : مجنون يا سعادة البية ..

الدكتور : ( وهو لا يزال منكبا وبنفس الروتين ) هاته خلينا نخلص .  
صفر : ( معتدلا فقط ومبتعدا قليلا ) أهو يا سعادة البية .

الدكتور : معاه عسكري ؟  
العسكري : ( متفضضا وكأثما يفيق من حلم وليس تحية - منزلا يده ضامما  
البنديقية إليه ) أيوه يافندم ..

الدكتور : م القسم ؟  
العسكري : م القسم يافندم .

الدكتور : ( مستمرا أيضا في التوقيع دون أن يرفع بصره ) فين  
الجواب ؟ ..

العسكري : ( يخرج الخطاب من حزامه العريض .. صفر يتاوله ويضعه  
تحت عين الدكتور .. الدكتور يضع الخطاب أمامه وبجانب  
من عينه يقرأه بينما بالجانب الآخر لا يزال منهمكا في عملية  
التوقيع ) .

الدكتور : وتفضلوا بقبول فائق الاحترام .. طيب ياسيدى ( يتوقف عن  
التوقيع ويفتش بعينه فوق المكتب ويفتح الأدراج ويقلب في  
أوراقها ) فانهى داهية استمارات الأمراض العقلية ؟ مزاجك  
إيه ياصفر إنك تخبها ؟ بتعمل بيها إيه بس كل ماجيب شوية

تلهفهم ، هما ليهم سوق سودا رخرين ؟ ..

صفر : ( مقدا الاستمارات التي كانت أمام المفتش تماما ) أهم  
ياسعادة البيه أهم ..

الدكتور : بقى دى يامجنون استمارات الأمراض العقلية دى ؟ .. دى بتاعة  
المراقبة ياجدع ..

صفر : أمراض عقلية ياسعادة البيه .

الدكتور : دى ؟ .. ( ينظر فيها مليا ) أيوه ياواد صحيح باينها هى .. إنما

انت برضه مزاجك إنك تخيها ( يضع الاستمارات أمامه دون  
أن يرفع بصره أيضا ) الاسم ( يقرأ من خطاب القسم )  
التفضل بتوقيع الكشف الطبى على .. إيه .. محمد الثالث

محمد الطيب محمد قارون .. ده مذبوط الاسم ده ؟ ..

صفر : ( مرددا ) ده مذبوط الاسم ده ..

محمد الأول : ( وهو الأفندى الوجيه الناعم ذو الصلعة والشارب ) أيوه

مذبوط يافندم ..

الدكتور : محمد الثالث .. محمد الطيب .. محمد قارون .. ده اسم

ده ؟ .. ده ولا حسبة برما . دا الواحد كده من غير صدمة ولا

أزمة يجنن .. إنما آه .. دى حرية .. آدى نتيجة إنك تخلى

الناس حرة فى تسمية نفسها .. لازم يطلعوا للمسألة دى

قانون . ما ينفعش كده .. دى فوضى .. عايزين حرية آل ..

وادى نتيجة الحرية .. اسم العيان لواحد إيه ؟ ..

( مرددا كالمبلغ فى صلاة الجمعة ) ..

صفر : اسم العيان لواحد إيه ؟

( المهزلة الأرضية )

محمد الأول : محمد الثالث .

الدكتور : واسم ابوه إيه ؟

صفر : واسم أبوه إيه ؟

محمد الأول : محمد الطيب .

الدكتور : واسم جده إيه .. اسكت انت يا جده انت !

محمد الأول : محمد قارون .

الدكتور : نهايته .. سكنه فين ؟

صفر : سكنه فين ؟

الدكتور : قلنا تسكت .

صفر : حاضر يا سعادة البيه .

الدكتور : سكنه فين ؟

محمد الأول : ١١ شارع طلعت حرب بالسيدة زينب .

الدكتور : هو فيه طلعت حرب في السيدة ؟

محمد الأول : أبوه يابيه فيه . كان الأول اسمه شارع طشتمر وبعدين سموه

شوية أيام كده شارع على فهمى ، وبقاله كام سنة اسمه طلعت

حرب .. ويقولوا انهم لسه حيغروه ..

الدكتور : بيشتغل إيه ؟

محمد الأول : مدرس في كلية الزراعة .

الدكتور : مدرس بوزارة الزراعة .. حتى وزارة الزراعة رخرة عملوا لها

مدارس !

محمد الأول : كلية الزراعة يافندم .. كلية الزراعة .

الدكتور : يادى المصيبة ! مش تقول كده ؟ إنت مش عارف إني باكتب

الاستمارة من صورتين ؟ افضل .. ( ويصحح الاستمارة الأولى ) كلية ، والصورة الثانية . إيه الأعراض اللي عنده ؟  
م . الأول : أعراض جنون خطيرة يابيه .

الدكتور : ( رافعا بصره إلى المجموعة لأول مرة ) ماهي أعراض الجنون كثير . يعمل إيه يعنى ؟ . يتهيج .

محمد الأول : أيوه يتهيج .

الدكتور : بيحاول الاعتداء على الغير ؟

م . الأول : كثير قوى يابيه .. مبهدلنا خالص ؟

الدكتور : هو فين ده ؟ .. فين يا عسكري الجنون اللي انت جايه ؟

العسكري : ( بثقة لا حد لها ) دا هو يافندم . ( مشيرا إلى م . الأول ) .

م . الأول : ( ناظرا إلى العسكري بضيق وتأنيب ) أهو يافندم . ( منتحيا

جانبا كي يبدو محمد الثالث للطبيب في قميص كفافه ) .

الدكتور : انت الجنون ؟

م . الأول : ( ينظر إلى السقف ويتف ذقنه ولا يجيب ) .

الدكتور : هيه .. وغيره .. ( قارئا من الاستمارة ) هل حاول

الانتحار ؟

م . الأول : كثير يافندم .

الدكتور : وكيف .. هل حاول إلقاء نفسه من الشرفة أو إشعال النار في

ملابسه ؟ .. وهل ترتبط محاولاته بالرغبة في الاعتداء على

الغير ؟ ..

م . الأول : مضبوط يافندم ..

الدكتور : هو إيه اللي مضبوط ؟

م . الأول : كل اللى بتقوله سيادتك .. كله حصل .  
الدكتور : ( مسجلا ) نعم .. متى بدأت الأعراض ؟ من إمته بيحصل  
له كده ؟ ..

م . الأول : من حوالى خمس ست اشهر .  
الدكتور : وساكتين من ساعتها ليه ؟  
م . الأول : فاكرينها حاجة حاتزول .. إنما كل ماده كل ما كانت بتكثر  
وتزيد لغاية أول امبارح .  
الدكتور : حصل إيه ؟

م . الأول : اتهيج قوى وضربنى وضرب كل اللى فى البيت ، وجنا بوليس  
النجدة وبقت فضيحة .  
الدكتور : فضيحة إزاي ؟

م . الأول : نزل فينا ضرب وحاول يدبح مراته بالسكينة واتلمت  
الجيران ، وعملنا مذكرة فى القسم ( مخرجاً ورقة من جيبه )  
رقم ٤٢١ احوال سنة ١٩٦٥ م . تحب سيادتك تطلع عليها ؟  
الدكتور : مافيش لزوم ، دانا قدامى لسه خمسين حالة .. حد فى العيلة  
مريض بمرض عقلى ؟

م . الأول : ( مفكراً ) فى العيلة ؟ .. آه .. عمته قبل ماتموت بسنة جاها  
حالة دروشة وسابت البيت وراحت قعدت جنب الحسين ،  
وكنا نجيبها تهرب تانى وتروح هناك وتقول أنا جاني الأمر إني  
ما اتحركش من جنبه ..

الدكتور : ( قارئاً بلهجة روتينية ) هل سبق للمريض أن أصيب بمرض  
عقلى .. هل تم حجزه بإحدى المصحات ؟



م . الأول : دى أول مرة يافندم ..  
الدكتور : ( ملقيا نظرة على الاستمارة ) آه لا مؤاخذه .. نسينا السن ..  
سنة كام سنة ؟

م . الأول : هو من مواليد ١٩٣٧ يعنى ٢٩ سنة .  
الدكتور : الحمد لله .. أبوخ حاجة حكاية الصورتين دى .. آخر بند  
بقى .. اسم قريب المريض الذى أدلى بالمعلومات عنه ونوع  
قربته .. إنت قريبة ؟

م . الأول : أيوه يافندم .  
الدكتور : تقرب له إيه ؟  
م . الأول : أخوه يافندم .  
الدكتور : اسمك إيه ؟

م . الأول : محمد الأول محمد الطيب محمد قارون يافندم .  
الدكتور : ( واضعا القلم ) استنى بقى استنى .. إيه حكاية أساميكو  
دى ؟ .. يعنى لازم تقول لغاية جدك الخامس ؟

م . الأول : أبدا يافندم ده كله اسمى لغاية الجد الأول بس . اخنا تلات  
اخوات ، والتلاته اسمنا محمد . أنا الكبير اسمى محمد الأول ،  
والوسطانى اسمه محمد الثانى ، وده الصغير اسمه محمد الثالث .

الدكتور : طب وإيه حكاية محمد الطيب محمد قارون ؟  
م . الأول : برضه نفس الحكاية- مع أبويا وجدى .. أبويا اسمه محمد  
الطيب ، وأخوه الثانى كان اسمه محمد الطاهر ، والثالث محمد  
الطالب ، والرابع محمد الطانب ، ولينا جدين أخين محمد  
قارون اللى عمل فرع عيلتنا ، ومحمد هارون اللى عمل الفرع

بتاع اسكندرية ..

الدكتور : إزاي على مبارك باشا فاتته الحكاية دي ، ماسبتهاش ليه في  
كتابة الخطط والآثار ؟ .. ملوش حق صحيح . وحضرتك  
بتشتغل إيه بقى يا أستاذ أول ؟

م . الأول : المدير العام المساعد لشركة مطبوتكس للساعات .

الدكتور : شركة إيه لإيه ؟

م . الأول : مطبوتكس للساعات والمنبهات والآلات الدقيقة .. دي  
شركة كبيرة قوى يافندم .. أول شركة عربية تعمل ساعات  
مصرية ميه في الميه .

الدكتور : بتعملوها هنا ؟ .. مش معقول .

م . الأول : أمال يافندم .

الدكتور : يعنى كله بتعملوه هنا ؟ .. التروس العقارب والزمالك وكله .

م . الأول : لا يافندم ، احنا بنعمل زى مصانع سويسرا بالضبط .. هناك

المصانع بتاع الماركات الكبيرة زى زينيت وجوفيال وأرداث

ما بتصنعش الحاجات دي .. الحاجات دي بتعملها العيالات

السويسرية كل عيله متخصصة في ترس والامسمار ،

وبتوارث الصنعة أبا عن جد فالشركات بتشتري منهم

الحاجات دي وبعدين بتركبها على بعض وتديلها اسم وتعمل

ها المينا — وتبقى من بره تل والا تفانوس ومن جوه كل

الساعات واحدة .. احنا برضه عملنا كده ، بنجيبها قطع

غيار من بره وعندنا ساعاتية بيشتغلوا عمال في المصنع  
بيجمعوها واتفضل سيادتك ( يخرج من جيبه ساعة جيب

جديدة في علبة ) ما شفتش أول ساعة مصرية ميه في الميه ؟  
( ويناوها للدكتور ) ..

الدكتور : ( متفحصا الساعة ) ماركة مينا .. أظن عمر ما الملك مينا  
تصور النهاية دي .. وازاي بتقولوا عليها أمال مصرية ميه في  
المية ..

م . الأول : ما هو مصنع الساعات يعمل المينا بس .. فاحنا بنعمل المينا هنا  
فتبقى ميه الميه مصرية ! شايف سيادتك المينا أول مينا في  
التاريخ حروفها بالعربي ... مينة ساعة مينا ( الدكتور يحاول  
أن يعيد له الساعة ) والله لو تتكرم علينا يافندم وتقبلها  
سيادتك هدية م الشركة ، إحنا بنوزع هدايا عشان  
البروياجندا .. أنا دايمًا شاييل في جيبي ساعتين تلاتة احتياطي  
عشان الناس الطيبين اللي زى سيادتك كده ..

الدكتور : لالالا .. أنا ما قبلش حاجات زى دي .. مادام لك شغلة  
هنا ما يصحش أبدا أقبل منك حاجة ..

م . الأول : دي خدمة للشركة يافندم .. دا سيادتك تبقى بتخدمنا لو  
تقبلها عشان تجربها وتدينا رأيك فيها .. دا الشركة تبقى مدينة  
لسيادتك مش لا سمح الله بنديك حاجة .. ادي سياسة ثابتة  
للشركة يافندم ..

الدكتور : ( مادا يده بالساعة ) لالالا .. معلش .. أصلها محرجة  
شوية .. اتفضل ( حين لا يأخذها م . الأول .. يضعها  
الطبيب على المكتب قريبا منه ) .. قلنا إيه يا سيدى ؟  
( مراجعة الاستمارة ) لاه .. دا احنا خلصنا خلاص .. ناقص

الإمضاء .. وادى إمضاء هنا .. وإمضاء مع النسخة الثانية  
والتاريخ . خد يا عسكري الورق ده وديه القسم .

م . الأول : حانرجع القسم تانى يابيه ؟

الدكتور : أيوه عشان من هناك حايستدعوا العربية تاخده .

م . الأول : متشكرين قوى يا فندم .. متشكرين .

الدكتور : والللا استنى ثانية .. ثانية واحدة بس .. هات الورق ..

( يتناول الورق من العسكري ) نكتب كلمة والللا حاجة في

خانة الملحوظات .

م . الأول : يا فندم أنا سايب شغلى والله ، والنهارده أول يوم لتشغيل قسم

الساعات الحریمی ..

الدكتور : معلش .. كلها ثانية .. أنا مستعجل أكثر منك ، وانت

ممکن تاخده على طول وتوديه المستشفى .. الورق جاهز

وممضى وكل حاجه .. بس برضه انت عارف .. استكمالا

للكليات .. كلها وحياتك شكلیات ..

م . الأول : فيه أسئلة ثانية ؟

الدكتور : مش لك ماتخافش .. له هو .. نوع م الكشف ( متجها لمحمد

الثالث ) .. مالك يا بنى ؟

م . الثالث : ( لا يرد ) .

الدكتور : طبعا لك حق ماتردش .. إيه دا يا صفر الزفت ؟ . أنا مش منبه

عليك مليون مرة العيان مايدخلش عندي بقميص الكتاف ده

أبدا . ده زى الكلبشات وعمر ما المتهم يروح قدام القاضى

وفى إيديه الحديد .. فكه حالا ..

صفر : على عيني حاضر يا سعادة البية ..

م . الثالث : ( وصفر يمد يده لfolk القميص ) بتفكه ليه ؟ عشان إيه بتفكه ؟ دا أنا مستريح قوى فيه .

الدكتور : مستريح فيه ازاي ؟ ..

م . الثالث : مريح إيدي قوى .. ده الإ يدين دي مشكلة كبيرة . لما الواحد يقف يعمل بهم إيه ؟ .. أحطهم في جيبي ..؟ .. أتضايق .. في وسطى كده ؟ ( يضع يديه في وسطه ) .. أتعب . أعلقهم كده ؟ ( يضع يديه فوق رقبتة ) درعاتي تخدل .. القميص ده حل لي المشكلة بطريقة جميلة جدا .. ده انت لو تجربه مره ماتسلهش .. دا لازم كل الناس تلبسه .. ح يريحك من إيديك ويريح الناس منهم .. وانت راخر تستريح من إيدين الناس .. لا خناق ولا ضرب وإلا قرص في الأتوييس ، ولا أحط صوابعي في عنيك ، ولا كلام منده .. يعلم الناس الأدب .. يخليهم كلهم بنى آدمين راقين ما يستعملوش إلا لسانهم بس .. وحتى اللسان مالوش داعي ، ياريت يعملولو قميص .. يستعملوا مخهم بس .. وبيتبألى برضه إن المخ مالوش داعي .. لو راخر يلقوله قميص ..

الدكتور : يا أهلا وسهلا .. والله زمان .. بقى لنا مدة مافيش عيائين ..

كله كلام عادى كده يزهق .. أيوه ياسيدى أيوه .. هيه ؟ .. إيه بقى احكايتك ياسيدى ؟ ..

م . الثالث : مضبوط مضبوط .. ( سألنا ) ..

الدكتور : مضبوطكس .

م . الثالث : مضبوط ..

الدكتور : هو إيه اللي مضبوط ؟

م . الثالث : كل اللي قالوه مضبوط .. أنا مجنون .. تمام ( يضحك ضحكة

وكأنه يمثل بها أنه مجنون فتخرج عصبية مفتعلة ) ها ها ها

ها .. مجنون .. مضبوط ..

الدكتور : لا .. دا انت باينك عاقل قوى .. هو فيه مجنون بيقول على

نفسه انه مجنون ؟ .. دا .. يفتكر كل الناس مجانين إلا هو ..

م . الثالث : مضبوط مضبوط .. كلكم مجانين .. بجد والله العظيم كلكم

مجانين .. كلكم كده .. ده ( لمحمد الأول ) مجنون .. وده

( لصفر ) مجنون ..

صفر : ( بذعر ) أنا ؟

م . الثالث : وده ( للعسكري ) مجنون .. دوه ( للحشاش في الصورة )

مجنون . ودول ( مشيرا إلى الكومبارس ) مجانين . وانت

( مشيرا للدكتور ) انت نفسك مجنون .. دى أوضه دى ؟!

دى أوضه مجانين ، دى ضورة دى ؟ حد يحطها في أوضته

ويص لها كل يوم ؟ ده فن ده ؟ .. دا عالم ده ؟ .. دى دنيا

دى ؟ .. كلكم مجانين .

الدكتور : ( متبها للوقت ) لاه .. دالو استمرينا كده مش ح نخلص .

( ثم لميم . الثالث ) أنا قصدى اسألك .. انت تعبان من

حاجة ..؟ حاسس بحاجة ؟

م . الثالث : أنا تعبان قوى .. أنا تعبان جدا ( والتأثر يصل به إلى حد البكاء ) أنا أتعب واحد في الدنيا .

الدكتور : تعبان من إيه ؟ يبجى لك تهيئات ؟

م . الثالث : آه !

الدكتور : بتسمع أصوات ؟

م . الثالث : آه ..

الدكتور : أصوات بتكلمك يعنى ؟

م . الثالث : يا ريتها بتكلمنى دى بتشتمنى . طول النهار واحد بصوت

رفيع كده يقول لى يا تافه يا محمد يا تالت .. يا خايب يا محمد

يا تالت .. يا فاشل .. يا مثقف .. يا بتاع الدكتوراه .. يا ابو

رسالة .. يا بوررياله ، طظ فيك . وست كده صوتها اخنف

قاعدة تقولى يا ضعيف . يا جبان . يا خواف .. يا نتهازى .

يا ابو عين فى الجنة وعين فى النار .. يا عديم الاشتراكية ، يا

خاين المسئولية . ح نزمرك كدهه ( ويزمر ) ونطبلك

كدهه ( ويطبل ) .

الدكتور : مش قصدى كده . قصدى أصوات بتحرضك على حد ؟

على حاجة ؟

م . الثالث : بالضبط كده ، بتحرضنى . طول النهار بتحرضنى .. دلوقتى

حالا بتحرضنى .

الدكتور : ( بشغف وكأنه بسبيله إلى اكتشاف شيء مهم ) بتحرضك

على إيه ؟  
م . الثالث : بتحرضنى على الناس وعلى نفسى . بتحرضنى أحتقر الناس  
وأحتقر نفسى .. أتف عليهم ، أقرف منهم .. بتحرضنى إن  
مافيش فايدة إنى لازم استسلم . إن المقاومة جنان ..  
بتحرضنى إنى اتلهى واعيى زى التنبل آكل واشرب وانام .  
بتسدها خالص فى وشى .. وافضل ماشى ماشى لآخر  
الدنيا .. إنى أنجذب زى بتوع الحسين وامسك لى سبحة  
ومبخرة . أحيانا بتحرضنى إنى أرتكب جريمة أخطر .

الدكتور : ( بشغف أزيد ) زى إيه ؟  
م . الثالث : إنى أتجوز .  
الدكتور : إنما انت واعى بحالتك دى ؟ يعنى حاسس بعيالك ؟ شايف  
نفسك ؟

م . الثالث : ما هى المصيبة إنى شايف نفسى ، المصيبة إنى واعى ، المصيبة  
إنى مفتوح . لو اغمض ، لو انام ، لو اتخدر ، لو أعمى ، لو  
اتنيل واعيى زى الناس ما هى عايشة ، لو أموت واخلص !  
الدكتور : هيه .. ومن إمتى بقى وانت بالحالة دى ؟

م . الثالث : من زمان قوى .  
الدكتور : سنة سنتين ؟

م . الثالث : لالا .. سنة إيه ؟ .. أنا بيتيهألى إنى من ساعة ما وعيت وأنا  
كده ، أنا مش فاكر نفسى أبدا إلا كده . يمكن من يوم ما



اتولدت وانا كده .  
الدكتور : أرجوك . ساعدنى شوية . خليك دقيق فى إجابتك بلاش الحاجات المطاظة دى .. فيه إيه تانى تاعبك ؟ ..

م . الثالث : حاجات كتير تعبانى .

الدكتور : زى إيه ؟

م . الثالث : الشمس .

الدكتور : قصدك الحر يعنى ؟ .. فعلا الأيام دى الحر فظيع .

م . الثالث : قصدى الشمس .. الشمس نفسها .

الدكتور : والشمس نفسها تعباك فى إيه ؟

م . الثالث : عشان بتطلع كل يوم ..

الدكتور : وده يضايقك فى إيه ؟

م . الثالث : دى مضيقانى قوى .. دانا متغاض لما ح اطق .. دى جنتتى .

دى هى السبب أكيد ..

الدكتور : ليه ؟

م . الثالث : علشان بتطلع كل يوم .. كل يوم الصبح بالضبط تطلع .

الدنيا تبقى ساكنة وجميلة واقول يارب بلاش النهاردة ..

يارب أجلها يوم .. يارب عشان خاطرى ، وابص ألقياها فى

الميعاد بالضبط راحت طالعة ، وهى تطلع من هنا وخذ عندك

بقى .. الناس تصحى والدوشة تبتدى ، والخلافات

والخناقات ، والكذب يشتغل والسرقة والظلم والبوليس

والنيابة والمحاكم . وتفتح السجون ، والشوارع تملئ ،  
والجري ، جرى ، كله يجري ورا بعض ، يجري قدام بعض ،  
يجروا والى ما يطلشى يشنكل والجائزة إيه ؟ لقمة ، وعشانها  
يتخربش ويتجرح وهدومه تقطع ، ومن كتر الغيظ تحمر  
الدنيا ، وفي أكثر حته سال الدم فيها الشمس تغيب .. وتانى  
يوم تطلع . ليه ؟ ما تعرفش . النهارده بالذات تقدر تقول لى  
الشمس طلعت ليه ؟ أرجوك أنا باتكلم جد . جاوبنى ،  
طلعت ليه النهارده .؟

الدكتور : ( محمد الأول ) لاه .. داتعبان قوى .. ( ثم محمد الثالث )  
هيه ؟ .. يمكن طلعت عشان حضرتك تشرفنا .. وإيه تانى يا  
سيدى اللى تاعبك ؟

م . الثالث : النمل .

الدكتور : مضايقتك ؟

م . الثالث : ده مجنى .. البتاع الاسود الصغير ده اللى دايم ماشى ماشى  
عمره ما يقف .. عمرك نملة واقفة ابدا .. حتى فى المية  
بتمشى .. وانت ماسكها بتمشى .. بتنزل م البيضة ماشية  
وعمرها ما بتموت .. أنا عمرى ما شفت نملة ميتة موتة ربها  
أبدا .

الدكتور : وإيه اللى مضايقتك فى كده ؟

م . الثالث : بقول لك مجنى .. باخاف منه . كل اما بشوف شوية نمل  
ماشين كده أموت م الرعب .

الدكتور : أما مالکش حق .. الواحد جازي يخاف من الكلب .. م  
الأسد .. م التعبان ، إنما النمل اللي قد كده اللي الواحد برجله  
يموت ألف ، حد يخاف منه ؟

م . الثالث : أنا .

الدكتور : له ؟ ح يعضك ؟

م . الثالث : لا .

الدكتور : أما بتخاف منه له ؟

م . الثالث : بخاف اتقلب نملة . كل اما اشوف نمل وابطص له شوية ألاقى

شعري وقف من الخوف ، ويتيهألى إني لو بصيت له كان شوية

ح اتقلب نملة .. تصور بقى المصيبة لما الواحد مخه ده يطير ،

وإحساسه ينتهى ، وعواطفه تنمحي ، وما يقاش فيه إلا إيندين

ورجلين ، ويبقى كل شغلته إنه يمشى ويفضل ماشى ، طول

الصيف يخزن أكل للشتا ، وطول الشتا يفحر ويخزن أكل

ويفحر .. ويخزن ويفحر ويخزن ويفحر .

الدكتور : ( محمد الأول ) لاه .. دانا كنت فاكرها سهلة ( ثم محمد

الثالث ) . بس خوفك ده فى غير محله . إنت عمرك سمعت

عن حد اتقلب نملة ؟ .. عمرها حصلت دى ؟

م . الثالث : حصلت وحصلت وحصلت . أما أنا مرعوب له ؟ ما

بتقراش جرايد سيادتك ؟ دا كل يوم أخبار عن ناس اتقلبوا

نمل . امبارح واحد صاحبي اتقلب نملة .

الدكتور : اتقلب نملة ؟

م . الثالث : الحقيقة نملة كبيرة .. حرامى نمل . أصله تخين شوية ..

الدكتور : وإيه غير الشمس والنمل ؟ مراتك مضايقاك ؟

م . الثالث : لحسن الحظ أنا مش متجوز .

الدكتور : مش متجوز ؟ أمال يا أستاذ بتقول إنه رفع السكينة على مراته

ازاي وحاول يقتلها ؟

م . الأول : زى ما بقول لسيادتكم تمام ( ثم محمد الثالث ) هي حصلت

إنك تنسى إنك متجوز يا محمد .

م . الثالث : متجوز ؟ آه . لمؤاخذة .. معلىش .. بردون .. أيوه صحيح

أنا متجوز .. أصلها حاجة يستحسن إن الواحد ينساها .

الدكتور : ( بشك خفيف ) هو متجوز والامش متجوز ؟

م . الأول : متجوز يافندم .. ورحمة أبويا متجوز .. يانهار ايض !

الدكتور : إنت متجوز يا محمد ؟

م . الثالث : متجوز متجوز . كل اللي بيقوله الأول مضبوط . هو ما

يكذبش أبدا .

الدكتور : أمال فين مراته ؟ إزاي ما تجيش معاه وهو في حالة زى كده ؟

تيجى إمتى أمال ؟

م . الأول : موجودة يافندم .. موجودة . يانونو .. دى كانت هنا

دلوقت وراحت فين . يانونو .

( صوت صاحبه مخفية بين الكورس ) أيوه يا أول .. أنا أهه

( تتحرك لتصبح بجوارهما ) أنا اهو .

الدكتور : إنتى مراته ؟

نونو : أيوه يا دكتور .

الدكتور : دى مراتك يا ثالث ؟

- م . الأول : أيوه يافندم .  
الدكتور : من فضلك مادام بسأله هو ، يبقى هو اللي يجاوب .. مراتك  
دى يا ثالث ؟  
م . الثالث : ( وهو يعاينها ) مضبوط .. هي تمام مضبوط .  
الدكتور : ( لميم الثالث ) اسمها إيه ؟  
م . الثالث : زى ما قال .. نونو .  
الدكتور : نونو ده اسم الدلع . اسمها الحقيقي إيه ؟  
م . الثالث : برضه نونو .  
الدكتور : اللي فى شهادة الميلاد ؟  
م . الثالث : نونو .  
الدكتور : ( محمد الأول ) صحيح ؟  
م . الأول : أى . أيوه .. أيوه صحيح يافندم .  
الدكتور : تقرب لك إيه بقى ؟ ( لميم الثالث ) .  
م . الثالث : هي الحقيقة ما تقربليش أنا .. هي تقرب له هو .. ( مشيرا  
للأول ) .  
نونو : أقرب له هو إزاي ؟ أنا مش مراتك انت يا حبيبي ؟  
م . الثالث : وفيها إيه ؟ ما انتى مراتى وتقربيله .  
الدكتور : ( لنونو ) إنتى مراته ؟؟  
نونو : مراته طبعا يا دكتور .. أدى اللي كان ناقص .  
الدكتور : وانتى برضه رأيك إنه مجنون ؟  
نونو : ( تنخرط فجأة فى البكاء ) .  
الدكتور : ارجوكى .. جاوبيني الأول .

( المهزلة الأرضية )

نونو : مش قادرة يا دكتور .. دى مش عشرة يوم واللا اتنين .. دانا

باحبه .

الدكتور : برضه ما جاو بتيش .. إنتى رأيك إنه مجنون ؟

نونو : ورأى قيمته إيه ؟

الدكتور : رأيك أهم من تشخيصى .

نونو : أنا رأى إنه اتغير خالص يا دكتور . مش هو ده اللى اتجوزته .

الدكتور : كان إيه وبقى إيه ؟

نونو : كان ذوق وحنين . وبيحبنى ..

الدكتور : ودلوقتى ..

نونو : مايطقنيش .

الدكتور : بس كده ؟

نونو : ودى شوية ؟

الدكتور : شوية قوى .. هو لو كل واحد ماطاقشى امراته نوديه الخانكة

كنا زمانا كلنا بقينا هناك .. اتغير ازاي ؟

نونو : بقى يضربنى ويهينى ، وكلمة والتانية ويعملها حريقة ويخش

الحمام ويقفل على روحه يقعد يكلم نفسه .

الدكتور : ( محمد الثالث ) بتكلم نفسك ؟

م . الثالث : أعمل إيه ؟ ما بلاقيش حد يفهمنى أضطر اركب الصعب بقى

واكلم نفسى .

م . الثالث : ( لنونو ) وكان صحيح عايز يدبحك ؟

نونو : ( تنخرط باكية ) .

الدكتور : حصل ؟

( غم )

- نونو : حصل يا دكتور .
- الدكتور : حصل يا تالت ؟
- م . الثالث : حصل ..
- الدكتور : وحد يدبح مراته يا تالت ؟
- م . الثالث : أعمل ايه .. بيجرضوني .
- الدكتور : الأصوات ؟
- م . الثالث : الأفلام يا دكتور .. ما سمعتش على فيلم كيف تقتل زوجتك ؟ ..
- الدكتور : لالا .. انت راجل مثقف ومتعلم وذكى فازاى ده يحصل ؟
- م . الثالث : عشان ذكى ومثقف ومتعلم ..
- الدكتور : عشان كده تدبجها ؟
- م . الثالث : لا .. عشان كده أنا حساس وبالتالي معقد ..
- الدكتور : وإيه علاقة عقدك بالدبح .
- م . الثالث : مانا مصاب بعقدة الفرخة .
- الدكتور : عقدة الفرخة ؟
- م . الثالث : أيوه .. كنت وانا صغير أحب دائما أشوف ماما وهى بتدبح الفرخة .
- الدكتور : وده يعقدك فى إيه ؟
- م . الثالث : كان بيبان عليها السعادة بشكل .. ياسلام وهى مكتفة الفرخة الغليانة ومحمد الأول ده ماسك لها راسها وهى بتحز بالسكينة على رقبتها ، والدم بيتفجر ويضرب فى الحيطان ويحصل السقف ويفرق إيديها وهدومها .. سعادة حقيقية لدرجة إنها

كل اما كانت تتضايق — إنشا الله يكون في نص الليل — تقوم  
على السطح تجيب فرخة .. وتدبجها وترجع المطبخ مبسوطة  
انبساط ولا اللى خدله اتنين وسكي ..

الدكتور : بس دي مش فرخة دي مراتك .

م . الثالث : سوء حظ بقى .. الفراخ غالية دلوقتي وفيهم أزمة .

الدكتور : بتهزر يا أستاذ تالت ؟ مش مكسوف من نفسك .. واحد

زيك عنده ماجستير ..

م . الثالث : دكتوراه وحياتك مع مرتبة الشرف الأولى ..

الدكتور : يا دكتور محمد الثالث .. إيه بقى هدفك من ادعاء الجنون

ده ؟ .. انت متهم في حاجة وعازب تتنصل منها ؟

م . الثالث : أنا ما بدعش يا دكتور .. أنا أفهم مرض أسافر به بره زى اللى

يسافروا .. إنما حد يدعى مرض يوديه مستشفى أمراض

عقلية في مصر هنا ؟

الدكتور : ماهو دا اللى محيرني .. نهايته .. أهو هناك ح يحطوك تحت

الملاحظة ، وخلال ثلاث تشهر أكيد كل شىء حيبان ..

سؤال أخير بقى .. النهارده إيه يا دكتور محمد ؟

م . الثالث : أهى دي اللى ما اعرفهاش .. أنا عمري ما عرفت النهارده إيه

إلا من النتيجة ..

الدكتور : النهارده السبت .

صفر : ( منحيا على الدكتور هامسا ) لا مؤاخذه ياسعادة البيه

الدكتور : كان امبارح .

الدكتور : انت مش شايف النتيجة يا صفر ؟



صفر : دى ورقة امبارح ياسعادة البيه ( يذهب إلى النتيجة المعلقة في

الحائط وينترع الورقة ويكورها في يده )

الدكتور : ( بارتباك ) قصدى امبارح إذا كان امبارح السبت .. تبقى

النهارده إيه ياسيد ثالث ؟

م . الثالث : مش للدرجة دى يا دكتور .. أنا عيان صحيح إنما مش قوى

كده ..

الدكتور : معلىش دا روتين كده .. قلنا إذا كان امبارح السبت يبقى

النهارده إيه ؟

م . الثالث : السبت .

الدكتور : ( بزفرة ) هيه .. طب وبكره ؟

م . الثالث : السبت برضه ..

الدكتور : أنا بسألك جد .. امبارح كان السبت النهارده يبقى إيه ؟

م . الثالث : وأنا يا جاوبك جد يا دكتور .. أنا رأيى كده .. الرأى العلمى

حتى .. الأصل فى الزمن مش إنه مقياس للتغير .. البعد الرابع

بتاع أنشتاين .. طول ما مفيش تغير يبقى مفيش زمن .. فتقدر

تقوللى سيادتك إيه اللي اتغير فى الدنيا من امبارح للنهارده ؟

الدكتور : على الأقل انت .. امبارح كنت عاقل .. النهارده محل شك .

م . الثالث : يبقى زمنى أنا هو اللي اتغير .. إنما زمن الواقع ماجرلوش

حاجة .. يبقى النهارده السبت برضه .

الدكتور : أمال الحد بييجى إمتى ؟

م . الثالث : لما نحس بأن النهارده اختلف عن امبارح .. لما نحس أن الحياة

اتحركت بينا خطوة . لما نشوف ان ظلم النهارده أقل من ظلم

امبارح ، وعدالة النهارده أكثر من عدالة امبارح .. لما نحس  
اننا طلعلنا درجة أو عقلنا همسة أو اترقينا سنتي ، يبجي الحد .

الدكتور : لا برافو فلسفة مش بطالة . بس نفسي أعرف حكايتك إيه ؟  
م . الثالث : أنا مستنى الحد .. ياللا بينا يا أول يا اخويا .

الدكتور : استنى بس استنى .. هي إيه ؟ أنا اللي بقرر هنا .

م . الثالث : حاضر استنيت .

الدكتور : ( يحدجه مليا وطويلا دون أن ينطق ، فيبدأ محمد الثالث

يضطرب ويأخذ اضطرابه شكل تحركات عصبية وجذب

لشعرات ذقنه والدكتور يبدو كما لو أنه يتخذ القرار

الفاصل ) على العموم ( ثم وكأنه يؤكد لنفسه مرة أخرى )

الفرصة هناك أكثر . وده مش حكم بالإعدام .

( فجأة نغمة موسيقية مرحة « تويست » ورقص وغناء

أمريكي متشنج ) فين العسكري ؟

العسكري : أفندم .

الدكتور : خد الورق وعلى القسم .

م . الأول : ألف ألف شكر يافندم . آسفين للإزعاج . ألف ألف شكر .

الدكتور : استنى من فضلك . خد دى معاك ( مادا يده بالساعة ) .

م . الأول : يافندم أنا قلت لسيادتك .

الدكتور : هي كلمة .. خدها معاك يعنى خدها معاك .

م . الأول : أمرك يافندم . أمرك ( يتناول الساعة ويمسكها ، وباليه

الأخرى يتابط ذراع محمد الثالث ) ياللا بينا ( يبدأ الموكب

يتجه إلى الباب ) .

( من الخارج يأتي صراخ رجل ذي صوت رفيع مرتعش ) .

الصوت : استنى عندك يا محمد يا أول .. اوعى تتحرك .. ( ارتباك عام . الدكتور يرفع وجهه متسائلا .. الجميع تتابعهم حركة تحفز ودهشة . يندفع إلى الداخل أو من بين الواقفين أفندي رغم شبابه وملامحه الحسنة إلا أنه مبهدل في لبسه العسكري المحمل بالكوردونات ، ذقنه غير مخلوقة ، شعره ليس مسرحيا كما يجب ) .

م . الثاني : ( بعد أن يكون قد أصبح داخل دائرة الاهتمام الكائنة أمام مكتب الدكتور ) .

استنى عندك اوعى تتحرك ، ولا خطوة .

الدكتور : إيه ده ؟ مالك يا أخينا ؟ فيه إيه ؟

م . الثاني : فيه جريمة يا دكتور . فيه جناية . الحمد لله ياما انت كريم يارب على آخر لحظة ربنا بعتنى عشان اوقفها . لو اتأخرت دقيقة كان زمان السهم نفذ وكل شىء انتهى وراح ، والترتيب اللي عمله المجرم ده ( مشير الميم الأول ) نجح .

م . الأول : الله يسامحك . روح يا شيخ الله يسامحك .. ياللا بينا .. ( متباطأ مرة أخرى ذراع م . الثالث ودافعا العسكري ليمرق أمامه ) .

م . الثاني : يا دكتور أنا في عرضك وقفه . دى جناية كبيرة يا دكتور . أنا ح اقول لسيادتك على كل حاجه دلوقتي . دى مؤامرة ما يدبرهاش الا إبليس ، أرجوك توقفه .

( م . الأول يتحرك غير ملق بالا ومعه م . الثالث

( والعسكري ) . ( لميم الثاني ) : ( ليم الثاني ) : ( ليم الثاني ) : ( ليم الثاني ) : ( ليم الثاني ) :  
الدكتور : ( ليم الثاني ) : ( ليم الثاني ) : ( ليم الثاني ) : ( ليم الثاني ) : ( ليم الثاني ) :  
مؤامرة إيه ؟ ( ليم الثاني ) : ( ليم الثاني ) : ( ليم الثاني ) : ( ليم الثاني ) : ( ليم الثاني ) :

م . الثاني : يروحو ازاى يا دكتور ؟ اقف عندك يا محمد يا أول . وقفه يا

دكتور . اقف يا محمد . انتو حرين بقى ( باضطراب شديد

يمد يده المرتجفة داخل صدره ويخرج طنجة ضخمة في حجم

نصف البندقية من نوع قديم بطل استعماله ويصوبها ناحية

م . الأول وهو يرتعش ارتعاشا شديدا والعرق الغزير

يتصبب منه ) والله والله لو اتحركت خطوة واحدة لفرغ فيك

الست طلقات وزى ماتيجى . ودينى اقتلك وبدال

ما اتحاسب على الواحد بتاع زمان ح اتحاسب بالمره على

اتنين .

( لدى إخراج الطنجة تحدث حركة هرج ومرج هائلة في

الحجرة . الكل يتسابق ليغادرها عن طريق الباب الأوسط

فيشلون بعضهم بعضا .. نونو تصرخ وتختفى وسط

الكورس . العسكري يلتصق بشدة في الحائط بحيث ينطبق

على العسكري المرسوم في اللوحة تمام الانطباق وكأنما يخفى

وجوده . الدكتور يتخلى فجأة عن جلسة القاضي الوقورة

وينزل أسفل المكتب ، ووراءه يرقد صفر مخفيا رأسه ) .

م . الثاني : ( باضطراب وارتعاش ) مش عايز حد يتحرك حركة

واحدة ، ح اضرب بالنار على طول اللى خايف على نفسه يقف

سأكت .

الدكتور : ( من مخبئه ) يا أستاذ أرجوك . هدى نفسك ، وانا ح اعمل لك كل حاجة . انت عايز إيه ؟ إذا ما عملتكش ابقى اعمل زى ما انت عايز ، إنما ده مكتب حكومة وما يصحش تعمل فيه كده .

م . الثاني : مين اللى بيتكلم ده ؟.. وريني وشك ياللى بتكلم .. انت مين ؟

الدكتور : أرجوك هدى نفسك بس .

م . الثاني : انت مين ؟

الدكتور : أنا الدكتور ( ثم فى همس ) ده خطر قوى الجدع ده .. لازم

صفر حد يطلب لنا بوليس النجدة .. يا صفر .. انت فين يا وله ؟

صفر : انا هنا ورا سعادتك على طول .

الدكتور : اطلب بوليس النجدة يا وله .

صفر : يا سعادة البيه مش شايف بيقول إيه ؟ أنا صاحب كوم عيال

اعمل معروف .

م . الثاني : أنا سامع كلام ، فين الدكتور ده اللى بيتكلم ؟ من فضلك

وريني نفسك .

الدكتور : دخل المسدس فى جيبيك أولاً . إنت فى حالة هياج وجايز

تضغط ع الزناد من غير ماتمس . إنت جاى عايز تمنع جريمة

واللا ترتكب جريمة ؟ دخل مسدسك وانا اعمل لك كل اللى

انت عايزه .

م . الأول : اختشى يا محمد ياتانى عيب . انت اتجننت ؟ إيه اللى بتعمله

ده ؟ انت مش عارف إنك بتتهجم دلوقتى على موظف عام

أثناء تأدية وظيفته ؟ دا انت تروح في داهية بالشكل ده . ياللا  
بيننا ياشاويش .

العسكري : اتفضل سيادتك روح انت وأنا خمسة ووراك على طول .  
م . الثاني : ( لميم الأول ) لا والله عارف الأصول حضرتك ، أمال لما  
انت قانونجي بالشكل ده عامل العملة دي ليه يا مجرم ياسفاح ،  
يا قليل الذمة والدين .

م . الأول : الله يسامحك . ياللا بينا يا محمد .  
( م . الثالث يتردد برهه ولكن م . الأول يجذبه  
ويتحركان ) .

م . الثاني : والله العظيم ح اضرب . ( المسدس يرتجف بشدة في يده  
فيحاول أن يسندها باليد الأخرى فيرتعش جسده كله ) أنا  
استغيت عن عمري خلاص وكفاية اني أخلص العالم منه .  
ورحمة أبونا محمد الطيب في نومته ما تتحرك خطوة واحدة  
لمفرغة في قلبك .

الدكتور : ( لميم الأول ) اسمع يا أستاذ ده باين عليه بارانويد شيزوفرينيا  
مفيش كلام . اسمع كلامه وما تتحركش ، ده عنده أتاك ودي  
أخطر حاجة لأنه يقتل على طول وما علهش عقاب كان . اقف  
زى ما قال لك وما تتحركش .

م . الأول : الصنف ده أنا اعرفه كويس يا دكتور .  
الدكتور : انت تعرفه ؟

م . الأول : ده أخونا الثاني يا دكتور .  
الدكتور : يعني انتو الثلاثة اخوات ؟

م . الأول : أيوه .  
الدكتور : شققا ؟  
م . الأول : أيوه يا دكتور .

الدكتور : ويعنى مالقيتوش حته تحلوا فيها مشاكلكو العائلية إلا هنا ؟  
م . الأول : اطمئن قوى يا دكتور ، ما يفر كشى انه ماسك مسدس . ده بتاع ضرب نار ده ؟ ده جبان . ده كان كونستابل يا دكتور وبعدين جه يهوش واحد حرامى وضرب فيه فجت فى المليون ومات ، فحصل له انهيار عصبى من كتر الرعب وبقى له ثلاث سنين بيتعالج من الخضة .

م . الثانى : كده ؟ طيب إذا كنت شجاع وشارب من لبن أمك صحيح اجدعن كده وخطى خطوة واحدة وشوف إيه اللي ح يحصل لك ؟

الدكتور : يا اخوانا ده مكتب صحة مش فيلم كاوبويز . يا أستاذ تانى عاجبك يعنى المولد اللي انت عامله ده ؟ أنا بقول لك ح اعمل لك اللي انت عايزه . انت عايز إيه ؟

م . الثانى : الجدع ده ضحك عليك يا دكتور واخويا ده مش مجنون ولا حاجة .. ده عايز يدخله المستشفى بالزور عشان يعمل وصى عليه وياخد أرضه .

الدكتور : والمطلوب إيه ؟

م . الثانى : تسحب سيادتك الورق منه وتبلغ فيه البوليس وتمنعه إنه يخرج ، لأنه لو خرج يبقى علينا العوض فى محمد الثالث وأرضه .

الدكتور : حاضر . كل الى انت عاوزه ح يحصل ( ثم بهمس لصفر )

بص شوفه نزل المسدس كده يا صفر .

صفر : يا بيه أنا صاحب كوم .

الدكتور : داهية فيك وفي كومك ، من صدق جبان . رجالة إيه دى

مش فاهم ؟ أشوف انا .

( يرفع رأسه شيئاً فشيئاً ، وما تكاد عيناه تصلان إلى حافة

المكتب حتى يدوى طلق نارى ، فينبطح الدكتور على

الأرض ملتصقا بها لا حراك به وبجواره يتمدد التمورجى بينا

العسكرى اعتقد أنه هو الذى أصيب فوضع يده على قلبه

وتهاوى على الأرض ) .

م . الثانى : حركة واحدة والثانية فى قلبك يا مجرم على طول .

( م . الأول يلتصق بالحائط معطيا ظهره لميم الثانى ورافعا

يديه فى الهواء ، عكسه تماما يقف م . الثالث ملتصقا ظهره

بالحائط حائرا ماذا يفعل بيديه ) .

الدكتور : يا صفر ! انت يا صفر !

صفر : ما تعقل بقى يا سعادة البيه وتبطل كلام .

الدكتور : احنا ما متناش يا وله ، أنا افكرت الطلقة جت فى على طول .

صفر : ما متناش أيوه ، إنما بالطريقة دى ح نموت . ما تقول يا صبح

بقى أنا صاحب كوم .

م . الثانى : عرفت بقى الجبان مين يا محمد يا أول ؟ عرفت مين فينا الى

ميت م الخوف على عمره ؟ مين الى مستعد يقول أنا مرة

عشان ساعة زيادة يعيشها ، واللا قرش زيادة يدخل جيبه ؟



م . الثالث : برافو عليك ! الحمد لله .. العقدة انفكت .. عملتها ، برافو عليك !

م . الثاني : ( مكملًا كلامه ) اتفضل يا دكتور ، خلاص اطلع ما تخافش . اطلع عشان تتفرج على البنى آدم لما ينسعر زى الكلب يا دكتور .

الدكتور : ( وهو على نفس وضعه ) أيوه .. يلزم خدمة ؟

م . الثاني : أقعد بقى على مكتبك ، خلاص .

الدكتور : وأضمن منين ؟

م . الثاني : يوهوه ! ما هو ما تجننوش الواحد أكثر ما هو مجنون ( بلهجة فيها أمر ) ما تصلب حيلك بقى وتورينى وشك .

الدكتور : ( معتدلاً فى قفزة جالسا القرفصاء ) كويس كده ؟

م . الثاني : على مكتبك بقول لك .

الدكتور : ( فى قفزة يكون قد جلس إلى كرسي المكتب ) تحت أمرك .

م . الثاني : انت كتبت ان محمد الثالث مجنون ؟

الدكتور : أنا ماليش دعوة ، اسأل الناس الموجودة دى كلها .. أخوك

الى مبلغ عنه وهو نفسه الى عايز يخش المستشفى ، وأنا

يدوبك سجلت أقوالهم .. أنا ماليش أى ذنب .

م . الثاني : وانت رأيك برضه إنه مجنون ؟

الدكتور : أبدا أبدا أبدا ، أنا حتى فى الورق كاتب انه يتحط تحت

الملاحظة .

م . الثاني : ولو كان كل الكلام الى قاله عنه محمد الأول ده كدب

وادعاء ، يبقى الوضع إيه ؟

الدكتور : يبقى لازم الورق ده يتقطع ويتكتب تقرير تانى إن قواه العقلية

سليمة ، ويتبلغ فى أخوك ده للنيابة .

م . الأول : عشان ( محمد الثانى يرمقه بجدة ) عشان آخذ .

م . الثانى : خلاص ! ابتدى اعمل إجراءاتك .

الدكتور : بس يعنى لا مؤاخذة ..

م . الثانى : ولا يعنى ولا مؤاخذة عايز دليل الإثبات ، اتفضل ! اللي مبلغ

نفسه ح يتولى تكذيب نفسه . قول له بقى يا أخ إزاي ان دى

لعبة عاملها حضرتك عشان تاخذ أرض أخوك .

م . الأول : ( براءة ) لعبة ليه يا محمد يا حبيبي ؟

م . الثانى : اسمع ملاوغة مش عايز ( يضغط على زناد المسدس ) ح تقول

والا مش ح تقول ؟

م . الأول : بس ما تزعلش نفسك ، ح اقول . أيوه يا دكتور ، كل الل

قلتهولك ما حصلش ، كله كذب .

م . الثانى : محمد التالت مجنون ؟

م . الأول : أبدا ، أبدا مش مجنون ولا حاجة .

الدكتور : أمال عملت كده ليه ؟

م . الأول : عشان تحقق معاه وينال جزاءه .

الدكتور : حته الأرض بتاعته .

م . الثانى : بقى له سنتين يا دكتور قاعد يتحايل عليه بيع له ميراثه من أبوه

ثلاث فدادين وتلت . هم عشر فدادين كل واحد من ناله تلاته

وتلت . ده بقى حلمه ونومه وصحيانه وأمله إيه يبقى صاحب

العشر فدادين . أنا بيعنى نايبى وخده لما كنت عيان ، الاسم

بيع وشرأ والحقيقة سرقة ونهب .. بشلنات وحياتك وجنيهات  
ورباع جنيهات ويقيد ، وانا تايه بتعالج بالكهربا مش عارف  
ولا دارى .. خفيت من هنا لقيته خد الأرض ومسجل  
وماليش عنده ولا مليم . ادور على محمد التالت ، رفض  
يحايله ، يرفض يهدده ، يرفض بلغ عنه مرة انه شيوعى وقبضوا  
عليه وقعد شهر وخرج .. أجر عليه ناس فى البلد يقتلوه ..  
حط له مرة ديناميت فى المعمل عشان ينسفه .. وأخيرا مالقاش  
فايدة غير انه يدخله مستشفى الأمراض العقلية ويعمل وصى  
عليه ويشفظ منه الأرض .. دا مجرم يا دكتور إجرام ما  
شفتلوش مثيل .

- الدكتور : مضبوط الكلام ده يا أول ؟  
م . الأول : ما قلت لسيادتك كل اللي قلناه كذب .  
الدكتور : ( محمد الثانى ) بس ده مرات محمد التالت موافقة رخرة  
وشهدت انه بتجيله نوبات ، وانه حاول مرة يدبجها .  
م . الثانى : مراته مين ؟  
الدكتور : اسمها نونو دى .  
م . الثانى : هى فين نونو دى ؟  
الدكتور : فين الست اللي كانت هنا ؟  
صفر : فين الست اللي كانت هنا ؟  
( ثم مكتشفا وجودها أمامه مباشرة ) أهى يا سعادة البيه .  
م . الثانى : دى ؟ دى مرات الأول ( يقهقه كالمجنون ) .  
دا الدنيا خربت .. القيامة قامت خلاص . ودينى وما أعبد

لبكره تقوم . تستني إيه هي الدنيا ح تخسر أكثر من كده ؟ دا  
احنا بقينا في غابة ، في بلاد غنم .

الدكتور : إيه بس فيه إيه ؟  
م . الثاني : دي مراته هو يا دكتور . أخويا الثالث مش متجوز ، يقوم  
الأول عيني عينك كده وفي عز الضهر يدعي ان مراته مرات  
اخوه . العوض على الله ! عليك العوض يارب .

الدكتور : ( للسيدة ) انتي مراته صحيح ؟  
نونو : أيوه يا بيه والله مراته .  
الدكتور : مرات مين فيهم ؟  
( محمد الثاني يصبو المسدس بطريقة يائسة متهورة ) .

م . الأول : ( مسارعا ) مراتي يا بيه مراتي .  
الدكتور : أنا بسألها هي . انتي مرات مين ؟  
نونو : مراته يا بيه .  
الدكتور : يعني كنتي بتكذبني .  
نونو : أيوه .. أيوه يا بيه .. كنت بكذب .  
الدكتور : ليه ؟  
نونو : أعمل إيه ؟ .. قسمتي كده .. حظي كده .. ( تنخوط في

البكاء ) .  
الدكتور : دي حكاية إيه المملخطة دي ؟  
م . الثاني : يا كافر يا عديم الضمير يا متوحش . كل ده علشان تلات  
فدادين وتلت يحولوك غول . أول ما ياكل ياكل اخواته .  
أعوذ بالله .. أعوذ بالله .

الدكتور : أنا برضه مكنتش مطمئن . قلبى كان حاسس ان فيه حاجة مش  
مضبوطه . بس اللى خدعنى موقف الثالث ده . طب ده عايز  
الأرض وعمل كده فهمناها ، ودى مراته واتفق معاها انها تمثل  
الدور برضه ممكن نفهمها ، إنما ده محمد الثالث ده ازاي  
يوافق ؟ ومش يوافق وبس . ده كان متحمس لدخول  
المستشفى أكثر منهم .

م . الثاني : لازم ساقينو حاجه واللا عاملين له عمل . ده حاكم مجرم قوى  
مستعد يعمل أى حاجة يحقق بيها غرضه .

الدكتور : عمل إيه بس مع راجل متعلم زى ده ومثقف ثقافة عالية .  
إزاي يا دكتور توافقهم على إنك مجنون ؟

م . الثالث : وسيادتك بتلومنى ليه ، انت مش وافقتنا ؟ أنا مثقف صحيح  
بس دى شغلتك ومع كده وافقت .

الدكتور : أنا وافقت بناء على كلامك .  
م . الثالث : دانت قبل كلامى كنت ماضى وخاتم ، ولا زلت ماضى  
وخاتم .

الدكتور : أعمل ايه ما هو كلامك وآراءك ملخبطة وتلخبط ، أنا نفسى  
لسه متوغوش فيك .

م . الثالث : يبقى اعذرني بقى إني أتوغوش فى نفسى .  
م . الثاني : إنما بالنسبة له هوه ما فيش وغوشة . اللعبة بتاعته باينه زى

الشمس .  
الدكتور : ( وكأنا يتذكر شيئاً ) بس فيه حاجة ازاي حصلت ، إنك

توافق على إن مراته مراتك ؟

م . الثالث : وما وافقش ليه ؟ هو جاي معايه خدمه ، وقدم مراته ، ما وافقش ليه ؟

الدكتور : إنما هي مراته صحيح مش مراتك ؟

م . الثالث : أفكر انه قال كده قدامنا .

الدكتور : بس انا عايز اعرف منك انت .

م . الثالث : ما أظن اتضح لك بقى ان كلامى ما فيش منه فائدة لا بيودى

ولا بيحيب .

م . الثانى : ( ناظرا إلى الجميع فى حسرة ، ثم مضيفا فى يأس ) بيتيألى ما

عدشى له لزوم للمسدس ، اتفضل ايه يا دكتور ده على فكرة

مسدسه هوه تبقى سيادتك بقى بعد ما تخلص تديهوله واللا

تسلمه للبوليس ( م . الأول يمديه محاولا أخذ المسدس .

الدكتور يسارع باختطافه ويضعه فى صدره أولا . وحين

يضايقه يضعه فى درج المكتب ) .

الدكتور : ودلوقتى بقى فز قوم يا صفر نادى الباشكاتب خليه يعمل

إشارة مستعجلة للقسم .

م . الأول : بالظبط كده يا دكتور . ده نشف دمنا الله ينشف دمه .. ده

سيادتك تعمل فيه بلاغ بتلات تهم : أولا التهجم على مكتب

حكومى وإطلاق النار فيه ، ثانيا الاعتداء على موظف عمومى

أثناء تأدية وظيفته ، ثالثا بقى الشروع فى قتلى مع سبق الإصرار

والترصد .

صفر : وانا رآخر بلاغ يا سعادة البيه ، عايز بلاغ .

الدكتور : عشان إيه ؟

( فيه لما قايلا )

صفر : بلاغ بقطع عرق الخلف يابيه . دانا ما يكفنيش ولا ميت ألف  
جنيه تعويض . والله بعد الخضة اللي اتخضيتها ماح اخلف  
أبدا ، وأنا غلبان وصاحب كوم عيال .

الدكتور : بس أهم من البلاغات دي كلها اني أبلغ فيك انت يا سيد مدير  
عام مساعد ، لأن انت السبب في ده كله . ازاي واحد باين  
عليه نضيف ومترى ، يغش ويدلس علشان يدخل أخوه  
المستشفى وياخذ أرضه ؟

م . الأول : الله ! جرى إيه يا دكتور ، انت سيادتك صدقته واللا إيه ؟  
الدكتور : انت مش معترف قدامنا ؟ ده كان فيه جريمة رشوة يابو ساعة  
ماركة مينا مذبوتكس .

م . الأول : معترف ! وده اسمه اعتراف ده يا دكتور ؟ بقى واحد ضرب  
في نار وبيهددني بالقتل وانت نفسك قايل لي هاوده على كل  
حاجة ، وبعدين دلوقتي جاي تحاسبني على اللي قلته ساعتها ؟  
الدكتور : أصل كان باين من غير تهديد ولا مسدس ان كلامه مذبوط ،  
وانك فعلا عملت كده .

م . الأول : لا حول ولا قوة إلا بالله . بقى المجنى عليه يصبح جاني ؟  
المضروب فيه نار يبقى كذاب والمجرم أبو مسدس يبقى  
الصادق ؟ بقى واحد زى ده دخل سيادتك تحت المكتب  
وهان كرامتك تصدقه ، وانا عشان ما بكلم سيادتك بالذوق  
وبالإنسانية ابقى كذاب ؟

م . الثاني : اتسلبط يا خويا اتسلبط . ده زى التعابين الناعمة يا دكتور .  
أهو مجننا بكده ، احنا يبقى معانا الحق وهو بالكلام الناعم ده

يطلعنا غلطانين و محققين .

الدكتور : من فضلك .. أرجوك .. ما حدث يكلم هنا إلا بإذني .. أنا اللى بكلم دلوقت ( ثم لميم الأول ) أفهم من كده إنك مصر على كلامك الأول ، على إن أخوك الثالث ده مجنون ؟

م . الأول : مصر جدا .

الدكتور : وتثبت كلامك ده ازاي ؟

م . الأول : بمحاضر البوليس ، وكلامه هوه قدام سيادتك ، ويعرض عليك وعلى أى قومسيون طبي .

الدكتور : يعنى ما قلتش وكلام مراته . هى دلوقتى بقى لسه مراته واللا بقت مراتك ؟

م . الأول : والله اللى تشوفه سيادتك .

الدكتور : ( لميم الثانى ) وانت بتقول إن أخوك الأول ده كذاب ، وإنه زور أدلة يثبت بها ان أخوك الثالث ده مجنون عشان ياخذ أرضه ؟

م . الثانى : كده بالضبط .

الدكتور : تثبت كلامك ازاي ؟

م . الثانى : كل كلمة قالها لسيادتك ح اثبت إنها كذب .. وحتى بلاش أتعبك معانا كفاية إني أثبت لك إن الست اللى يقول عليها مرات الثالث دى مراته هوه . لو ثبت كده مش تكفى دى عشان بيان إنه كذاب وإن كل اللى بيقوله غلط ؟

الدكتور : ( لميم الأول ) لو ثبت إنها مراتك يبقى كل كلامك كذب وتلفيق ؟



م . الأول : إذا ثبت .. الجدة يثبت .

الدكتور : تبقى المسألة أصبحت بسيطة جدا .. اتفضلى يا ست نونو .

نونو : نعم ؟

الدكتور : اتفضلى هنا .. فى النور هنا .

( تتحرك حيث أشار الطبيب ) .

خلاص ما علينا إلا إننا نشوف بقى انتى مرات مين فيهم ؟

م . الثالث : ( يقهقه بصوت مرتفع ) .

الدكتور : ( ينظر ناحيته مشمئزاً فتزداد قهقهاته ) بتضحك على إيه

يا أستاذ يا دكتور ؟

م . الثالث : ( يضحك ) . دانا لازم اموت على نفسى م الضحك .

( يقهقه ) دا حاجة تفتس م الضحك .

الدكتور : هى إيه اللي تفتس من الضحك ؟

م . الثالث : اللي انتو عاملينه ده . بقى إذا كانت مراتى يبقى مخى ده عاقل ،

وإذا كانت مراته يبقى مخى ده مجنون ؟ مش حاجة تهلك من

الضحك ؟ ده زى ما اقول إذا كان العسكرى ده أبوه عايش

يبقى الدكتور ده يفهم فى الطب ، وإذا كان ميت يبقى مش

دكتور خالص ، يبقى محامى مثلاً . مال مخى أنا وماها ؟

افرض واحد من الطرفين طلع أشطرم التانى ، أتحمّل أنا

النتيجة ليه ؟ افرض طلعت كدابة ، افرض ما طلعتش

متجوزانا خالص ، افرض طلعت انها متجوزانا احنا الاتنين ،

ابقى اطلع عاقل ومجنون فى وقت واحد ؟

الدكتور : بقى يعنى حضرتك لا منك ولا كفاية شرك ، أسألك

تلاوعنى .. أناقشك تقول لى فوازير وتكون النتيجة انى  
أستغنى عنك خالص واحاول اعرف الحقيقة من غيرك ،  
فتتريق ع الطريقة ، فى حين انها الطريقة العلمية الوحيدة لمعرفة  
إذا كنت عاقل أو مجنون .

م . الثالث : إزاي بقى الطريقة العلمية ؟ العلم برضه بيقول إذا كانت  
مجوزانى أبقى مجنون .

الدكتور : العلم بيقول ان الطبيب يعرف المجنون بمعلومات يا إما يا خدها  
من قرايبه والمحيطين ، يا إما من المريض نفسه .. فإذا كان  
المريض ملاوع زى حضرتك فنسأل قرايبه ، وده اللى بعمله .  
فإذا اتضح ان قريبك بيزور فى كلامه فيبقى المعلومات  
كذب ، وبالتالي مفيش جنون ولا شذوذ . وإذا اتضح إنه  
صاّدق فيبقى فيه مبرر لحطك تحت الملاحظة . أظن واضح  
دلوقتى أهمية اننا نعرف نونو مرات مين ، ثم بقى تسكت  
حضرتك خالص وتعتبر نفسك مش موجود .

م . الثالث : حاضر .. دى أكبر خدمة تعملها لى حضرتك ، بصراحة  
مش عايز اتحمل مسؤولية أى نتيجة توصلوا لها . أنا تعبان مش  
قادر اتحمل مسؤولية حتى إنى موجود ، مجرد موجود .

الدكتور : أيوه يا ست نونو ؟ ( ثم مراجعنا نفسه ) بشرفى دى حاجة  
تلخبط . أنا خايف أنا نفسى اتلخبط .. فعلا ، نبتدى زى  
ما بيقولوا فى القانون بالدليل ، وبعدين إذا ما نفعش نجيب  
القرينة ( ناظرا إلى ميم ٣ ، ميم ٢ ) انتوا إيه بقى يا سيدى  
حكايتهكو ؟

م . الأول : يا بيه دول أبوهم مات وأنا في الحقوق ، فسبتها واشتغلت  
عشان اعلمهم . حضرتته اللي ضرب في نار ده صرفت عليه  
ست سنين ، والتالت سبع سنين .

م . الثاني : ويعنى انت كنت بتصرف علينا من جييك ؟ ما انت نهيت  
الفلوس اللي سابها ابونا و كنت بتاخذ إيراد الأرض .

م . الأول : الفلوس اللي سابها أبوكو انتو عارفين كويس مين اللي نهيتها ؟  
والأرض ، أرض إيه وهباب إيه ؟ دول عشر فدادين عمى  
إيرادهم الصافي ١٨٠ جنيه .. يعنى الواحد ما يحصلوش  
خمسة جنيه في الشهر .. انت كنت بتشرب سجاير بس بتلاتة  
جنيه ، شوف بقى تلات سنين في توجيبي وتلاته في مدرسة  
البوليس يكلفوا كام ؟ والتالت ده من ثقافة لغاية ماخذ  
البكالوريوس .. مين اللي كان حارق دم قلبه عليه ؟ اسأله إن  
كنت أخرت لواحد فيهم طلب .

م . الثالث : الحقيقة عمرك ما أخرت لنا طلب ، ولا التاني عمره عاز حاجه  
وما جبتلوش .

م . الأول : طيب .. اللي يعمل كده يدني نفسه على أرض اخوه ، ويزور  
زي ما بيقولوا عشان يدخله ويلهفها ؟

الدكتور : أمال عايز تدخله ليه ؟

م . الأول : عشان عيان يا بيه .. عشان شايفه في النازل باستمرار قلت  
الحقه قبل ما يضيع .

الدكتور : في النازل ازاي ؟

م . الأول : ده كان كويس قوى طول عمره بيطلع الأول ، و كنت مستعد

ابيع هدومي واعلمه أعلى تعليم .. كنا بنسميه النابغة ، ولما خد  
توجيهي مارضيش يخش الطب زى الناس ما بتعمل ، قال أنا  
عايز اخش الزراعة لأنه طول عمره يحلم انه اكتشف دوا يموت  
دودة القطن ويوفر على البلد ٧٠ مليون جنيه .. دخل الزراعة  
وطلع الأول ع البكالوريوس والأول ع الدبلوم ، وخذ  
ماجستير ودكتوراه وخاص جه يوم قعد بيوس فينا ويقول بعد  
شهر واحد حاعلن نجاح الطيبين . أصله كان مسميه على اسم  
المرحوم أبونا .

م . الثالث : قلت لك مليون مرة مفيش طيب باللاتيني ، فيه تايب بس .  
م . الأول : ( هازا رأسه ) ما تعرفش سيادتك حصل إيه ؟ واحد متغاظ  
منه ، مسألة حسد ، غيره ، إيه الحكاية موش عارف ، بصينا  
لقيناهم في يوم قابضين عليه بتهمة إنه شيوعى ، والحكومة  
أيامها كانت بتمسك الشيوعيين ، وعشان البلاغ كاذب  
يادوبك قعد شهر وطلع ، إنما طلع حاجة تانية خالص .  
ضحك بطل يضحك ، نكت بطل ينكت ، طول النهار قاعد  
يفكر ومع كده متلخبط مالوش حماس لأى حاجه ، وابتدى  
يفكر فى الكون قال ، ويقول أهم من إننا نعيش إننا نعرف  
عايشين ليه ؟ وأهم من إننا نقضى ع الدودة إننا نعرف حكمة  
وجود الدودة ، باعتبارها الشر والقطن باعتباره الخير . ولو  
قضينا ع الشر وفضل الخير بس يمكن الإنسان يعرج .

صفر : ( مغمغما ) يعرج .. طب ما هو بده وبده يعرج برضه .. ده  
يعرج عشان هم اتنين بس .. يمكن لو اتخط له رجل تالته

يطل .  
م . الثالث : ( متحمسا ) برافو عليك وجدتها .. وجدتها .. دانت مش  
صفر .. دانت مليون صفر .. بالظبط كده .. عارف الرجل  
التالته تبقى إيه ؟ .. الخير والشر والموت ، واللا اقول لك ..  
الخير والشر والمرأة .  
صفر : وانا وانت ..

الدكتور : بس .. احنا فين ؟ .. كمل يا أستاذ .  
م . الثالث : ساب بقى العلوم وابتدى يقرا فلسفة ، حتى الكتب الصفرا  
الى كانت عند عمى الكاتب قراها كتاب كتاب . ورغم  
الفلسفة دى ابتدى الى عمره ما شرب سيجارة يشرب  
حشيش ومخدرات وحبوب م الى بتسهر ، ويروح  
كباريهات . ومرة عمل علاقة مع طالبة فى الكلية من  
تلامذته ، فالعميد لفت نظره قال له أنا حر ، وراح معاند  
ومجوزها وخذ لها شقة . ما فيش بعد شهر اكتشف انها لسه  
على علاقة بواحد طالب زميلها فطلقها ونزل من ساعتها يهوى  
بقى لغاية ما فى يوم جه بنفسه وقال لى أنا خلاص عايز أخش  
المصحة . قلت له ليه ؟ قال لازم . قلت له ماهيتك ما  
تسمحش . قال أخش مستشفى الحكومة . حاولت اكسر  
مقاديفه ما أمكنيش لغاية ما اعمل إيه ؟ جبته .

م . الثانى : بس تنكر انك عرضت عليه بيع لك أرضه .. تنكر ؟  
م . الأول : وأنكر ليه ، هو انا كنت ح انهبها ؟ أنا كنت ح اشترىها .  
م . الثانى : زى ما اشتريت أرضى أظن .

م . الأول : آديك بنفسك بتقول انى اشتريتها شرا ( ثم للدكتور ) أنا عازره يا بيه . أصل عياه أثر عليه قوى ، كنت الأول أزعل لما يتهمنى واللا يشتمنى ، دلوقتى ما ازعلش .

الدكتور : وانت كنت عييت بايه يا تانى أمال ؟!  
م . الثانى : أبدا . أنا لا عييت ولا حاجه . ما تصدقوش ! أنا أعصابى بس تعبت شوية .

الدكتور : عشان ضربت الحرامى ؟!  
م . الثانى : مش بالظبط عشان كده يا دكتور . هى المفاجأة بس . أنا كان قصدى انى أهوشه واضرب فى رجليه . لما لقيته بيكسر فى قفل الدكان قلت استنى عليه لما يكسره عشان تبقى حالة تلبس . كسره رفعت عليه المسدس وقلت له اقف عندك . وما وقفش ، وجرى ، قلت هوشه ياواد واضرب تحت رجليه . ما تعرفشى اكمنى كنت بجرى يمكن ضربت بصيت لقيته راح نازل ساكت . افكرته بيهوشنى راخر رحت لغاية عنده أقلب فيه لقيته ميت والرصاصه جاية فى قلبه تمام . لو ظنيت لثانية انها ممكن تصيبه يمكن ما كنتش اتفاجأت . إنما عمري ما تصورت انها ح تيجى فيه من أصله أقوم القاها فى قلبه . حسيت انى قتلته قتل ودخت وقعدت جنبه للصبح ، ورحت سلمت نفسى فى القسم وقلت انا قتلته . قالوا لى دا يستاهل داله ١٩ سابقه منها ٣ حوادث قتل ما سبتوش عليه ، وادونى نيشان . إنما بعد كده ما كنتش اطيق ابص فى حاجه اسمها بندقية أو مسدس . كنت اشوفها فى إيد عسكري أو واحد زميلى فادوخ . أشوف السلاحليك فى القسم نفسى تغم على . نقلونى م البوليس خالص ورحت

حرس الوزارات وحولوني على قسم أمراض نفسية في  
الدمرداش ، بقوا يعالجوني بالصدمات لغاية اما الحمد لله  
أحسن كثير دلوقت .

الدكتور : ده أحسن كثير خالص . واضح قوى انك مش بس ما عنتش  
بتدوخ ، دا انت بتضرب نار أهه بدوخنا احنا .

م . الثاني : غضب عنى يا دكتور ، أصلى متغاظ غيظه . أصلى مش قادر  
أتصور ان كل ده بيحصل م الأول ، أخويا اللي حبيته وحبينه  
الحب ده كله يعمل فينا كده ؟ فينتهز فرصة مرضى وياكل  
أرضى ، وبعدين منتهز فرصة ان اخوه تعبان يدور عليه يلع  
أرضه ، ويا ريتها الأرض بس يا دكتور دا بقى غول . احنا  
ابونا مات وسابنا تلات اخوات مفيش أحسن من كده  
اخوات ، صرف علينا صحيح ما انكرشى ، إنما هو خلف من  
هنا وانسعر من هنا . احنا عايشين فى بيت أبونا ما سبناهوش كل  
واحد واخذ أوده ، وهو عمل البدع عشان يخرجنا من  
البيت ، واحنا كل ما نشوفه عايز يخرجنا راسنا وألف سيف ما  
نخرجش . هو الكبير وبنحترمه وهو بيستغل احترامنا له أشنع  
استغلال ، لدرجة وهو مدير عام مساعد أهه لما يجب يشرب  
شاي ما يهونشى عليه يشرب فى أوضته ييجى للواحد فينا مهما  
كان مزعله أو شاتمه ويقول : ما تعملولنا شاي .

صفر : أما لو كان رئيس مجلس إدارة كان عمل إيه ؟

م . الثاني : الأكل .. يمكن ما ييطبخش يوم والا اتنين فى الأسبوع ،  
والباقي يا عند التالت يا عندى . ساعة الغدا بالظبط ابص الاقيه

جاي وفاتح موضوع وييجي الأكل يا كل بعد شوية ، تيجي مراته تسأل عليه يقعدا . شوية العيال يتسحبوا هم رخرين وييجوا . بالظبط اتحول تمام بقى زى عمه الطالب صورة طبق الأصل .

م . الأول : عيب ياتانى اللى بتقوله ده . انت زى القطط تا كل وتنكر . يا دكتور أظن وريتك ازاي ضيعت عليهم شباني . إزاي ضيعت مستقبلي وسبت الجامعة واشتغلت كاتب في محل ساعاتي عشان اعلمهم .. يعني فضلتهم على نفسي وكان أحب حاجة على قلبي انهم يبقوا أحسن مني ألف مرة . اللى حصل إني بعد كده بصيت لقيتهم اتخرجوا ده بقى مدرس في الجامعة ، وده في البوليس ، وده بياخد ماهية الشيء الفلاني ، وده الشيء الفلاني ، وأنا الوحيد اللى طلعت م المولد بلا حمص . كنا اشتغلنا في تصنيع الساعات هنا بعد الثورة بسنة وكانت ماهيتي يوميا وصلت بالعافية عشرين جنيه ، ولقيتني مجوز ومخلف ثلاث ولاد وبنيتين . ما يغركش يا دكتور حكاية مدير عام مساعد دى ، ده المصنع كله فيه بالظبط سبع ساعاتية منهم واحد خرج ، وابن الحج بيدير المحل ، وأنا بساعده . كنت منتظر انهم زى ولاد الحلال كل واحد فيهم ييجي آخر كل شهر ويقول لى يا محمد يا خويا خد الخمسة جنيه دى واللا العشرة جنيه ، انت صاحب عيال يرد بيها جزء من الدين ، ولا حد فيهم سأل ، كل واحد بقى يقول ياللا نفسي .

م . الثاني : بقى احنا اللى بنقول يا لله نفسي يا أول ؟ — يا أخى إن ما كنتش



مكسوف من الناس ؛ انكسف من ربنا يا أخى .

م . الأول : ( مواصلا كلامه وكأنه لم يسمع ) أنا مش نفسى بس ، أنا خمس عيال فى رقتى وامهم عايزين ياكلوا ويشربوا ويتعلموا واضمن لهم مستقبلهم . الواحد منهم اتخرج وياخد ماهية ، وأكيد مش لازم له قرشين الأرض بتوعه إنما يلزمونى أنا ، يعينونى .. يريحوا مخى ده اللى كان ح يطق من كتر التفكير .. غلط بقى إنى اشترت من التانى أرضه ، اشتريتها مش شحتها ولا نهبتها ؟ غلط أحاول اشترى أرض التالت وهو كيف كان ح يبيعتها ؟ يعنى كويس انها كانت تطلع بره ، كان دلوقتى حضرتته بقى مستريح ومبسوط ؟ أنا صرفت عليهم دم قلبى وطالع لى خمسة ، أجيب مينين شبابى ثانى عشان اصرف عليهم واعلمهم وأنا عجزت واللى راح منى عمره ما ح يرجع .

م . الثانى : الكلام حلو وجميل . حد يقدر يقول فيه حاجة ؟ راجل بيدافع عن مصالح أولاده ، ومعظم الناس فى الدنيا يبقى لها دائما هدف نبيل قوى زى ده .. ضمان مستقبل ولاده فى الحالة دى لو طمعت الناس مش ح تلومنى ، لو سرقت حتى ما حدش ح يلومنى . لو نصبت ، لو زورت لو جبت اخويا بالعافية عشان ادخله المستشفى واخذ أرضه محدش يلومنى . ده صحيح يا دكتور ، هو عمه الطالب تمام .. الجدود بتفضل مستخبية فينا لغاية غضب عنا ما تطلع ، الشاب فى مطلع شبابه يثور على بخل ابوه ويفضحه ويشنع عليه فى كل حته ، وبعدين يكبر شوية بيتدى يقرب من سن ابوه تبص تلاقية يخيل زيه

بالظبط ويمكن أبخل منه . العشر فدادين بتوعنا دول مش أصلهم عشرة . دول عزبة كبيرة بيقلوا انها كانت تلتميت فدان سابهم جدنا الكبير قارون ودبقهم م المليم والصلدى .. بيقلوا كان هدومه كلها جلاية واحدة يلبسها صيف وشتا ومن غير ملابس تحتها خالص ، وكان يربى الفراخ لغاية ما تكبر فما يهونشئ عليه ويبيعها . وسبب موته ان جت كوليرا للفراخ فمات منها عشرة فى يوم ما هانوش عليه ، كلهم كلهم .. وكان بيطلع الفلوس بالفايظ وعمره ما راحم حد .

م . الثالث : تسمح لى يا دكتور .. أفكر من حقى انى أسأل سيادتك .. بصفة ان انا الوحيد هنا اللى مصيره بيعتمد على قرارك . حضرتك بعدما عرفت وجهة النظر دى ووجهة النظر دى ، وصلت بقى لأنهى قرار ؟

الدكتور : قرار ؟ وصلت لقرار ؟ دانا من شوية كنت اقرب للحقيقة من دلوقتى . دا كل اما بيقلوا أكثر كل اما بتوه الحقيقة أكثر . ده كان يوم مهيب إيه ده اللى اتكبتوا على فيه ؟ اسمعوا بقى ؟ انا مشا كلكم العائلية دى ماليش دعوة بيها .. المسألة ببساطة انى عايز اعرف إذا كان الأول ده زور ودلس عشان يضللى واللالا . دا كلامكم مش بيجبنى لقدام ده بيرجعنى لورا .. أنا بصراحة مش قادر اعرف مين فيكو الغلطان . بيتيها لى ان كلامكم انتو الاتنين مضبوط لدرجة انى مش قادر احدد الحقيقة فىن .. بصراحة انتوا الاتنين زى اخو كو ما عنتوش تنفعونى انتو رخرين . أنا عايز دليل مادى ، دليل ملموس

ما يقبلش الشك . والحمد لله الدليل موجود . أنا قدامى نونو  
دى إذا ثبت انها مرات الأول يبقى نتخذ ضده الإجراءات ،  
وإذا ثبت انها مرات الثالث يبقى الإجراءات ح نتخذ ضدك  
انت ياسى ثانى وضد الثالث كان .. هاتوا نونو .

صفر : هاتوا نونو .

الدكتور : هما مين اللى ح يجيبوها يا صفر الأذى ؟ انت اللى تجيبها .

م . الثانى : يجيب مين يا دكتور ؟

الدكتور : نونو واللا نوال واللا ما عرفش بتسموها إيه .

م . الأول : ح يجيبها م البيت بقى واللا إيه ؟

الدكتور : م البيت ليه ؟ دى هنا .. دى كانت قدامى دلوقتى .. شوفها

يا صفر ورا البرافان .

م . الثانى : بس انا ما شفتهاش هنا .

الدكتور : ما شفتهاش ؟ أمال الست اللى صرخت ساعة ما شفتها ،

وقلت دى مش مراتى دى مرات الأول كانت مين ؟

م . الثانى : ست ؟ انا ما شفتش هنا ستات خالص .

الدكتور : هو الدور جاله واللا إيه ؟ يحق لك ما انت لازم خايف لاثبت

إنك انت الكذاب .

م . الثانى : أنا ما بييجينيش أدوار يا دكتور . ما كانش فيه ستات هنا

خالص .. انت شفت ستات هنا يا شاووش ( للعسكرى ) ؟

العسكرى : من ساعة ما حطيت رجلى هنيه .. ما شفتش حريم واصل .

الدكتور : ولا انت كنت معنا واصل . انت من ساعتها وانت فى

الصورة . واللا العسكرى اللى فى الصورة حتى كان معنا أكثر

منك . نونو كانت هيا والالا يا محمد يا أول :

م . الأول : نونو ؟ وإيه اللي يجيبها هنا يا دكتور ؟

الدكتور : دانا الظاهر وقعت في عيلة كلها نصابين . روح شوفها انت يا

صفر ، جايز راحت التواليت والالا في الصلاة .

صفر : أشوف مين يا سعادة البيه ؟

الدكتور : الست اللي كانت هنا يا وله .. اللي جاية مع الناس دول .

صفر : يا سعادة البيه ما كانش فيه هنا ستات .

الدكتور : يا بنى يا حبيبي يا روحى مش كانت فيه هنا ست قال عليها محمد

الأول ده انها مرات الثالث وانه كان من جنازه عايز يدبجها ،

وجت هي وقعدت تعيط وتقول أيوه حصل ؟ وبعدين جه

محمد الثاني ولما شافها قعد يشتم في الأول ويقول له يا نصاب

يا كداب دى مراتك انت ازاي تقول انها مرات اخويا

الثالث ، حصل ده كله والالا ما حصلش ؟

صفر : حصل .

الدكتور : الحمد لله . يبقى كان فيه هنا ست والالا .

صفر : أعدم حبابى عينيه ما شفت ستات في اللمة دى أبدا . هم

الثلاث رجاله دول والعسكرى ده ما في غيرهم .

الدكتور : اللهم طولك يا روح ، اللهم طولك يا روح . دول باينهم

اجتنوا كلهم . انت يا دكتور محمد يا لى مفروض إنك المجنون

فينا كلنا ، تسمح تقول لهم .

م . الثالث : أقول لهم إيه ؟

الدكتور : تقول لهم ع الست اللي قلت عليها مراتك ، واللى كنت عايز

تدبجها عشان مصاب بعقدة الفرخة .

م . الثالث : أيوه صحيح كنت عايز ادبجها .

الدكتور : كانت هنا واللا لا ؟

م . الثالث : لا ما كانتش هنا .

الدكتور : دي مش طريقة دي . انتو يتكلموا جد ؟ واديا صفر . انت

بتتكلم جد يا وله ؟

صفر : إي والله يا سعادة البيه ، إنشالله ما اوعى اروح لولادي ما كان

فيه ستات . هم التلاتة دول ما فيش غيرهم والعسكري ده .

الدكتور : يا ناس يا هوه .. أنا في عرض النبي . أبوس رجليكو ما

تجننونيش . بقى الست تبقى قدامنا كلنا وابقى مكلمها وانتو

مكلمينها ، وسامعها وانتو سامعينها ، وشايفها وانتو

شايفينها ، وبعدين تنكروا إنها كانت هنا خالص ؟ هدفكو إيه

من كده ؟ افرضوا انتو كل واحد خايف لا يطلع كذاب ومن

مصلحته انها ما تظهرش ، إنما صفر اللي معايا أنا مش معاكو ،

والعسكري ده اللي ع الحيا ، مصلحتهم إيه انهم ينكروا ؟

انتو حد مسلطكم على ؟ أنا عملت فيكو حاجة ؟ كان فيه

ست هنا .. مرات مين ما اعرفش . إنما المثل عندكو مش

بيقول خدو الحكمة من أفواه عيسى وموسى ومحمد ؟ كان هنا

ست . على الطلاق بالتلاته كان هنا ست . إنشالله انشل واللا

يجيني دجحة كان فيه هنا ست . ست ست نونو .. نونو ..

ست .. ست نونو .. ست نونو .

( ستار )

## الفصل الثاني

( نفس المنظر )

1 ( قبل رفع الستار ، والأصوات الصادرة من محطة سكة حديد مصر تكون أيضا الافتتاحية الموسيقية ، قبل الرفع وأثناء الرفع وحين تنحسر الستارة تماما ) .

الدكتور : ست .. نونو.. ست .. ست .. نونو .

نونو .. نونو .. نونو .. نونو ..

( ثم ينهار على المكتب ممسكا رأسه بيديه ، وكأنما يمنعه من

الانفجار ) .

( صمت ) .

صفر : ( مقتربا منه في تردد وإشفاق ) سعادة البيه .. سعادة البيه ..

الدكتور : ( يرفع بصره إليه ، محذقا فيه ، ولا يرد ) .

صفر : معلى ! خدها من راجل جاهل زى حالاتي ، إنما المثل عندكو

مش بيقول خدوا الحكمة من أفواه المجانين . كده تتعب

قوى .. وسعادتك زى حالاتي صاحب كوم . والبنى آدم ما

يستحملش ، ده زى الساعة اقلها هفوة « تك » يقف ، بس

الساعات ليها ساعاتية بيمسحوها ، إنما احنا إذا وقفنا ،

خلاص « تك » هي الوقفة .

الدكتور : أمال عايزني اعمل إيه يا صفر ؟

صفر : اضربها لا مؤاخذة صرمة ، شوحها من وراضهرك ، أجلها ،

ما كانش فيه ست ما كانش ، ح يجري إيه ؟

الدكتور : وأكذب عيني ؟ أكذب وداني ؟ أكذب مخي ؟ أكذب

الشمس طالعه في عز الضهر واقول لا مش طالعة ؟

صفر : بيحصل يا سعادة البيه ، بيحصل . أنا امبارح شفت أبويازي

مانا شايف سعادتك كده و كلمته وبست على إيده و حضنى  
وباسنى ، وابويا لا مؤاخذه ميت بقاله عشرين سنة واكثر .  
الدكتور : بس انت كنت نايم ، انا صاحى .

صفر : نايم مين يا سعادة البيه ؟ ده شوفان عينى عينك ، حقيقى  
واكترم الحقيقى ، إن كان فيه حاجة اكترم الحقيقى . لو حد  
ساعتها قال لى إنى نايم باحلم كنت لا مؤاخذه حطيت صباعى  
طلعت عينه من جوه . إنما آه صحتك يا بيه ، ولادك احنا فى  
رقابنا أكوام معلقة لو وقعنا تتفرط وتبعت وتضيع .

الدكتور : يا صفر انت مش معايا خالص . المسألة مش إنها كانت  
موجودة والا مش موجودة ، ما عنها ما اتوجدت ولا اتببت  
من أصله . المسألة أنا ، أنا عايز ارسى على بر . لو اتضح انها  
ما كانتش موجودة يبقى انا مخى لازم فيه حاجة وابقى أكيد  
حصل لى خلل ، ولو لقيتها واتضح انها كانت موجودة يبقى  
انتو كلكو مجانين .. كل الناس دى مجنونة ، وانا بس الوحيد  
العاقل المتمتع بكافة قواه العقلية . المسألة مش هزار ده يا كده  
وانا مجنون والدنيا عاقلة ، يا كده والناس كلها مجنونة وانا  
العاقل الوحيد . هى دى بسيطة ؟ أنا مش بدور عليها أنا بدور  
على نفسى ، أنا اتلخبطت خلاص وعايز حاجة واحدة بس  
اركز عليها علشان اعرف راسى من رجليه ، حاجة واحدة  
بس ابتدى منها . علشان كده لازم القاها لو قعدت ألف سنة  
ح افضل وراها ما ح اسيبهاش ..



صفر : ولما ما تلاقىهاش تنكد على نفسك وتنحر في روحك ، لما نخ  
البعيد البعيد يطق . سيبك منها خالص يا سعادة البيه وكأناها ما  
حصلت . اعمل أى حاجة تانية ، قوم سعادتك روح ، والا  
خش السينا لا مؤاخذة والا استحمى ..

الدكتور : ما اقدرش .. ما فياش مخ اعمل أى حاجة تانية .. بس والنبي  
يا صفر ، والنبي ، وحياء شرفك وشرف أبوك ، وحياء الكوم  
الى فى رقتك ، انت مش شايفها بعينك هنا ؟ معلىش ، جايز  
حد منهم غمزك فى السر علشان تنكر ، إنما انا والله مسامحك  
لو قلت الحقيقة . ومش أسامحك وبس ، إذا كانوا غمزوك  
بخمسين قرش منى أنا جنيه اهه علشان خاطر تقول لى  
الحقيقة .

صفر : ومن غير جنيه ولا حاجة يا بيه ، إذا كانت المسألة ح تتعب  
سيادتك كده أقول الحقيقة .

الدكتور : صحيح ؟

صفر : كلام شرف والله أقول الحق .

الدكتور : شفتها ؟

صفر : شفتها يا بيه ، شفتها .

الدكتور : طيب كانت لابسة إيه ؟

صفر : كانت لابسة لا مؤاخذة ، ملاية وستان احمر .

الدكتور : بس بس بس ، مش عيب تضحك على ؟ هو انا عيل يا صفر ؟

صفر

: أعمل ليه يا بيه ؟ .. أنا قلبى عليك .

الدكتور : هو انا عيل يا صفر ؟ هي حصلت ؟ بس ! اقف عندك ، ما تتحركش .

صفر : خير يا بيه .. فيه إيه ؟

الدكتور : من غير ما تتحرك لف بدماعك بس ، اعمل زي ما بقولك .

صفر : ( مستديرا برأسه ) أهوه يا بيه .

الدكتور : مين اللى قدامك دى ؟

صفر : واحدة ست يا بيه .. دى متلقحة هنا م الصبح مع الخلق اللى

مالين المكتب .

الدكتور : دى نونو يا وله ( يندفع ناحيتها ) نونو .

صفر : مضبوط يا سعادة البيه .. مضبوط .. هي دى مضبوط .

الدكتور : ( متوقفا ) طب اتلهي انت واسكت ، دى لو كانت راجل

برضه كنت قلت عليها مضبوط ، ( مقتربا منها ) انتي فين يا

ست نونو م الصبح .

السيدة : ( صورة طبق الأصل من نونو ولكن ملامحها تبدو أكبر

بعشرين عاما على الأقل ) .

( باستغراب حقيقي ) نونو مين يا حضرة ؟

الدكتور : انتي كان ح تنكري ؟ هي الناس جرى لها إيه ؟ يمكن فيه موجه

غبار ذرى فايته علينا . انتي يا ست مش كنتي أصغر من كده

بيجي عشرين سنة من ربع ساعة .

السيدة : من ربع ساعة كنت أصغر عشرين سنة ! انت البعيد تعبان من

حاجة ؟

الدكتور : يا ناس ! يا أول يا تاني يا ثالث يا عسكري تعالوا شوفوا .. دى

مش نونو ؟

( يقبلون فتظهر على وجوههم حين يقتربون علامة دهشة

كبرى ) .

م . الأول : نونو إيه يا دكتور ؟ .. دى أمنا .. نينا ( يناديها ) .

م . الثالث : ماما .

م . الثاني : دى ماما فعلا .

( يقتربون منها أكثر وأكثر بمزيج متباين من الانفعالات ) .

السيدة : يعنى لسة فاكرينى ؟ والله فيكو الخير .

الدكتور : ( مندفعاً ومفرقاً دائرتهم ) يا جماعة ما تجننوني . انتو مش

قتلوا ان امكم ماتت ؟

م . الأول : احنا قلنا انها ماتت ؟!

السيدة : إذا كانوا قالوا كده انا برضه مسامحاهم .

الدكتور : مش قتلوا أبو كومات ؟

م . الأول : أيوه .. أبونا مات صحيح ، بس ما قلناش ان امنا ماتت .

الدكتور : يا سيدة زينب ، يا سانتا تريزا ، خليكوا معانا .

م . الثاني : احنا مش قلنا لك انك ح تلفى وترجعى لنا ؟

الأم : أنا مش رجعالكم .. أنا جايه بس اطمئن على الثالث أنا اللي

عملتوه فيه انت واخوك ده عمره ما ح ينمحي .

م . الثاني : بقى احنا ننسى اللي عملتيه فينا ، وانتى ما تنسيش ؟

الأم : انتو تنسو عشان انا ما عملتش فيكو حاجة ، إنما أنا ، أنا

ودماغى اللى م الضرب لسه واجعانى أنسى ازاي ؟  
م . الأول : احنا ما طردنا كيش ، احنا خيرناكى فاخترتى انك ما تبانيش .  
الأم : احنا ح نرجع تانى ؟ أنا مش جايه عشان اقلب المواجع ، أنا  
جايه عشان خاطر ك انت يا حبيبى . مالك يا تالت ؟ مالك  
يا حبيبى ؟

م . الثالث : سؤالك ده مش متأخر شوية يا ماما ؟ كنت محتاجه قوى  
الأم : زمان ، دلوقتى بعد ما بقتش محتاجه جايه تسألينه .  
الأم : انت اتعديت منهم ؟

م . الثالث : يا ريتنى اتعديت ، على الأقل هم حاسين رغم كل اللى عملتية  
انك أمهم ، أنا مش حاسس ان لى أم ، سبتينا فى وقت انا  
عايزك وعايز أمومتك فيه ، ودلوقتى آدى انت اهه ، قدامى  
بمخى شايفك وعارف انك أمى ، بعينى شايف شيهى فيكى ،  
إنما بقلبى هنا مش حاسس . ده أفضع م اليتم ، يا ريتك متى ،  
انما تبقى عايشة وموجودة ومش حاسس انك أمى ، دا  
الفظيع .

الأم : ( متلفتة بيأس فى وجوه أبنائها ) يعنى غلطت انى جيت ؟

م . الثالث : لا .. غلطتى انك مشيتى .

الأم : وانا مشيت بخطرى ، إخوانك طردونى .

م . الأول : احنا ما طردنا كيش ، احنا خيرناكى انك تتمتعى بشبابك زى

ما كنتى بتقولى بجوزك وسبتينا .

الأم : وانا اجوزت إلا من عمايلكو فى ؟ هو الجواز حرام ؟

م . الأول : لما يبقى جواز تصرفي فيه مال أبونا على واحد غريب يبقى حرام . الفلوس اللي ضيع حياته وشرفه وكرامته عشانها ، حرام تصرف على جوز غريب . دا ابونا عمل ده كله عشاننا احنا ، فتحرمينا منه وتديه للأغراب ، أظن ما حدش يرضى بكده .

الأم : برضه لسه بتقول ان كان فيه فلوس .  
م . الأول : أمال راحت فين ؟ دانا بعيني دول بقيت اشوفه لما يقفل عليكو الباب ويطلع الرزمة من جيبيه يديهالك ، وتروحي انت محبياها في درج الدولاب بتاعك وقافله بالمفتاح . ولما مات وفتحنا الدرج ما لاقيناش فيه حاجة . أتبنك كنت بتنقلهم وما اعرفش تخبهم فين . وآخرتها جايبالنا تلتमित جنيه تقولى ده كل اللي حوشناه .

الأم : ولما اقعدا حلف لكم من هنا ليوم القيامة مش ح تصدقوا ، إنما دي الحقيقة .

م . الأول : واحنا كان هامننا فلوس ، احنا في ابونا اللي مات ، انقتل ، فيكى لما قتلته .

الأم : أنا يابني قتلته ؟ أمال ان ما كانش مات بالذبحه على إيديكم كنتو عملتوا إيه ؟

م . الثاني : وجت له الذبحه ليه ؟ مش لما ظبطوه ؟

الأم : عيب يابني ما تقولش كده على ابوك ، ظبطوه يعني إيه ؟ كان سارق ؟

م . الأول : يا ريته كان سارق . وعيب ليه ؟ وإذا كان ع الدكتور ،  
الدكتور ما بقاش غريب . يا دكتور أمنا دي فضلت تزن على  
ودان أبونا وتقول له الولاد ومستقبلهم وحتة أرضك اللي ما  
تفعلش لازم نعمل لهم حاجة . يقول لها طب اعمل إيه ؟  
الماهية يدوبها بتكفيننا . تقول له ما اعرفش ، أنا ماليش دعوة ،  
أنا ولادي ما يتسابوش كده لا يصين . يعمل إيه أبونا  
والفلوس محدودة والزن كتر ؟ بقى بيع أسئلة الامتحانات  
ويجب لأمي الفلوس . تسألوش منين ؟ ما حصلش . ولما  
قال لها وعرفت قالتلوش لا دا حرام ، لا دا عيب ، لادي  
جريمة ؟ أبدا ، العكس حصل ، بعد شهرين ثلاثة ابتدت  
تستشوي اللي يجيبه وتقول له ده على كده عايزين لنا خمسين  
سنة عقبال ما نحوش تمن بيت واللا حنة أرض . اضطر بيع  
لطلبة اكثر ، لغاية ما الحكاية اتعرفت وشكوا فيه . وثاني يوم  
كان ح يقبضوا عليه ، يومها رجع البيت نام ما قامشى ، تبقى  
موته والا لا يا دكتور ؟

الدكتور : وانا مالي يا سيدي في موته ، هو انا وكيل نيابة ح احقق القضية  
من أول وجديد ؟ أنا فيها هي ، طب كون انها تيجي هنا ممكن  
تفسيره .. راحت لكم البيت تسأل عليكم لفتكو هنا جت .  
أما كون انها صورة طبق الأصل من نونو ، وكون انها تتوجد  
مطرحها كأنها جنيه ، ده اللي ح يجننى .  
٢ . الثاني : اللي جننا أكثر انها كتمت ع الفلوس . يبقى ابونا استشهد

عشانها وعشان مستقبلنا ، فتأخذهم هي وتستولي عليهم  
ويتحولوا من ضمان لمستقبلنا لطعم يخللى الرجالة تجرى  
وراهها . شايف ضمان المستقبل ازاي ؟

الأم : انتو اللي انسعرتوا ونسيتوا ابوكم ونسيتوا اني أمكم ، وبقي  
همكم كله الفلوس . كل يوم تحقيق واستجواب ينتهي  
بضرب . يا تاني فاكر الكراسي والقباقيب ، فاكر الخنق ،  
ناسيين لما فضحتوني وخلتوني متهومة بالفلوس ؟ انتو  
بعمايلكم خليتو الناس تطمع في ويلفوا عليه عايزين  
يجوزوني .

م . الأول : احنا واللائتي اللي قبل ست اشهر ماتتو كنتي ابتدي يجيلك  
العرسان . لانتى جميلة ولا صغيرة ويجيلك العرسان ليه ؟  
كنتي عايزانا نقف نتفرج عليكى وانتي بتتزفى .. شبان زينا  
بشنيات يشوفوا الرجالة جايه عايزة تجوز امهم وعايزاهم  
يعملوا ايه ؟ يزغرتوها ؟ واللى حصل ايه ؟ آدى انت  
اجوزتى ، دخل عليكى انه عنده عمارة واجوزتية ، ومفيش  
سنة ابتدي يسحب منك فلوس ابونا ويصرفها على مزاجه أبو  
حشيشة ، فلوس مستقبلنا بيعترها على كيفه واحنا محرومين  
منها .

الأم : كذاب ، والله العظيم كذاب ، وحياة الطيب في نومته ما  
وصله من فلوس ابوكم ولا ملين .

م . الأول : أمال راحوا فين ؟

الأم : ما خدتوهم .  
م . الأول : التلميت جنيه ؟ أنا بكلم على اللي ما ظهروش .  
الأم : ولاح يظهروا أبدا ، ده كله من تخاريف مخك .. إيه اللي حط  
في دماغك انهم آلافات ؟ ما اعرفش . الراجل نفسه اللي  
اتجوزته كان راخر فاكر كده ، وعذبنى خمس سنين ووراني  
الويل عشان اظهرهم .. ولما في الآخر ما لقاش فيه فايده  
طلقتني . وبقي ولادي مش قابليني وامى ماتت وما عادليش  
حد على ظهر الدنيا . وما كانش قدامي إلا إني اقعد لو حدى ،  
وجريت بصيت لقيت بعد أسبوع نط على حرامى فاكر عندي  
الكنز ، اضطريت اجوز تانى ، جوز برضه فاهم ان عندي  
فلوس .. ده جحيم يا ناس اللي عشت فيه .. ده جهنم أرحم  
.. دانا اتعذبت عذاب لو كنت عملت السبع معاصى ما  
كنتش اتعذبت قده ، بقى اخلف وارنى واتعب واخدم واسهر  
واصحى م الفجر واقفة على رجلى ويتحرق دمي عشان يبقى  
جزائى ده كله ؟ ويعنى أذنبت فى إيه ؟ إني قلت لابوكو  
عايزين نضمن مستقبلكم ؟ لأنى بجبكم وبخاف عليكم قلت  
كده . أمال كنتو عايزيني اسكت ؟ ده انا لو رجعت الزمن تانى  
ح اعمل كده وما اقدرش اعمل إلا كده . أنا أم والأم دايما  
خايفة على ولادها . وانتو معذورين ، تعرفوا مين أيامها  
شعورى ؟ تفهموا مين إحساسى ؟ يمكن دلوقتى ، بعد ما  
خلفتوا تفهموني وتعذروني .



م . الثاني : مضبوط كلامك ، ابنك الأول بسم الله ما شاء الله خلف وفهمك تمام .

الأم : وانا تعبت وجيت ، واللى عايزين تعملوه فى اعملوه .  
اعتبروني خدامة ، دادة لعيالكم . اعتبروني كلبة مريبتها فى البيت إنما خلوني معاكو . أنا الدنيا ضاقت فى وشى وانتر قلوبكم باينها اتحجرت ما عادش قادرة ترجم . ( ثم بيأس قاتل ) يرضيك يا طيب اللى وصلت له ؟ يرجعليش يوم واحد بس من أيامك ؟

( يبلغ التأثير إلى حد أن يدمع الثلاثة بينما تنخرط الأم فى نهبة ، يأخذها م . الأول على صدره ويهدده عليها ) .

م . الأول : مين قال لك ان قلبنا اتحجر ؟ دا حنا اللى فاكرينك بعيننا واشتريتى الدنيا تعيشها زى مانتى عايزة .

م . الثالث : ياريت باعتنا .. الحقيقة انتى خنتينا يا ماما .. أفضع خيانة مش ان ست تخون جوزها . أفضع خيانة إن الأم تخون ولادها ، إنها وهم محتاجينها تفضل عليهم حد تانى . الزوج يمكن يغفر خيانة مراته ، إنما الولاد غصب عنهم ما يقدروش ، ده بيبقى عرق انقطع .

م . الأول : يتوصل تانى يا تالت معلىش .

م . الثالث : جاوز بالعقل ، بالشفقة يتوصل . إنما كله لحام صناعى ، أنا لا يمكن انسى إنها سابت البيت وأنا عيان وحرارتى أربعين وراقده فى السرير أنادى : يا ماما ، وهى سامعانى ولامه هدومها

وجوزها يقول لها شوفيه عايز إيه ؟ فتقول اهو عنده اخواته هو  
مش صغير . لحام صناعى .

م . الأول : مهما كان أحسن م البتر ، أحسن من ما فيش .  
الأم : أنا ما كنتش اعرف انك قاسى يا ثالث كده .

م . الثالث : أنا مش قاسى . أنا بتألم . أنا بعمل كده من ألى . أنا الأول

كنت اشوفك فأحس إنى شايف نفسى اللى بجها اكر من

نفسى .. شايف الإنسانة الوحيدة فى العالم اللى ما اعرفش هى

بتنتهى فىن وانا بابدأ منين ؟ الاتصال اللى بقيت أحس أنه أقوى

وأعظم وأروع حاجة فى الدنيا ، إن الدنيا من غيره عالم كئيب

غريب ماليش دعوة بيه . أشوف فى عينيكى عىنى أنا لما

بتشوف ، وفى وشك ملاح من كتر مانا عارفها وحابها

مانيش شايفها ما اقدرش اشوفها ، ما اعرفشى اشوفها لأنها

ملاعى أنا وملاحك وملاح الحياة وسر الحياة كلها مع بعض .

إنما راح دا كله ، انقطع ، بوحشية اتبتر ، مين المسئول ان أهم

جزء من روحى ينشف ويموت ؟ مين المسئول إنى مرة واحدة

افقد الونس وابقى وحيد فى عالم ماليش به أى اتصال ؟ انكسر

الكوبرى اللى بيوصلنى به وانتهى الخنان اللى كان بيربطنى

ويحمينى منه ويحميه منى . مين المسئول عن شعور التوحش

اللى انتابنى ؟ مين المسئول عن إنى باستمرار حاسس إنى مجروح

وإنى مطعون وإنى فقدت الأمان ؟ عمرى كله مستعد اضيعة

عشان استريح مرة واحدة بس وابص لك فيها فأحس انك

أمى .

الأم : يا حبيبي .. مهما قلت فمش ح اقدر أرد عليك ، كل اللي اقدر اقله ان العذاب اللي اتعذبت به .. يغفر لي أى حاجة في رأيكم عملتها انا وعملها ألف زى .

م . الثالث : أنا بقول مين المسئول ؟ لأن المسئولية كبيرة . مش انتى بس ، كلكم مسئولين . أنا إنا مسئول ، بس بيتها إلى أكثر حد مسئول هو الطريقة اللي بنعيش بيها ، لازم طريقتنا غلط ، لازم فيه طريقة أحسن للحياة ، لازم فيه طريقة تخللى الاخوات اخوات على طول ، وما تخليش أم تغدر بولادها ولا ولاد يتنكروا لأهلهم ، طريقة تنمى العواطف الحلوة دى مش تخربها وتحطمها وتخلينا نعيش . انت سايبانا اخوات ، وفاكره انك راجعنا زى ما سبتينا ! انت راجعنا واحنا خلاص ، ماسكين لبعض السكاكين . دى مش عيشة أبدا .. مستحيل .

( يتعالى صوت صفر كالنبه المفاجئ لتركز الأبصار عليه وتترك الركن الذى كانت فيه الأم ، لانعرف إن كان صفر قادما من الخارج أو أنه انتصب فجأة في مكانه زاعقا ) .

صفر : يا سعادة البيه . يا سعادة البيه .

الدكتور : مالك يا غراب البين فيه إيه ؟

صفر : فيه واحدة ست بره بتقول انها مدام محمد الأول .

م . الأول : مراتى !؟

الدكتور : إيه ؟ بتقول إيه ؟ مدام الأول ؟ طب مادي نونو اللي بندور عليها ، يامانت كريم يارب . أخيرا ظهرت نونو .. يامانت كريم يارب . ده بس عشان ما اجننش . أشكرك أشكرك يا سانت تريز . أشكرك يا سيدة زينب .

( تدخل الأم وقد صغرت عشرين عاما على الأقل )

الدكتور : يا ستي حرام عليكى .. احنا عينينا اتقلعت يا نونو هانم .. دا كان ناقص امشى فى الشارع أزعق عليكى زى الهبل والمجانين . رحتي فين ؟

م . الأول : لا مؤاخذه يا دكتور .. دى مراتى نوال .. ( ثم للسيدة ) إيه اللي خلاكى تسيبى البيت ؟ أنا مش قايلك ما تتقليش من جنب الولد دا سخن ممكن ياخذ التهاب رئوى على طول .  
( حين تحيل السيدة نظراتها فى الحاضرين تتوقف عند م . الثالث الذى يفاجأ بدخولها ولكنه يتصرف وكأنه لا يعرفها وغير ملق لها أى اهتمام ) .

الدكتور : نوال مين يا أستاذ ؟ دى نونو بعينها . انت ح توهنى عنها .  
م . الأول : يا دكتور عيب حد ح يتوه عن مراته ؟ دى ما تحصلش أبدا .

الدكتور : انتى نونو ، مش كده ؟

السيدة : نونو ؟ أنا ؟ ( تبادل هي ومحمد الثالث النظرات )

الدكتور : لا . أرجوكى . والنبي بلاش . أنا فى عرضك ( تسمع الموسيقى التصويرية لصوت خشب ينكسر ويطلق ) مهما كان السبب اللي ح تنكرى عشانه فانا أبدى ، نحى أبدى ،  
( المهزلة الأرضية )

حاسس به بيظقطع ، أهو ح يتهد أهه ، دانا غلبان وصاحب

كوم ( يكاد يخنق بالبكاء ) أنا حاسس به ح يطريق . أنا في

عرضكم يا ست الحقيه قبل ما يدشدش حتت انتى نونو . مش

كده ؟ طب ، على الأقل ، أمهم ، آه اللى كنتى هنا ، أمهم

والنبى يا نونو يا أمهم .

السيدة : أنا متأسفة قوى ، أنا لادى ولادى . ( ناظرة ناحية محمد

الثالث ) .

م . الأول : بقول لك دى نوال مراتى يا دكتور .

السيدة : برضه آسفة أنا مش نوال .

الدكتور : أمال مين ؟ أرجوكى ، المرة اللى فاتت وقلنا الأم ، يمكن تبقى

الأم شبه مرات ابنها باعتبار الابن فى أحيان كثيرة بيحب البنت

اللى شبه امه ويجوزها يمكن من غير ما يحس . إنما المره دى ،

أرجوكى ، انتى نونو .. آه والنبى نونو .

م . الأول : ما تنطقى يا زفت يا نوال وتقولى للدكتور انك مراتى

وتخلصينا .

السيدة : قلت لك أنا مش نوال ولا مراتك خالص ، ثم حتى لو كنت

بتكلم اللى اسمها نوال دى ، فما حدش بيكلم الستات

بالطريقة القليلة الذوق دى .

م . الأول : معلىش .. أنا لى تصريف معاكى اما نرجع البيت .

السيدة : بيت إيه ؟ هى تلاقيح ، قلت لك مانيش مراتك يا أخينا ،

بالعافية واللا إيه ؟

الدكتور : أمال قلتي إنك مرات محمد الأول ليه ؟  
السيدة : أيوه أنا جوزي اسمه محمد الأول ( تنظر ناحية محمد الثالث  
بنظرات ذات معنى ) .

الدكتور : طب ماده محمد الأول .  
السيدة : لا .. دكها واحد تاني خالص ، رآخر اسمه محمد الأول ، تبقى  
المسألة بسيطة قوى ، مجرد تشابه في الأسماء .

الدكتور : هو فيه محمد الأول تاني ؟ يا مخي ، بقى إذا خلصنا من محمد  
الأول يجي الثاني ، إذا خلصنا م الثاني يجي محمد الأول  
تاني . ومين عارف ، يمكن لسه فيه محمد الأول ثالث ،  
ومحمد الخامس سادس ، ولويس العاشر الحادي عشر . يا  
ألطاف الله ، يا مخي يا كبير ، والنبي انت الكبير ، أمال  
حضرتك عايزاني ليه إن شاء الله ؟

السيدة : أنا اللي عايزة ؟ .. الدكتور هو اللي عايزني .

الدكتور : دكتور مين ؟

السيدة : دكتور الصحة .. الله .. هو راح فين .. دا من ربع ساعة

مديني الحقنة وقال لي أجيله بعد الساعة اتناشر علشان آخذ

الشهادة .

الدكتور : مين اللي عمل ده كله ؟

السيدة : الدكتور مفتش الصحة .

الدكتور : عمله فين ؟

السيدة : هنا .

الدكتور : يا ستي حرام عليكى ، أنا شفتك من ربع ساعة واللا اربع ساعات ؟ أنا من الصبح هنا مع الجماعة دول لا شفتك ولا شفت غيرك .

السيدة : ما هو مش سيادتك ، ده الدكتور .

الدكتور : طب مانا الدكتور .

السيدة : لا .. دكها دكتور تانى صغير فى السن ومن غير نظارات .

الدكتور : يعنى انتى جيتى هنا ولقيتى دكتور تانى ادالك حقنة وقال لك

تعالى بعد ربع ساعة اديلك الشهادة ، هنا فى المكتب ده ؟

السيدة : هنا يا دكتور أيوه .. دانا حتى ماسبتش المكتب ، فضلت

قاعدة بره فى أودة الانتظار .

الدكتور : ( وقد انتابته حالة عصبية شديدة ) دى مؤامرة . حد بيتآمر

على مخى . دى عصابة منظمة . ده جهاز سرى ، مجرمين

مخربين جواسيس لصوص قطاع طرق . أنا مخى خلاص .

الحقوه . نار . ريحة شياط . طفوه . أنا خلاص ، خلاص ..

خلاص .

( ينهار على المكتب منكفيا بوجهه ) .

صفر : ( وهو يجرى ناحيته هو ومحمد الثانى ) هدى نفسك

يا دكتور ، هدى نفسك الله يجازى ولاد الحرام . حد حافظ

آية الكرسي يا جدعان يقرأها على دماغه . ما قلت لك ح

تتعب يا سعادة البيه وانت غلبان زى حالاتى صاحب كوم .

م . الثانى : سييه يستريح شوية وهو خ يفوق على طول .

- صفر : ( للسيدة ) إنما ما قتلش اوعى تكونى شفتى تمرجى تانى كان .
- م . الأول : ( مسرعا إلى حيث السيدة ) بقى حصلت إنك تتكربلى .
- السيدة : يا أستاذ أرجوك . إنت غلطان خالص ( تحادثه وهى تتبع م .
- الثالث بعينها ثم ترفع صوتها مخاطبة إياه ) ماتقول له يا دكتور
- تالت ، قول له انا مين .
- م . الثالث : ( بغير حماس ) دى طليقتى يا أول ، الطالبة اللي فى
- بكالوريوس زراعة ، زهرة . مش فاكرها واللا إيه ؟
- م . الأول : زهرة إيه بس ؟ حد يتوه عن مراته يا ناس ؟ هى نوال بعينها دى
- حاجة تلخفن العقل . يا نوال عيب .
- زهرة : ( وقد اقتربت من م . الثالث مخاطبة نفسها ) دا باينه مجنون
- الجدع ده . ( ثم لم ٣ ) أشكرك .
- م . الثالث : على إيه ؟
- زهرة : على إنك لسه ما نسيتهش .
- م . الثالث : العفو .. ( ثم بعد نظرة إليها ) أمال إيه حكاية مدام محمد
- الأول دى ؟
- زهرة : جوزى اسمه كده .
- م . الثالث : اجوزك .. انتى اجوزتى ؟
- زهرة : أمال يعنى كنت فاكر لما طلقتنى ح ابور ؟ دا الجواز بعد
- الطلاق ألد بكتير .
- م . الثالث : واتجوزتى مين بقى ؟
- زهرة : محمد الأول .



- م . الثالث : زميلك بتاع الكراسية ؟  
زهرة : أيوه زميلي بتاع الكراسية .  
م . الثالث : شفتى بقى ؟ يبقى أكيد كان بينكم حاجة .  
زهرة : بالعكس الحاجة اللي بينا كنت انت السبب فيها .  
م . الثالث : وحقنة إيه وشهادة إيه اللي جاية عشانهم ؟  
زهرة : تطعيم ضد الحمى الصفراء والجدرى .  
م . الثالث : ليه ؟  
زهرة : مانا مسافرة .  
م . الثالث : فين ؟  
زهرة : غانا ، رايحة المؤتمر الآسيوى الأفريقى .  
م . الثالث : عضوة واللا إيه ؟  
زهرة : لا فى السكرتارية ، الناس اللي كانوا بيشتغلوا هنا عايزينهم  
هناك عشان يساعدهم .  
م . الثالث : كويس والله . يعنى عايشة ؟  
زهرة : آمال كنت عايزنى انتحر .  
م . الثالث : تنتحرى ؟ عشان اطلقنا ؟  
زهرة : أنا فعلا فكرت مرة انتحر ، بس مش عشان طلقتنى .  
م . الثالث : آمال عشان إيه ؟  
زهرة : عشان كنت مجنونة .. كنت .. بحبك .  
م . الثالث : كده ؟  
زهرة : كده .

م . الثالث : انتو عندكو الحب إيه ؟ .. لب بتقزقزوه .

زهرة : على كل حال مش أنا اللي كنت بتسلى .

م . الثالث : أمال محمد الأول ده إيه ؟

زهرة : ما ميت مرة قلت لك كان جاي يجيب كراسة العملى . أنا لو

فيه حاجه ما كنت اقابله بره .. عمرك ما فهمتني أبدا .

م . الثالث : أنا كنت غبى فعلا .

زهرة : عمرك ما حسيت أبدا انى بجبك . انت كنت أول راجل فى

حياتى ، عبدتك عبادة ولما اطلقنا ضعت تهن . لولا جاني

محمد الأول وطول عمرى أحس انه أخويا . انت عارف

ماليش اخوات صبيان ، وعرف انى اطلقت بسببه وعرض على

الجواز .. كنت فى حاجه لأخ جنبى ، أخ بأى ثمن ، ولو

بتمن انى اعمل له زوجة .. ورضيت ، إنما انت لسه انت ،

الراجل اللي بصته بتخلينى أثنى قد كدهه ، أثنى ضعيفة خايفة

مستعدة أبوس التراب اللي يمشى عليه . انت مش عارف انت

عملت فى إيه ؟ أنا كنت بنت مراهقة عمية ، فى شهر

صحيتنى وفتحت لى باب عالم واسع جميل ، وكان أملى

وسعادتى انى ح اتفرج على كل حاجه فيه معاك ، إنما اتلفت

لقتك اختفيت من حياتى ، هربت .

م . الثالث : أنا ما هربتش ولا المسألة مسألة الكراس ، الحقيقة أنا بعد ما

عشت معاكى اكتشفت انك مش نوعى . أنا عايزه ست

ناضجة تريحنى وتجنبنى وتمتنعنى .. نفس اللي انتى عايزاه ..

احنا الاتنين عايزين ناخد ، عايزين حد يدي ..  
زهرة : أنا عايزاك زي ما انت ، وكنت مستعدة اعمل معجزات

عشان اغير نفسى وابقى الست اللي انت عايزها .  
م . الثالث : ما جراش حاجه ، لسه المستقبل طويل عريض قدامك ، ودي  
مجرد تجربة فاشلة .

زهرة : أنا عايزاك زي ما انت ، وكنت مستعدة اعمل معجزات  
بعدها ح القى للدنيا طعم .

م . الثالث : بتيها لك .

زهرة : أرجوك .. اديني فرصة تانية . أنا ما اجوزتوش لسه والاح  
اتجوزه . أنا بقول كده بس لأنى حاسه إن كرامتى مجروحة ..  
إنى منبوذة . أنا لسه كلى لك ، مستنياك ، عايزاك .

م . الثالث : أنا ما انفعكيش .. الحياة بالنسبة لك بتبتدى ، أنا بشطب .

زهرة : وانت ٢٩ سنة ؟

م . الثالث : اضربهم فى عدد المرات اللي كان عندى أمل فيها وخاب أملى .

أنا شيخ فى التسعة وعشرين ، لما اجوزتك كانت آخر محاولة

إنى أعيش سننى وعواطفى وجسمى ، محاولة نتيجتها انى

اكتشفت انى مسجون وانى عشان اعيش ده كله لازم احس

انى حر قبل ما احس انى شاب عايز حبيبه وأودة نوم ، طول

مامالياش فى الحياة طول مانا حاسس بالسجن ، فمالياش فى

الحياة ولا فى الأكل ولا فى أى متعة فى الدنيا .

زهرة : انت اللي ساجن نفسك ، وأنانيتك بتمنعك حتى انك تفتح

صدرك لحد تاني معاك . خدني معاك ، ومع بعض لازم ح  
نكسر السجن واللا على الأقل نحوله لعش وجنة .

م . الثالث : ما تقدر يش ، ما تستحمليش ، دا سجن فظيع .  
زهرة : بكرة تشوف بس خلينا نجرب . ادى نفسك واديني فرصة

أخيرة .  
م . الثالث : ما اقدرش اغامر وآخدك .. ويمكن أحبك وارتبط بيكي ،  
فلما يجي اليوم اللي تزهقي فيه وتسييني أطعن طعنة تخلص  
على ، أتدل ، وكل ما اتزلك أو أترجاكي ح تنفري أكثر  
واتلوي أنا م الألم .. أرجو كي خليني حر في سجن ، كثير  
على سجنين .

زهرة : يعني ما فيش فائدة خلاص ؟  
م . الثالث : ما تعيشيش نفسك في مأساة ، انا برضه اقدر اقول اني  
حبيتك ، إنما قسيت على نفسي ، وركزت إرادتي كلها في اني  
اقفل أى طاقة أمل ، خليت الفشل أمر واقع لا يمكن تغييره .  
اعملي انت رخره كده ، يمكن تتعبي شوية إنما ح تستريحى على  
طول .

( تنظر إليه طويلا ، ثم إلى الدكتور ، ثم إلى الجميع وتعود  
تلقى عليه نظرة خاطفة وتقول : جبان وتندفع خارجة في  
غضب ) .

الدكتور : ( وكأنها يفوق لنفسه ) هى راحت فين ؟

صفر : مشيت يا بيه .

الدكتور : وبتقولوا طلعت مين المرة دي ؟  
م . الثالث : دي زهرة اللي كنت متجوزها يا دكتور .  
الدكتور : هيه .. تطلع زى ما تطلع .. المسألة حرية .. كل واحد يطلع  
زى ما هو عايز . حتى انا راخر اطلع زى مانا عايز .. آمال  
امكم راحت فين هي رخرة ؟ والا إياك تطلع في دماغكو  
كالعادة وتقولوا انكو ما شوفتوهاش .  
( الثلاثة يتبادلون النظرات وهم يرمقون الطبيب في  
شك ) .

م . الثاني : شفناها ازاي بس يا دكتور ، مش ممكن نكون شفناها ، دي  
تبقى معجزة بقى .  
الدكتور : اسمع انت وهو .. معجزة ، ليلة قدر ، علم ، حلم ،  
شفتها .. والله العظيم شفتوها .. على الطلاق بالثلاثة  
شفتها وانا شفتها معاكو وكلمتوها وكلمتكم ، وان ما  
اتعدلتوا بقى لمرتكب جناية .  
( يمد يده ويخرج بالمسدس من درج المكتب ويضعه أمامه  
على المكتب ) .

م : الأول : يا دكتور سيادتك لازم تستريح ، انت مرهق شوية .  
الدكتور : أنا واللّا انتم ؟ دا انتم باينكم هربانين من مستشفى العباسية ..  
حتى أساميكم أسامى مجانين . إيه اللي محمد الأول ومحمد  
الثاني ومحمد الثالث ، وشركة مظبوتكس ومينا ماركة مينا  
والرصاصه اللي في المليون جابت انهيار عصبى ، ودوا يوفّر

سبعين مليون ، وأبوكو حرامى الامتحانات ، وأمكم اللى  
اتجوزت عشان متهومة بالفلوس ، والسكينة وعقدة الفرخة ،  
وانتم نهاركم مش فايت النهارده . هات التليفون .

( يجذب التليفون من الحاجز بين الغرفتين ) .

م . الأول : يا دكتور أرجوك هدى نفسك شوية .. أيوه شفناها شفناها .

الدكتور : شفتوها ما شفتهاش أنا اللى على لازم اعمله .

م . الثاني : وشرفى وشرف سيادتك شفناها ، وبالأمارة حضنتنا

وباستنا .

الدكتور : عشان تعرف بس انك أكبر كذاب .. أهوده ما حصلش .

م . الثالث : قصده ان احنا حضناها وبسناها .

الدكتور : وانت بالذات اللى بتقول كده ؟ نسيت انتى خنتينا يا ماما وانا

يتيم أمه عايشه ؟

( يتبادلون النظرات ) .

م . الأول : معلىش .. أصله .. ما انت سيادتك عارف .

م . الثالث : ( عن عمد ) الشمس .. الشمس تعباني قوى .

الدكتور : ولو .. والله لو قلت القمر راخر والمرخ والمشتري لمبلغ ..

آلو ..

( يضغط على آلة التليفون ليستحضر الخط ، ثم يدير رقما من

ثلاثة ) .

م . الثاني : يا دكتور احنا غلطنا فى إيه ؟ .. ما قلنا لسيادتك اننا شفناها .

الدكتور : شفتوها واللا بتقولوا كده وكده .

- م . الأول : حقيقى يا بيه حقيقى .
- الدكتور : طب قالت لكم إيه على جوزها الأولانى .
- م . الثانى : قالت انه كان باسطها خالص وخلاها تنسانا .
- الدكتور : حلاوتك .. آلو .. اسمع من فضلك .. احنا عايزين تيجولنا  
هنا حالا فى مكتب الصحة ومعاك قوة كافية .
- م . الثانى : يا دكتور .
- الدكتور : ( يشير له إشارة حاسمة أن يغلق فمه ) أنا مفتش الصحة ..  
الحنفية ؟ حنفية إيه ؟ دا انا ببلغ عن جناية .. انت مش بوليس  
النجدة .. حتى انت راخر طلع مطافى .. ( يضغط على ريشة  
التليفون ليلغى الخط ) متأسف .. ( ويدير رقما ثلاثيا  
آخر ) .
- م . الأول : بس مستحيل يا دكتور ، أمنا تعيش من تلات سنين .  
( متقدما ناحية الدكتور ) طب دقيقة واحدة يا دكتور ..  
دقيقة واحدة .. الطريقة دى مش أح تنفعنا ، انت سيادتك  
بتقول شفت امنا هنا واننا شفناها معاك .
- الدكتور : ده ما فيش ، من خمس دقائق بس .
- م . الأول : هنا فى المكتب ؟
- الدكتور : أمال يعنى فى المتحف .
- م . الأول : بس امنا ماتت .
- الدكتور : ماتت ؟
- م . الأول : بقول لسيادتك من تلات سنين .

- الدكتور : أمال مين اللي كنتوا بتتكلّموا معاها دي ، أمي ؟  
صفر : والللا يمكن أمي أنا .
- م . الثاني : وإذا كانت امنامات بقى من ثلاث سنين ، يبقى إيه الحل ؟  
الدكتور : انت كذاب .. يا صفر .. يا صفر الزفت .. كانوا بيكلموا  
مع واحدة والللا .
- صفر : واحدة بس — دول يجوا تلاته يا سعادة البيه .  
الدكتور : يا جدع الثانية دي ، مش كانت أمهم ؟  
صفر : أيوه امهم يا سعادة البيه .
- الدكتور : طب كانت لابسه إيه ؟  
صفر : لابسه خاتم يا سعادة البيه .
- الدكتور : ( لميم ٢ ) يا بنى يا حبيبي دي كانت جايه حتى عشان تعيش  
معاكم .
- م . الثاني : ياريتها جت يا دكتور ، دا جوزها الأخراني فضل وراها لما  
ماتت .
- الدكتور : ماتت؟! ماتت ودفنتوها يعني؟!  
م . الثاني : إلا دي . دا احنا بالأمانة مطلعين لها تصرّح الدفن من هنا .  
الدكتور : كده .. طيب .. تبقى وقعت يا بطل .. المسألة بسيطة ..  
هي ماتت بتاريخ إيه ؟
- م . الثاني : يوم وفاة النيل سنة ١٩٦٢ ، قصدي وفاء النيل .  
الدكتور : هات لي يا صفر دفتر الوفيات بتاع ١٩٦٢ .  
صفر : دو بيقوا في الإحصاء في الإدارة يا بيه .. ما عندناش إلا بتاع



السنة اللي فاتت بس ..

الدكتور : برضه بسيطه .. آدى قسم الإحصا .. ( يدير القرص خمسة أرقام ) آلو .. الإحصا .. صباح الخير .. أيوه .. إيه الذكاء ده كله ؟ .. برافو عليك .. طب اسمع بقى .. شوف لى دفتر وفيات ١٩٦٢ بتاعنا هنا .. قدامك عالمكتب ؟ .. دا ربنا مسهلها خالص .. طيب هات لنا يوم وفاء النيل اللي فى ١٨ أغسطس .. مش وفاء النيل فى ١٨ أغسطس برضه ؟ .. عظيم .. اقرا لى أسامى المتوفين .. غيره .. غيره .. لا .. واحدة ست .. ست .. اسمها إيه .. ( ناظرا لمحمد الأول ) .

م . الأول : كنانة محمد عيسى ..  
الدكتور : لا .. مش هى .. اللي بعده .. ما فيش ؟ إزاي الكلام ده .  
( محمد الثانى ) انت مش بيقول انها ماتت يوم ١٨ أغسطس ..

م . الثانى : أنا بقول يوم وفاء النيل ..  
الدكتور : بقى تفتكر وفاء النيل ولا تفتكرشى التاريخ ؟  
م . الثانى : أصل كان عطلة ، وقالوا لنا الدكتور بتاع هنا النهاردة أجازة وفاء النيل ، فرحنا مضيئا التصريح من مكتب الصحة اللي جنبكم ..

الدكتور : ( فى التليفون ) خليك معايا .. هو مش وفاء النيل يبقى يوم ١٨ أغسطس انت متأكد أمال ازاي مش موجوده ؟ .. طب

شوف لنا اليوم اللي قبله واللى بعده وخذ الاسم ايه .. كنانه  
محمد عيسى .. أيوه يا أخى قول كده امال .. الدفتر خلص  
إنما اليوم ما خلصشى .. والدفتر الثانى فى ؟ وحياتك ..  
معلش .. معاك اهو .. ( ثم مخاطباً م . الثانى ) تعرف .. لو  
طلعت انها مش متقيده فى دفتر الوفيات وما ماتش .. أقسم  
بشرفى لضاربكم بالنار انتو الثلاثة .. دا انتم تبقوا مش بنى  
آدمين خالص .. لا يمكن تكونوا بنى آدمين .. دا انا كل ما  
آجى أمسك حاجة أو أوصل لحاجه أبص الايكم  
بتزفلطوا . وشرفى لا ضربكم بالنار على طول .. ( يمسك  
المسدس وبسرعة يصوبه فى وجه م . الأول ) اتأخروا ورا  
لغاية ما تحصلوا الحيطه .. ياللا بسرعة انت وهو .. ( وحين  
يصلون الحائط ) وشك فى الحيطه منك له ، إيدك فوق  
دماغك بسرعة ..

م . الأول : يا دكتور مش طريقه دى ، احنا أذنبنا فى إيه ؟ هى جريمة إن

امنا ماتت ..

الدكتور : لما تكون ماتت زى ما بتقولوا وما تكنش متقيده فى دفتر

الوفيات ، مع انكم مطلعين التصريح من هنا تبقى مش

جريمة .. تبقى مأساة .. فاجعة مصيبة كبيرة .. تبقى لازم

يحصل للدنيا حاجه . يا الكون يخرب .. يا القيامة تقوم

( ثم للتليفون ) أيوه .. كنانة محمد عيسى .. الساعة خمسة

بعد الظهر .. سبب الوفاة شيخوخة بدون جنون ..

متشكرين جدا .. مع السلامة .. ( يضع السماعه ويضع

المسدس جانبا ) .

م . الأول : اتأكدت بقى سيادتك إنها ماتت ..

الدكتور : اتأكدت .. ويا ريتنى ما اتأكدت .. هو انا مشكلتى انها

ماتت والا ما ماتتش .. مصيبتى السوداء انها كانت هنا من

ربع ساعة .. منين ماتت من اربع سنين ومنين شايفها بعينه

هنا من ربع ساعة ؟

م . الثانى : يمكن مش هى يا دكتور .. ممكن سيادتك توصفها لنا كده ..

الدكتور : أوصف إيه بس .. ما هى صورة طبق الأصل من نونو وزهرة

اللى بتقولوا عليها .. كل اللى انا فاكرة إنى لمحت حسنة كبيرة فى

رقبتها ..

( يتبادل م الثانى وم الثالث النظرات فى دهشة شديدة ) .

م . الثالث : هى ماما كانت عندها حاجة زى كده .. أنا فاكر برضه ..

م . الأول : أمال .. قد القرش صاغ بالضبط .. فى رقتها فى يا دكتور ؟

الدكتور : ( مشيرا إلى جانب العنق الأيمن ) هنا هه .. ( بانزعاج

شديد متزايد ) .

م . الأول : تمام .. تمام .. يانهار منيل .. إزاي ده يحصل ؟ .. دا يقى

الدكتور شافها فعلا .. دا شغل أرواح بقى .. أعوذ بالله من

الشیطان الرجيم .. مسألة لا يمكن نسكت عليها .

الدكتور : ( يدق جرس التليفون ) آلو .. يا قسم الإحصا .. خير ..

أيوه .. أيوه .. أيوه .. بتقول إيه ؟ كنت بتقرا من دفتر غلط ؟

دفتر ٦٥ يعنى متقيدة الساعة ٥ يوم ١٨ أغسطس ١٩٦٥  
السنة اللى فاتت يعنى .. طب استنى دقيقة من فضلك ..  
( مخاطبا الأول ) هى أمكم ماتت السنة اللى فاتت واللا سنة  
١٩٦٢ ..

م . الأول : اللى فاتت ازاي يا دكتور .. ماتت سنة ٦٢ من ثلاث سنين .  
الدكتور : متأكد ..

م . الأول : إلا متأكد .. ما تقولوا له ، يا جماعة ساكتين ليه ؟

م . الثاني : دانا بنفسى اللى مبلغ عنها يا دكتور من ثلاث اربع سنين ..

م . الثالث : دى اتوفت قبل ما ينقبض على يا دكتور .. وانا ممسوك سنة  
٦٣ .

الدكتور : متأكدين يعنى ؟ ..

م ١-٢-٣: تمام التأكد .. زى ما احنا شايفين سيادتك كده .. دى ما

فيهاش أى كلام ..

الدكتور : ( مخاطبا التليفون ) انت متأكد يا درش انك بتقرا من دفتر

٦٥ ؟ راجع تانى .. مرة ثانية كان .. كان مرة تالته عشان

خاطرى .. كده ؟ .. طيب .. ( يضع السماعة ) .

الدكتور : بقى الأول تكون هنا وتقولوا أبدا ما كانتش دى ميتة ..

وبعدين تقولوا انها ماتت سنة ٦٢ .. وبعدين تلاقها متقيدة فى

نفس اليوم اللى قلتوا عليه بس سنة ٦٥ ( ثم فجأة بزعيق

هائل ) النجدة .. داشى اكثر من طاقتى .. النجدة لغاية هنا

وما اقدرشى .. الحقونا ، انجدونا يا بوليس النجدة .. يا ناس

( المهزلة الأرضية )

( يرفع السماعه ويطلب بوليس النجدة ) آلو .. ادوني

القائد .. القائد بنفسه .. أيوه .. أنا مفتش الصحة ..

الحقونا .. تعالوا لنا بسرعة ومعاكو قوه .. دا مش بلاغ

واحد .. دا كوم بلاغات وجنايات . أنا في عرضكم ( فاصل

موسيقى صوتي ) .

الحقونا ( يضع السماعه ) .

صفر : المدام يا سعادة البيه ..

الدكتور : مالها ؟

صفر : أدخلها لسيادتك ..

الدكتور : مدام مين ؟

صفر : المدام بتاعة سيادتك ..

الدكتور : المدام بتاعة سيادتي أنا ؟ إيه اللي يجيبها هنا يا أخينا ؟ دانا بقالي

عشر سنين في المكتب . ده عمرها ما دخلته ولا حتى كلمتني

بالتليفون فيه . أسألها كويس .. هي مين ؟ وعائزه إيه ؟

واصحي كده وفوق جتك البلي ..

صفر : ( مغمض العينين ) اللهم فوقك يا روح . أنا اللي افوق .

السيدة : ( من على الباب ) استنى عشان ادخل .. لازم كنت بتعمل

حاجة وعائز تحبها ..

الدكتور : حنيفة ؟ .. ( يدو عليه ذعر مفاجئ شديد وذهول ويتلع

ريقه من حلق جاف ) .

السيدة : الله .. مالك ؟ لازم فيه حاجة .. أنا قلبي يقول لي إن

( قهقهة خائفة )

فيه حاجة حصلت .. كان مين هنا يا باش تمرجى ؟

صفر : ما حدش يا سعادة .. يا مدام ..

الدكتور : ( لا يزال فى ذهوله يحدق فى حنيفة بطريقة غريبة ومن زوايا متعددة ويمز رأسه بشدة ) .

السيدة : الله .. مالك ؟ لازم فيه حاجة .. أنا قلبى يقول لى إيه ؟ إيه اللى حصل ؟ فى إيه غريب ؟ بتبصلى كده ليه ؟

الدكتور : أنا أصلى اتقرصت كام مرة .. ويتيهألى قرصة كمان ح تخلص على .. انتى حنيفة صحيح ؟ ..

حنيفة : (تندفع ناحيته) يا نهار اسود يا حكيم .. دا انت خارج الصبح

كويس .. إيه اللى جرالك ؟؟

مفاجأة كويسه تقوم تنكبس كده ولا كأنك شفت ..

الدكتور : بس ارجوكى .. خليكى كده .. استنى .. اقفى عندك كده

عشان اشوفك كويس ..

حنيفة : إيه الهزار البايخ بتاعك ده ؟ بقى انا جايه اعملك عزرائيل ..

الدكتور : عزرائيل اهون ..

حنيفة : أهون منى يا حكيم ؟ .. مش حاسيبالك دى .

الدكتور : أهون م اللى بيحصل النهارده ..

حنيفة : وإيه اللى حصل النهارده ؟

الدكتور : خيلنا فيكى الأول .. شكلها صوتها . دبتها على صدرها ..

الورم اللى فى شدقها .. مطرح قرصة الدبور . هى ما فيش

كلام ( وكأنا يرد على نفسه ) مادكهم كانوا برضه هم هم

ما فيش كلام .

حنيفة : ياداهية دقي .. يامصيتي .. يا خيبتك خيبة قوية يا حنيفة ..

حتشمتي فيكى العدو والحبيب .

الدكتور : مالك ..؟

حنيفة : مالك انت ؟ قاعد تكلم في روحك كده ليه ؟ عينيك زايفه

زى اللي قتل قتيل واللاظبطوه سارق غسيل كده ليه ؟ حصل

إيه قول لى .. في ثلاث اربع ساعات القاك كده ؟ ساينى

وانت فاطر وشارب شايك وقارى جرايدك وبعقلك تمام أربعة

وعشرين .. آجى ألاقك كده .

الدكتور : هو انا باين على إني مش طبيعي ؟

حنيفة : مش طبيعي وبس ؟ .. دا انت باين عليك انك خلاص ..

وصلت ..

الدكتور : لا .. اطمنى أنا كويس .. بس حصلت حاجات كده ح ابقى

اقولها لك بعدين ..

حنيفة : أمال بتسألنى وكأنتك شاكك انى حنيفة ليه ؟

الدكتور : والحقيقة لسه شاكك .

حنيفة : الحقونى بكباية ميه ( فى شبه ولولة ) .

( صفر يسرع ليحضر الماء )

الدكتور : أرجو كى يا حنيفة .. اركزى امال .. عمايلك دى بتلخبطنى

أكثر .. أنا عايزك تساعدينى مش تلخبطينى ..

حنيفة : حاضر .. أساعدك قوى ( لنفسها ) هو انا ح اخلص من امه

واخوانه .. ح يقولوا فضلت وراه لما جنته .. أساعدك يا  
خويا يا حبيبي .. أساعدك .. ( تقترب منه ) .

الدكتور : خليكى عندك ..

حنيفة : حاضر .. وعيب يعنى انى جيت ؟ عيب انى أعمل لك -  
سربريز - مفاجأة ؟

الدكتور : أبدا لا عيب ولا حرام ولا حاجة .. بس أصلى كويس واعرف  
انك لا بتاعة هزار ولا سربريزات فلازم فيه سبب جد ..

حنيفة : بقول لك ما فيش .. أنا كنت هنا عند واحد بتاع سجاجيد  
قالولى انه عنده حاجات لقط تجنن ، لما جيت ولقيته قافل ..

ولقيت نفسى قريية قلت أفوت عليك ..

الدكتور : تفوتى فوتان ؟ من غير سبب ؟

حنيفة : سربريز بقول لك ..

الدكتور : يعنى ما نتيش عايزه فلوس ؟

حنيفة : لا ..

الدكتور : ما فيش حدم العيال تعبان ؟ ..

حنيفة : كلهم فى المدرسة زى البمب ..

الدكتور : ما افتكرتيش عملة نسييتى تأنينى عليها امبارح فجايه تحاسينى

زى عوايدك قبل ما يفوت عليها ٢٤ ساعة وتنسيها ؟

حنيفة : لا ..

الدكتور : يعنى بجد وحق وحق جايه كده لله فى الله .

حنيفة : يمكن مش لله فى الله قوى .. يمكن اشتقت لك يا سيدى وجايه



اشوفك ..  
الدكتور : أنا بكلم جد .. تحلفيلي بأغلى يمين عندك وشرف باباكي انك

ماتنى جايه لسبب محدد ؟ ..

حنيفة : وشرف بابايا مانا جايه لأى سبب خالص ..

الدكتور : ( بزعيق ) تبقى مش حنيفة مرأتى .. تبقى منهم .

حنيفة : منهم مين يا حبيبي ؟ اسم الله عليك ..

الدكتور : م اللي بيروحوا ويتغيروا ويجوا دول .. ماللى ح يجنى انى مش

عارف ان كانوا جننوني فعلا واللا لسه حيجننوني ..

حنيفة : اخص عليك انت عايز تخضنى واللا إيه ؟ بلاش الهزار ده

وحياتك أنا ما احبش كده ..

الدكتور : هزار إيه ؟ أنا ما بهزرش . أنا جد خالص .. أنا ستين جد ..

أنا مفيش بعد كده جد ..

حنيفة : بقى ده جزائى انى جاية ابسطك ؟ ..

الدكتور : وانا ذنبى إيه انه يطلع النهارده بالذات انك تعملى عمله عمرك

ما عملتها ؟

( يعطس بشدة فتخرج حنيفة منديلها الصغير وتمسح له

وجهه وعينه )

حنيفة : كله من الهباب الشغل .. عمرك ما بترحم نفسك .

الدكتور : بلاش نخرج بره الموضوع .. خلىنا فيكى .. أرجوكى ساعدينى ..

حنيفة : أساعدك يا حبيبي .. أساعدك يا ضنايا يا روح قلبى ( تقبله

قبلة خاطفة على جانب فمه )

الدكتور : مش دى المساعدة اللي انا عايزها .. اللي اسألك عليه جاوبيني ودغرى .. انت حنيفة مراتى .. مش كده ؟

حنيفة : مراتك وحببتك وخدامتك .. حنيفة اللي انت جوزها وراجلها واللى من غيرك ما تسواش بصلة .

الدكتور : أهوده الكلام اللي يرعب .. ما نتيش لاقيه غير اليوم المهيب ده تبوسيني وتدلعيني فيه ؟ .. دانتي ما بستنيش من أيام حرب

السويس .. دى حاجه تمخول يا ناس .. اسمعى .. إذا كنتى

حنيفة مراتى فقوليلي النهارده الصبح حصل إيه قبل ما اخرج

على طول ؟ ..

حنيفة : ما حصلش حاجة والحمد لله .. إيه ؟

الدكتور : يوهوه .. وانا بززر زرار الجاكنه حصل إيه ؟

حنيفة : اتقطع وركبتهولك ..

الدكتور : وانتي بتركييه حصل إيه ؟

حنيفة : يا ناس ح اتجنن .. حصل إيه بأه ؟ الأولاد وقعوا سلم

المطبخ ؟

الدكتور : لالا .. حصل بينى وبينك إيه ؟

حنيفة : ح يكون حصل إيه يعنى ؟ دانا على قرافيسى بركب لك الزرار

وانت واقف .. يعنى لا تطولنى ولا اطولك ..

الدكتور : أمال كنا ساعتها بنعمل إيه ؟

حنيفة : كنا بنعمل إيه ؟ كنا بنكلم ..

الدكتور : ( متهدا بارتياح ) الحمد لله .. كنا بنكلم .. دى مش حاجه

حصلت دى .. فاكراه كنا بنكلم فى إيه ؟

حنيفة : إلا فاكراه ؟ طبعا فاكراه . ودى حاجه تنسى ؟ كنت بطلب

منك فلوس الشهر .

الدكتور : ما حصلش . مش ده الموضوع اللى كنا بنتكلم فيه .

حنيفة : آه .. افكرت .. كنا بنتكلم ع البهدلة اللى بهدلتها لك مرات

اخوك ليلة العزومه .

الدكتور : حنيفه .. مش ده الموضوع .. حنيفه .. الحكااية مش

هزار .. حنيفه .. افكرى كويس .

حنيفة : ( مرتبكة ارتباكا شديدا ) يمكن .. يمكن .. كنا بنتكلم فى ..

فى إيه بس يارى .. آه .. هو ده معقول نكلم كلام فارغ زى

ده ع الصبح .. أيوه يا اخى .. افكرت .. فى اللى عملته البت

الشغالة . لا . مش كده . اسمها إيه دى .

الدكتور : ( بصوت غريب ) اسمها إيه دى مين ؟

حنيفة : ( بيأس ) اسمها إيه دى .

الدكتور : انتى تعرفى نونو ؟

حنيفة : نونو إيه يا حكيم ؟ اسم الله على مخك .. نونو دى إيه . انت

بتخرف ؟

الدكتور : والللا تكونيش انتى رخره جايه عايزه دكتور غيرى ..

تكونيش رايحه باندونج .. تقربيش لزهره ؟ تعرفيش امهم

كتمت ع الفلوس فىن ؟ .. إنتى بعنى اسئلة الامتحانات ؟

حنيفة : ( ترقع بالصوت ) الحقونى .. حكيم اجتن .

الدكتور : ( بهدوء مشحون ) يا صفر .. طلع الوليه دى بره .. ما  
عادش ناقص الا مراتى .. انت يا صفر احذفها م الشباك ..  
حطها مع الحقن واغليها فى الغلاية .. بخرها فى المبخرة .. مش  
عارفه كنا بتكلم فى إيه وعائزه تبقى مراتى ؟. على مين الكلام  
ده ؟.. على حكيم ؟.. ده ما تخلقش اللى يضحك عليه ..  
بره .

حنيفة صفر : حكيم .  
الدكتور : لا انت حنيفة ولا انا حكيم ولا حد حاجه .. امسكوها ..  
دى منهم .. دليل مادي ايه .. اقبضوا عليها — كمموها  
لحسن تعض ..

( ستار )

الدكتور : ( بهدوء مشحون ) يا صفر .. طلع الوليه دى بره .. ما  
عادش ناقص الا مراتى .. انت يا صفر احذفها م الشباك ..  
حطها مع الحقن واغليها فى الغلاية .. بخرها فى المبخرة .. مش  
عارفه كنا بتكلم فى إيه وعائزه تبقى مراتى ؟. على مين الكلام  
ده ؟.. على حكيم ؟.. ده ما تخلقش اللى يضحك عليه ..  
بره .

## الفصل الثالث

الدكتور ... : حنيفه قال ، حتى انتى يا حنيفه ؟ اللعنة توصل لى انا راخر فى عقر دارى .

صفر : ( قادم من الخارج ) بوليس النجدة وصل يا سعادة البيه .

الدكتور : بوليس النجدة ! أنا فى عرض النجدة . الحقونى يا ناس ، انجدونى ، أنا غلبان صاحب كوم .

صفر : ( متتحيا جانبا ومنحنيا فى ترحاب عدة مرات )

اتفضلوا ، اتفضلوا . أهلا وسهلا ( يدخل شخصان

أحدهما يبدو فى الخمسين من عمره طويل القامة على

ملامحه وهيئته طابع موظفى الحكومة الذى تستطيع تميزه

لأول وهلة . والآخر رجل قمىء جدا قصير جدا نحيف

جدا يبدو كصبي فى الخامسة عشرة ، بل من الممكن أن

يقوم بالدور ودون ماكياج صبي فى الخامسة عشرة

يرتدى جلبابا غير نظيف به رقعة ، وطاقيه صوف ،

ويبدو كالفنانين أو كأصحاب الرسالات ، شديد العبط

شديد الذكاء ، له شخصية متميزة )

الدكتور : إيه دول يا صفر ، أمال فىن بوليس النجدة .؟

الرجل الطويل : ما احنا النجدة يا دكتور ..

الدكتور : انتو النجدة ؟ انتوا بوليس النجدة ؟ يا ناس في عرضكم بلاش هزار بقى .. الحكاية باخت قوى . أنا عايز النجدة تنقذنى ، تخلصنى ، أنا روى بتطلع قدامى ، أنا بفلفص .  
النجدة !

العجوز : احنا النجدة يا دكتور .. احنا اللي حانجلك .. احنا جهة الاختصاص .

الدكتور : انتوا جهة الاختصاص ؟ انتوا يعنى اللي استنجد بيكو بوليس النجدة علشان تنجدونى ؟ يا ناس موش كده ، و حياة الشمس والأرض والقمر الصناعى . و حياة فستك وتيتان ولايكا . ده حرام حرام قوى ، أحرم حرام .  
انجدونى يا ناس !

العجوز : يا دكتور احنا بالضبط اللي حانجلك .

الدكتور : ليه بقى ؟ حانكونوا مين يعنى ؟ أولياء أمور الجماعة دول ؟ حانكون ابوهم حضرتك ؟

العجوز : لا ، أنا جدهم قارون ، وابوهم محمد الطيب دهه .

الدكتور : كده ؟ انت جدهم ، وده ابوهم . هايل قوى ! وبوليس النجدة لازم حول لكم الإشارة على جبانة الإمام ..

قارون : على حوشنا فى باب الوزير وانت الصادق ، نعمل إيه ؟ جانا بعض وتننا جاين .

الدكتور : ألف حمد الله ع السلامة . برافو عليكم ! أهو كده الشهامة والا بلاش . هو ناقص إيه غير كده ؟ ما عادش ناقص إلا

التخريف بقى . ما عايش إلا إن الدنيا تسبح على الآخرة  
وبوليس النجدة يستنجد بالأموات لإنقاذ الأحياء . ومين  
عارف ؟ يمكن انا راخر اقدر اخطف رجلى دلوقتى وازور  
خالتى ملاك .. والا نعزم المرحوم أبو شيحا على أكلة  
فسيخ . آخر حلاوة !

قارون : لما حاتفكر بالطريقة دى ح تتعب يا دكتور .  
الدكتور : أمال عايزنى افكر حضرتك ازاي ؟ وحياة اللى عاشوا لك  
تقول لى وانا مستعد انفذ بالحرف الواحد .

قارون : ( ببساطة ) يا أخى ، بشوية خيال لا أكثر ولا أقل . أمال  
زبنا ادالنا القدرة على التخيل ليه ؟ علشان المواقف اللى  
بالشكل ده . الإنسان عنده قدره على الخيال ما لهاش  
حدود ، ما بيستعملهاش ليه ؟ ليه تصر على ان كل حاجة  
لازم تكون خاضعة لمواصفات الواقع الضيق بتاعكو ،  
بمبعض انكم لازم تشموها وتلمسوها علشان تصدقوها ؟  
بشوية خيال ممكن نعمل أى حاجة .. تقيم الجنة على  
الأرض ، وتصحى الموتى وتموت الأحياء ، وتعمل أى  
حاجة انت عايزها . جالنا الخبر ان الأولاد تعبانين وانك  
لايصر معاهم . غريبة انا نتطوع ونيجى علشان نريحك  
ونريحهم ؟ لا غريبة ولا حاجة ، بس المسألة إيه؟ شوية  
خيال . صعبة دى ؟

الدكتور : أبدا ، أبدا أبدا . غبى مين اللى يقول انها صعبة ؟ حمار مين

الى ما يقبلهاش ؟ صحيح ، ليه لا ؟ دى حاجة جميلة جدا .  
حلوة خالص . وليه لأصحيح ؟ واشمعى يعنى أنا الى حا  
افضل حابس روحى جوه المنطق وكل حاجة عماله  
بتحصل براه ؟ إذا كانت الدنيا كلها بقت ماشيه كده  
أعصلج أنا ليه ؟ الله ! أما جحش صحيح . حا يخس على  
إيه ؟ ما امشى معاهم واللى يحصل يحصل ؟ حا اتجنن ؟ أجنن  
أحسن ما افضل أنا الى تعبان من العقل لوحدى . يا ألف  
أهلا وسهلا ، دا انتو شرفتونا خالص . خطوة عزيزة ..  
تعال يا أول وتانى وتالت .. تعالوا سلموا على ابوكم والمحترم  
الفاضل جدكم .

م . الأول : انت بتقول فيها يا دكتور ؟ على الأقل انا متأكد ان ده أبونا .  
هى بالظبط صورته اللى فى أودة الصالون يوم ما اترقى  
مفتش .

م . الثانى : موش باين عليهم النصب . لا ، ده حتى الواحد دمه حن .  
م الثالث : طيب ده ياريت يكونوا هم .. ده يبقى فرصة ، دا احنا بينا  
حساب طويل لازم نصفيه .

الطيب : بس مهما تقولوا أنا ميت غضبان عليكم . إزاي يا واد يا  
أول انت يقولوك أبوك ييموت فمايهونش عليك تسب  
البت السنكوحه اللى كانت معاك فى الدكان ؟ وانت يا تانى  
تروح تلعب باسكت يا وله إزاي من تانى يوم ؟ إزاي ده  
يحصل ده ؟ هو انتو كتنو أولاد حرام ؟



الدكتور : بقى دى النجدة اللي جاين تنجدوها لى ؟

قارون : عندك حق يا دكتور ، ده موش وقته يا واد يا طيب .. لا مؤاخذه يا دكتور احنا تحت أمرك .. احنا جاين ننفذ كل اللي انت عايزه . تحب نعمل لك إيه ؟

الدكتور : ما هي الحكاية يا حضرة الفاضل انى موش عارف أنا عايزكو تعملوا إيه ؟ ده النجدة اللي انا عايزها .. عايزها علشان مجرد انكم تقولولى أعمل إيه ؟

قارون : قبل ما نقول لك موش تقول لنا بس الموضوع إيه ؟ تابعك إيه ، مضايقتك إيه ؟ هدى نفسك خالص وخذ راحتك وقول لنا .. إيه بالضبط مضايقتك ؟

الدكتور : ما هو يا ريتنى عارف اللي مضايقتنى . يا ريت اعرف الحكاية إيه ؟

الطبيب : ما الحكاية باينه يا دكتور . الولاد بتوعنا يعنى باين مضايقتك .. أصل عيلتنا دى ..

الدكتور : عيلتكم دى ؟ هي دى عيلة ؟ دى موش عيلة ، دى عالم ، عالم كده زى عالمنا مالوش لا صاحب ولا نظام ولا منطق . أقول إيه بس ؟ يا ريتها حقيقة تايهة اللي بادور عليها . يا ريته جاني فى ناحية ومجنى عليه فى ناحية تانية . يا ريت اعرف أنا فين ، وعايز أوصل لإيه ؟ ده انا حتى موش واقف .. دا انا واقع ، واقع فى جب مسكون . دا انتم باينكم موش من جنس البشر خالص . انتو فيكو حاجة كده ما بتنتميش للككرة الأرضية ..

حاجة إبليسية ، شيطانية ، كأننا اتقلنا لعالم سفلى ، علوى ما اعرفش . موش دى الدنيا اللى باعرفها ، ولا دول الناس اللى عايشين فيها أبدا . أنا بصراحة كده ما ليش دعوة بيكم خالص .. أنا كل اللى عايزه دلوقت انى أنقذ نفسى قبل ما اضيع .. أنا خايف اكون ضعت . أنا فى عرضكم ، انقذونى .

قارون : ننقذك بس ازاي ؟ تحب نخرجك بره الموضوع خالص ؟

الدكتور : تبقى عايز تجننى .. تبقى عايز انسعر واجرى أعض الناس . ما

لو كانت المسألة على الموظف اللى فى ما كان زمانه خد إجراؤه واستريح من زمان . إنما المصيبة الكبرى فى البنى آدم ، فى

الطبيعة البشرية المهيبة المتركة فينا ، اللى عمرها ما بتبتدى

حاجة إلا لازم تنهيا . اللى عمرها ما بتعرف جزء إلا لما يموت

— وأحيانا بتموت فعلا — علشان تعرف الكل . إنقاذى إنى

موش اخرج بره الموضوع ، إنقاذى الوحيد انكم تغرقونى فى

أكثر وأكثر لغاية ما اعرف الحقيقة فىن .

قارون : وهو انت بس اللى عايز تعرف الحقيقة ؟ ما احنا روخرين

عايزين . دى الدنيا كلها بيتها لى عايزه .

الطبيب : والحقيقة موش حاتخرج عن الأوضه دى أبدا .. الحقيقة هنا .

الدكتور : هنا ازاي ؟ أنا فى عرضك دلنى عليها .

الطبيب : هنا فينا .. احنا المشكلة واحنا اللى خلقناها ، والحقيقة يا فينا

يا فى حد فينا . والحمد لله كلنا موجودين .

الدكتور : وإيه فائدة وجودنا ؟ إيه فائدة الحقيقة تبقى جوانا ؟ دى كأنها جوه محيط نطلعها ازاي ؟ نعثر عليها فى وسط الغابات والصحارى والأحراش . هى جوانا مشكلة ، المشكلة نطلعها ازاي ؟ المشكلة ازاي يتحول الناس من صناديق متسنكر عليها باقفال لفتارين قزاز ما تخبيش حاجة أبدا ؟ نعملها ازاي دى ، بشوية خيال زى ما بتقول ؟

قارون : لا ، بالعقل .. بالذكاء .

الدكتور : استعملناه .. والنتيجة انها كانت بتوه أكثر .

قارون : بالصدق .

الدكتور : طيب خيال وقلنا نقدر عليه .. عقل وذكاء قادرين . إنما

الصدق ده ترغم عليه الناس إزاي .

قارون : موش بالإرغام ، بالرضا .

الدكتور : والناس ترضى تصدق إزاي ؟ عايزهم أنبياء وأولياء ؟ الناس

موش كده .. الناس بنى آدمين طول ما هم فى الدنيا . آخر

حاجة يعترفوا بيها الحقيقة ، يمكن فى الآخرة بس يقولوا

الصدق .

قارون : خلاص ، نوديهم الآخرة .

الدكتور : نموتهم يعنى ؟ والله حل معقول .

قارون : لا ، نعمل نفس اللى بيحصل فى الآخرة .

الدكتور : تحاسبهم ؟ هو انت استغفر الله العظيم ربنا ؟

قارون : لا ، نخليهم هم يحاسبوا نفسهم .. يحاكموا أرواحهم .

( المهزلة الأرضية )

الدكتور : ما تقول كده وتخلصنا .. نحاكمهم يعنى . وعائزهم يقولوا

الصدق فى المحاكمة ؟ .. دى المحاكم هى المقر الرسمى للكذب .

قارون : ده علشان المحاكمة بتنتهى بعقاب .. احنا محاكمتنا ما فيهاش

عقاب .

الدكتور : يعنى محاكمة ما نعاقش حد بعدها .. تبقى محاكمة إيه دى ؟

يقتى فايدتها إيه ؟

قارون : فايدتها كبيرة أكبر من فايدة أى محاكمة عادية .. انت فى المحاكم

العادية بتحاكم علشان تمسك لك فى الآخر واحد والا اتنين

وتعاقبهم سواء وصلت للحقيقة الأكيدة أو ما وصلتهاش . أنهمو

أحسن ، انك تعمل كده ، والا تضحى بعقاب واحد والا

اتنين وتوصل للحقيقة كاملة ؟

الدكتور : يعنى انت متأكد اننا لو خليناها من غير عقاب حا يقولوا

الصدق ؟

قارون : وهو الناس بيمنعها من قول الصدق إلا الخوف من العقاب ؟

نشيله ؛ يصدقوا على طول . يا لابلأش تضيع وقت نشكل

المحاكمة .

الدكتور : بس انا لسه ما اقتنعش .

قارون : التجربة حا تقنعك . انت موش عائزنا ننجدك ؟ خلينا

نجرّب .

الدكتور : أمرى إلى الله . ما هو ياريت قدامى حل تانى .

قارون : خلاص .. احنا كلنا حاضرين ، كل الأطراف موجودة .

- الطيب : كلنا موجودين .
- الدكتور : بس للأسف ناقص أهم طرف في الموضوع .
- قارون : مين ؟
- الدكتور : نونو .
- قارون : نونو دي مين ؟
- الدكتور : الدليل المادى الوحيد فى القضية كلها . دليل للأسف كان هنا  
هه فى إيدي ، وكنت خلاص بكلمة منها عرفت الحقيقة  
دغرى . إنما اختفت ، دابت ، تلاشت ، عماله تتجسد لى فى  
ألف مليون شكل وشكل . إلا نونو .
- قارون : خلاص ، نستدعيها .
- الدكتور : ببساطة كده ؟ طيب ده لو قدرتوا تستدعوها لآح يبقى فيه  
داعى لمحاكمة ولا صدق ولا دياولو . كلمة منها الحقيقة تبان  
على طول .
- قارون : ده ما اتخلقش لسه البنى آدم اللى كلمة منه تخلى الحقيقة تبان .
- الدكتور : تطلع مين نونو دي ؟
- الدكتور : مالو عرفناها اتحل الإشكال .
- قارون : خلاص .. لما نحتاجها نستدعيها .
- الدكتور : يبقى اعمل معروف هاتها ! ولو إني متأكد إن ما فيش قوة فى  
الدنيا تقدر تجيبها .
- قارون : إذا كان على الجيبان نقدر ، بس نعمل اللى علينا الأول وبعدين  
إذا عجزنا نستدعيها . دى زى ما بتقول معجزة ، والواحد

قبل ما يطلب المعجزة يعمل الأول كل اللي في استطاعته ،  
وبعدين يطلب . يبقى في الحالة دي يستاهلها ، إنما احنا  
دلوقت ما عملناش اللي يستاهل معجزات .  
الدكتور : ما عملنا لما طلعت حبابي عينا .. نتعب نفسينا تاني ليه ؟ ما  
تجيبوها ونخلص .

قارون : افرض يا سيدى ما قدرناش نجيبها يبقى خلاص نفلس  
ونسكت ؟ افرض يا سيدى انها اختفت خالص ، ماتت ،  
انتهت ، يبقى الحقيقة تموت رخره ؟ احنا نشتغل على إنها موش  
موجودة نهائيا ، وما فيش حتى أى أمل في وجودها .

الدكتور : آمال انا من الصبح كنت باهيب إيه ؟  
قارون : انت من الصبح كنت لوحدك فغرقت .. دلوقت احنا نتعاون  
واحنا كثير . ما حانقرقش ، حانقب ، وتقب الحقيقة معانا .  
الدكتور : إيدى على كتفك يا سيدى .. إيدى على كتفك .

قارون : خلاص نشكل المحكمة . أنا بصفتى أكبركم سنا حانقبى  
القاضى ، وانت يا دكتور لك صفة الضبطية القضائية فتبقى  
المدعى العام . وعائزين حاجب ، نخلى الجدع ده .. اسمك  
صفر ، موش كده ؟ نخليك الحاجب . موافق يا دكتور ؟

الدكتور : موافق .  
قارون : موافق يا صفر ؟

صفر : لا ، موش موافق .  
قارون : حانديلك شلن .

- صفر : وليه الإسراف ده كله يا كابتن .
- قارون : معلهش ، أصلى فى حالة كرم شديد . موافق ؟
- صفر : لا . موش موافق .
- قارون : الله ! ليه ؟
- صفر : قاعدين تقولوا محكمة تانية وحساب تانى .. بالطريقة دى تبقوا عملتوا إيه ؟ طيب ما طول عمر الكبير قاضى ، وطول عمر المفتش مدعى عام ، وطول عمر الساعى حاجب . يبقى ما عملناش حاجة أبدا .. تبقى المحكمة العادية ما فيش أى فرق .
- إذا كنتوا عايزين تقلبوها صحيح ، إذا كنتوا عايزينها جد بقى ، أبقى أنا القاضى .
- قارون : انت القاضى ! انت اتهيلت ؟
- صفر : ليه ؟ وعيها إيه أكون القاضى ؟ انتو موش عايزين تقلبوها .
- قارون : واحد جاهل زيك يبقى القاضى ؟ مستحيل .
- صفر : ما هو يا تقلبوها وتبقى محكمة تانية ، يا تحولوها لمحكمة باب الخلق وتخلصوا .
- الدكتور : فعلا ، إذا كنا عايزين نقلبها صحيح ، يبقى صفر يعمل القاضى . أنا موافق .
- قارون : طيب والمدعى العام . مين يبقى المدعى العام ؟
- صفر : أنا برضه .
- قارون : تبقى القاضى والمدعى العام ؟
- صفر : وعلشان خاطر ك والحاجب كان من عندى .

قارون : عايز تبقى الكل في الكل ؟  
صفر : وماله ؟ ما انتو رخرين كنتوا الكل في الكل .  
الدكتور : تبقى احلوت قوى قوى ، وبقت تستاهل الفرجة . أنا موافق .

( صفر يصعد إلى حيث مكتب الدكتور ليجلس عليه )

قارون : استنى يا أخينا . احنا لسه وافقنا ؟  
الدكتور : ما هو ضرورى توافقوا .. انتو موش جاين تنجدونى وتعملوا  
الى انا عايزه ؟ أنا عايز كده .

قارون : بس ترضى ان صفر يبقى الكل في الكل ؟  
الدكتور : موش عشان أوصل للحقيقة ؟ أرضى قوى . من أجل  
الحقيقة فلتحكم بيننا الأصفار .

قارون : يا دكتور .  
الطيب : معلش بقى يا .. يا قارون .. نجربه ، وإذا مانفعلش نغيره .

قارون : آه يا عبيط ؟ هو لو اتلايم على الكرسي ده وقعد عليه فيه قوة في  
الأرض حا تقدر تقلقله ؟ أمرنا الله . احكم وحاكم يا صفر .  
صفر : أيوه ، دلوقتى حاتشوفوا العدل الى عمركم ما شفتوه . حا

تشوفوا الحقيقة الى قاعدين تدوروا عليها وهى قدامكم  
خايفين تبصوا لها . حاتشوفوا صفر الى طول عمركم  
مستصغرينه حا يعمل إيه . محكمة ( يقو لها بصوت  
الحاجب ) ( يقف الجميع أو يعتدلون احتراماً فيتقدم صفر  
في وقار شديد ويجلس إلى المكتب واضعاً في كبرياء ساقا فوق



ساق ) جلوس . اقعدوا . ( ثم مقلدا صوت القاضي ) نادى

على المتهم الأول ( ثم مقلدا صوت الحاجب ) المتهم الأول ( ثم

للمجموعة بارتباك ) إلا بالمناسبة هو مين المتهم الأول ؟

قارون : بتسألنا احنا ؟ انت موش الكل فى الكل . اعرفه بقى ياسى كل  
فى الكل .

صفر : تبقى انت المتهم الأول .

قارون : أنا ؟ ..

صفر : أيوه ، انت أنسب واحد يبقى المتهم الأول .

قارون : علشان إيه ؟ دا انا جاى انجد أبقي متهم ؟

صفر : انت موش جاى تنجد ، انت جاى تحوم حوالين الجريمة اللي  
ارتكبتها .

قارون : أنا ارتكبت جريمة ؟

صفر : أكبر جريمة ، أكبر من جريمة سيدنا آدم يا سيدنا قارون .

قارون : ليه ، عملت إيه .؟

صفر : انت اللي ابتديت المصيبة دى كلها .

قارون : أنا ؟ ابتديتها إزاي ؟ أنت بتخرف تقول إيه .

صفر : من فضلك ما تطولش لسانك على عدالة المحكمة ، ماذا وإلا

أهفك حكم باربعة وعشرين ساعة حبس على طول . اتعدل

بقى واتوزن واحترم نفسك .

قارون : الله ! أمال إيه اللي قاعد تقوله ده ؟ مصيبة إيه اللي ابتديتها .

صفر : انت اللي ورثتهم الأرض . حصل والا ما حصلش ؟

- قارون : وانا بانكر ؟ أيوه حصل . ورثتهم الأرض صحيح ، بس مالي  
أنا ومال المأساة اللي عاشوا فيها ؟ أنا قلت لهم اتخانقوا عليها ؟
- صفر : أنا ما قلتش ، إنما الأرض قالت .
- قارون : هي الأرض بتقول اتخانقوا على ؟
- صفر : أيوه ، الأرض ما عندهاش إلا كلمة واحدة بس طول عمرها  
قاعدة تقولها للناس .. اتخانقوا على . زي ريحة الكباب ما  
بتحرك فينا الجوع ، الأرض بتحرك فينا الطمع .
- م . الثاني : اسمح لي يا عم صفر .
- صفر : أنا لا عمك ولا انا صفر ، قلنا احنا عدالة المحكمة . ما هو كل  
واحد يحترم نفسه يا ما فيش محكمة ولا قضية ولا حل ..  
نفضها بقى وكل واحد يروح بيتهم .
- م . الأول : أنا عندي نفضها أحسن .
- الدكتور : تفضوها ؟ اسمعوا ، احنا موش بنلعب . احنا اتفقنا على صفر  
القاضى يعنى خلاص اتفقنا .. واوعو تكونوا فاهمين اننا اتفقنا  
على كده هزار ولا علشان سواد عيونه .. دا حنا عملنا كده  
غصب عننا . دا انتم جاينين وجايين لي قضية قعدتم تتطاحنوا  
عليها سنين ما انتوش قادرين تحلوها ، ولا ابوكم قدر يحلها ولا  
جدكم ده ولا حد من عيلتكم ، وجيت انا أحلها فغرقت  
معاكم . يعنى بصراحة كده ما عادش قدامنا كلنا إلا صفر ده ،  
فعايزين تطفولنا آخر شمعة أمل ؟ ده اللي حايته تجرأ ويعمل كده  
حا اطفى أنا حياته . حا اضربه بالنار ، فى المليون ، وموش

باهوش . ده انا يا اعمل كده يا حا اضيع بقى حضراتكم  
جاين تجننوني بحكايتكم المقنذلة دي ، وبعدين لما نيحي نرسي  
ليها على بر نبقي نفضها أحسن ؟ يا أخى ده إيه ده ، ده بعدك  
انت وهو . أنا قبل ما مخي يروح هدر وديني أضيعكم كلكم  
ويايا . صفر القاضى والمدعى العام والكل فى الكل ، وح  
نسيبه يسأل ويبحث زى ما هو عايز .. واللى عنده كلمة  
يقولها ، واللى ما عندوش يخرس . وانا واقف هنا ( متاولا  
المسدس ) أضمن تنفيذ ده كله .. دي موش استغماية بنلعبها  
مع بعض .. دي أرواح ناس وشقى ناس وعقول ناس ومصير  
ناس . كفاية بقى اللى عملتوه . سيونا نفك اللى عقدتوه .  
مفهوم كلامى ، حد له اعتراض ؟ ( صمت تام ) خلاص ..  
كمل يا سيادة القاضى .

صفر : ( مستجمعا نفسه ) أيوه ، إحم ، هيه ( ثم لميم الثانى ) كنت

بتقول إيه يا شاطر ؟

م . الثانى : ( متطلعا إلى وجوههم ) ( ثم كأنه قد وافق الدكتور على  
رأيه ) عندك حق يا دكتور .. ما قدمناش إلا كده . ( ثم مغيرا  
لهجته ) وعمى — قصدى عدالة المحكمة — والله والله عندها  
حق ، جدنا قارون ده هو السبب . دول موش ٣٠٠ فدان اللى  
سايهم دول ٣٠٠ مصيبة ورثها ولادك وولاد ولادك .  
المحكمة والله عندها حق .. انت عارف يوم موتك عملوا إيه ؟  
من قبل ما يدفنوك والله ، فى الصوان ضربوا بعض على

تقسيمها . ومن ليلتها اتقسمت العيلة أحزاب وابتدوا يشتروا سلاح ونزلوا في بعض حرب . ليه ؟ هو عمى الطاهر موش مات قتيل بسببها ؟ عمى الطائب أبو مهرة وخدم وحشم موش خد سنة في السجن على الأسفلت علشان شهد زور ؟ احنا موش نشأنا لقينا لينا ولاد عمام عمرنا ما سمعنا عنهم لأن من صغرنا وهم بيحذرونا من عمامنا وولادهم وكأنهم صهاينة ؟ أبونا الطيب ده اللي كان هو واخواته بيضربوا بيهم المثل في الحب .. موش مات مخاصمهم ومخاصمينه وما حدش فيهم مشى في جنازته ؟ انت تعرف أرضك دى عليها كام قضية ؟ لغاية دلوقتي ٧٥ كلها مرفوعة وحياتك من أخ على اخوه . ومن ابن على أبوه ، ومن أب على أولاده .. ولسه احنا في جرايرها . ده موش مال قارون اللي ورثناه ولا أرضه ، دى لعنة قارون . روح يا شيخ إلهي ينتقم منك .

قارون : اسمعوا ، سفالة موش عايز . أنا ذنبي إيه ؟ انتم فاكرين اني

كنت باعمل الأرض علشانكم .؟

صفر : أمال علشان مين كنت بتعملها ؟

قارون : دول ما كانوش في بالي خالص إني أورثهم أو أسيب لهم

الأرض . ده انا حتى كنت متغاض انهم حا ياخدوها من

بعدي .. أنا كنت باعملها علشان مزاجي .

صفر : علشان مزاجك ؟

قارون : أيوه مزاجي أمال إيه ، هوايتي ، موهبتي ؟ أنا واحد من الناس

الى يقولوا عليهم عندهم موهبة جمع الثروة ، موش علسان  
تؤول لده أو ده .. إنما علسانها هي نفسها . كانت متعتي  
مزاجي اني احط القرش على القرش والسهم على السهم يعملوا  
ربع قيراط . ما استريحشى إلا اما يصحح وما ارضاش بيه أبدا  
واحد ، ولا ارضى بالجنيه جنيه واحد . ما ارضاش بأى  
واحد أبدا ، ما استريحش إلا اما اشوفه قدام عيني بقى اتنين .  
أنا كده ، فنى كده ، موهبتى كده ، الفلوس موش زى ما هي  
عندكم وسيلة .. الفلوس غاية . الجنيه قيمته انه جنيه وانه إذا  
أضيف له تسعة وتسعين يبقى ١٠٠ جنيه . تصور ١٠٠  
جنيه . الله ! حتى نطقها حلو ١٠٠ جنيه . المتعة الكبرى  
موش اني آكل واشرب واتفسح ، المتعة اني اشوف الفلوس  
وهي بتكثر ، والأرض وهي بتوسع . المتعة اني ماشى ماشى  
وانا حاسس إني ماشى فى أرضى .. المتعة اني أفضل اعد فى  
جنيهات .. جنيهات ١٠٠ و ٢٠٠ و ٣٠٠ و ٩٠٠ و ١٠٠٠  
جنيه . جربها مرة انك تعد ألف ورقة وتحس إن كل ورقة بجنيه  
وانها كلها بتاعتك ! دى متعة الدنيا الحقيقية .. متعة تخليك  
ماشى حافى جعان عريان موش هامك . لأنك زى أى عالم  
كبير واهب نفسك لمتعة أكبر .

٢ . الثاني : واظن ده بقى الى خلاك تطلع بالفايظ ، وتشوى الناس الغلابة  
الى كانوا بيروحوا يستلفوا منك ؟  
قارون : ما حصلش ، ده تشنيع المنافسين بتوعى زى تشنيعهم على أى

راجل محترم أو ملو هدومه .. ده ما حصلش ، مع إن شغلنا  
دى زى أى شغلة تانية فيها الكويس وفيها الوحش . إنما ان  
شخصيا عمرى ما دخلت على فلوسى جنيه واحد حرام ،  
اموش لأنى كريم الخلق ، إنما لأنى ما كنتش اقدر أضم لفلوسى  
جنيه واحد ما ربيتوش وتعبت فيه من أيام ما كان قرش .

م . الثانى : خلىنا معاك انك كنت بتتمتع بس . ذنب أولادك وأحفادك إيه  
إنهم يدفعوا ثمن المتعة دى ؟

قارون : هم الغلطانين .. أنا موش غلطان . ده الواحد بيتلقف ان ابوه  
يسيب له فدان ، أنا سبت لهم ٣٠٠ فدان . جريمة دى ؟

صفر : من جهة جريمة ، فهى جريمة .  
قارون : ليه ؟ ليه ، ليه بس ؟

صفر : لأنى لما ابص ألاقى نفسى وارث فلوس وأرض ما تعبتش فيها ،  
باخذ على طعم المال الحرام ، باخذ على الحلاوة من غير نار .  
بيعزق فيها واصرفها بهوس لأنى ما تعبتش فيها ، وتكون  
النتيجة انها تخلص . والداهية بقا بعد ما تخلص باكون انا رآخر  
خلصت ، خدت على الفلوس اللى من غير شقا وعرق وبقى  
كل تفكيرى علشان اجيبها انى اجيبها من طريق سهل ، من على  
تراييزة قمار والا اختلاس وتزوير والا حتى قطع الطريق  
والسطو .

قارون : جايز مضبوط اللى بتقوله ، بس برضه أنا مالى ؟ أنا ما كنتش  
اقدر اعمل إلا كده . والا كنت عايزنى اعمل إيه ؟ أوهبها

لغيرهم ؟ موش هم أولى من الغريب ؟

صفر : لا ، كنا عايزينك بدل ما كنت قاعد تربي في فلوسك وتكترهم ، تربي بالمرة ولادك .

قارون : وإذا كان ربنا خلقني أعرف اربي الفلوس إنما ما اعرفش اربي الولاد ، أععمل إيه ؟

صفر : كنت ما تخلفش . ما دام موش قادر تربيهم تخلف ليه ؟ مين بقى أولى منك بتربيتهم ، بقى تربي الأرض وتسيبها لا ولاد موش متربيين ؟

قارون : آمال كنتم عايزين ده كله ما يحصلش ، لا انا اعمل الأرض ولا هم يتخانقوا عليها ؟ ما الدنيا كده .

صفر : لا ، عايزين نعملها دنيا برضه ، بس عايش عليها بنى آدمين . بنى إيه ؟ بنى آدمين . فهمت دى رخره والا ما فهمتهاش ؟

قارون : ما فهمتهاش .

صفر : يا أخى عنك ما فهمتها .. المتهم الثاني ( ثم مقلدا صوت الحاجب ) المتهم الثاني . محمد الطيب محمد قارون .

الطيب : موجود .

صفر : انت يا حاج ، انت موش حاجج برضه ؟

الطيب : الحمد لله . عقبالك .

صفر : يبقى عندك ثلاث تهم ، آخرها انك حجيت .

الطيب : انت حاتكفر والا إيه ؟ هو الحج تهمة ؟

صفر : في حالتك تهمة .. غش .. تزوير ، ه ستنى غسل من فوق

وش البرميل ، والباقي زفت .

الطيب : وأنا عملت كده ؟

صفر : وازفت من كده . بقى يا راجل . ٥٠ سنة عشتهم على ظهر

الدنيا تقضى منهم ٣٠ سنة تحارب فى اخواتك ؟ وانت برضه

ماسك لى سبحة ونازل تسبيح ؟ ٥ فدادين جم غلط فى نايلك

تتمسك بيهم لدرجة الكفاح المسلح بالنايت والبنادق ،

لدرجة انك تبيع معظم أرضك علشان تصرف على القضايا

والمعارك ليه ؟

الطيب : ما تظلمنيش ارجوك . أنا كنت طول المدة بادافع عن نفسى ،

فأنا مجنى عليه . ليش ؟ ليه ايقظت ربه

صفر : ومين يا سيدى الجانى ؟

الطيب : اخواتى .

صفر : تبقى برضه انت الجانى .

الطيب : بقى انا يا اللي بادافع عن نفسى تساوينى مع واحد عايز

ينهنى . المسألة موش حته أرض بتتخانو عليها .. المسألة حقى

الى لما اشوف أى حد بيعتدى عليه لازم أوقفه عند حده .

صفر : المسألة عايزة الدخول فى الغويط شوية . رد على يا دكتور

تالت ، يا ابنه .

الطيب : أمال أبقى راجل ملو هدومي واسيب حد ياخذ أرضى ؟ أى

حد ، عمى والا خالى والا اخويا ابن امى وابويا ؟ دى أرضى

يا ناس هى حقى ، وحقى هوانا ، هو كيانى وكرامتى



وشرفى .. أى تفريط فيه كأنى بافرط فيهم .

م . الثالث : بس إيه رأيك يا بابا ان أحياناً بتكون الرجولة بين الاخوات

انك تفوت ؟ انك تسبب أخوك اللى عاميه الغضب والطمع

يعتدى عليك وياخد ساعتها اللى هو عايزه ، بدل ما تقف له

وتغضب انت راخر وترد على الطمع بجشع يزود غضبه .

أصله موش غريمك ، ده أخوك . ما تسكتش ليه وتسيبه يعمل

اللى هو عايزه ؟ تأكد تمام انك بعد شوية حا تلقاه فاق وحس

انك عاملته ساعة غضبه وعماه كأخ ، فتتيقظ الأخوة فيه ،

ويجى لك عينه مرغرغه بالدموع وندمان . بيتها لى يا بابا ان

الأخ هو الشخص اللى تعامله كأخ تحت أى ظرف ، بالذات

فى الظروف اللى هو ما يكونش طبيعى فيها .. لأنك إذا ساعتها

عاملته كخصم حا ينقلب عليك خصم على طول . بيتها لى يا

بابا ، بيتها لى كده ، ان الأخوة موش دم ولا قرابة .. الأخوة

معاملة . لو عاملت أى حد فى الدنيا كأنك بتعامل اخوك على

طول حا يصبح اخوك . ولو عاملت اخوك زى الغريب على

طول حا ينقلب خصم وغريب .

الطيب : وليه أبقى انا البادى على طول ؟ ليه ما يكونش هو البادى .

م . الثالث : لأنك أخوه .

الطيب : طيب ما هو راخر اخويا .

م . الثالث : ما هى الجدعنة فى الأخوة اللى يسبق ويتديها .

صفر : خدوا الحكمة من أفواه المجانين صحيح . أدى التهمة الأولى .

الطيب : والتهمة الثانية ؟  
صفر : مغلش ، المحكمة نسيها . ( لفتش الصحة ) لا مؤاخذة يا  
الطيب : سعادة البية ، قول له عليها .  
الدكتور : أقول له إيه ؟ دي موش تهمة ، دي نكتة ، دي مهزلة ، دي  
كارثة . بقى يا راجل بعد ما تقعد ٣٠ سنة فاشل كأخ ما  
تستفيدش من الدرس اللي حصل بينك وبين اخواتك على  
الإطلاق ؟ تعيش طول عمرك محروم من اخواتك ؟ وبعدين  
تيجى تكرر نفس الغلطة مع اولادك .. نفس الغلطة .

الطيب : نفس الغلطة ازاي يا دكتور ؟  
الدكتور : هو اللي حصل بينك وبين اخواتك سببه إيه ؟  
الطيب : سببه ضلالهم وخراب ذمتهم .  
الدكتور : ( مقاطعا ) سببه إيه ؟ على إيه الخناقة دارت ؟  
الطيب : على الأرض اللي سابها ابو نا . بس دول ..  
الدكتور : ( مقاطعا ) وانت سبت لاولادك إيه ؟  
الطيب : قصدك الفلوس يعنى ؟  
الدكتور : بالضبط قصدى الفلوس . بدال ما يتخانقوا على الأرض ،  
بقت الخناقة على إيه ؟ على الفلوس .  
الطيب : كلام إيه اللي بتقوله ده ؟ هو انا عملت إلا اللي بيعمله الأبها  
فى كل زمان ومكان . أيوه سبت لهم فلوس وكان لازم اسيب  
لهم حاجة . الله ! ما الدنيا ماشيه كده . الناس دي كلها  
بتشتغل ليه ومكهربة ليه وبتحوش ليه وبتأمن على حياتها ليه ؟

موش علشان خاطر يسيبوا اولادهم حاجة ؟ تبقى الدنيا دى  
كلها غلطانة يعنى ؟ وانتم بقى مش تحاكمونى انا لوحدى . ده  
فى العالم على الأقل ٥٠٠ مليون أب لازم تحاكموهم معايا .  
دى موش تهمة ولا نكتة . ده قانون .

صفر : الحقنا يا تالت رد على ابوك .  
م . الثالث : هو قطعاً عنده حق . لا هو أول واحد عمل كده ولا آخر  
واحد . وله زى ما بيقول ٥٠٠ مليون شريك فى الجريمة . إنما  
نقول إيه نقول الحياة ماشيه غلط يقولوا علينا مجانين . نقول  
الدنيا كلها عايزة تتغير يقولوا ده لازم يروح المورستان . برضه  
موش عارف أرد عليك ، واقول لك واقول للخمسيت  
مليون اللى معاك إيه يا بابا ؟ أقول بدال ما تسيبوا لنا فلوس  
نتخانى عليها ونهدل بعض سيبوا لنا كلمة حلوة نتعلمها  
ونقدمها للناس . سيبوا لنا خبرة تنفعنا ، تجربة ، درس ، سيبوا  
لنا قيمة زرعتوها فىنا أبسط قيمة ، حتى الأخوة . ضرورة ان  
الواحد لازم يكون له أخ . القيمة اللى اتحرمت منها يا بابا كنت  
علمها لنا .

الطيب : وانا كنت نبي يا ابني علشان دوننا عن بقية الناس أعمل حاجة  
ما بيعملهاش حد أبدا ؟ إنما اقول لك إيه بس ؟ يمكن ما  
تصدقش إنما ورحمة ابويا قارون ده حصل . قبل ما اموت  
بيجى خمس دقائق ، لما انكتم نفسى وحسيت انى حالا حا  
اموت وانا يا دوبك باتشاهد على روحى ، فى ثانية ما اعرفش  
( المهزلة الأرضية )

من إيه يمكن من الرعب ، مرت حياتي كلها قدام عيني ، وانتو  
بالذات مریتوا ، من يوم ما تولدتوا لغاية ما كبرتوا . وحسيت  
وانا شايفكو فایتين اني حزين .. حزن جامد قوى لو حده  
يموت ويطلع الروح . موش حزين على نفسي اني حيا موت  
حزين عليكم انتو .. حزن ما اعرفتلوش سبب ساعتها ، إنما  
بيتهيا لي اني دلوقت بس عرفت . دلوقت وانا شايفك يا تالت  
يا ابني بتتكلم ويتقول حاجات وأفكار عمرها ما خطرت لي  
على بال . دلوقت بس حسيت اني كنت باعاملكم كأنكم  
حاجة أنا صاحبها ، كأنكم ملكي ، كنت ماللكم موش  
ابوكم . فرق كبير بين اني ابقى أبو ولادي وبين اني ابقى  
ماللكهم والا صاحبهم . الأبوة موش حق مقدس ، ده  
واجب .. مضبوط واجب . الأبوة باللي بيعمله الأب  
ويستحق عليه لقب أب . أنا كنت كأني صاحب حق خايف  
لضيع منه ، خايف لتروحوا مني والناس تنهبكم ، فكنت عايز  
اعمل لكم سور أرض والا سور فلوس علشان تفضلوا حتى  
بعد ما اموت ولادي أنا . عايز ملكيتي انها تمتد حتى بعد موتي .  
أنانية .. أبشع أنواع الأنانية اللي بتسموها أبوة دي . أنانية  
بقت قانون علشان غيره لازم زي ما بتقول يا تالت يا ابني غير  
نظام الكون . فمين بقى اللي يقدر يغير نظام الكون ؟ البركة  
فيكو بقى والا في ولادكم لأن باين ان انتو روبرين طالعين لنا  
وزيكوزينا ضحية أوضاع ما حد خد رأيكم فيها .

صفر : قربنا شوية يا دكتور .  
الدكتور : قربنا ؟ وانا حاسس اننا بنبعد . الظاهر على قد ما بنقرب  
بنبعد .

م . الأول : قربنا إيه وبعدهنا إيه ؟ وإيه الحكمة اللي نازلة ترف عليكم دى ؟  
انت يا بابا لا مؤاخذة بتخرف بتقول إيه ؟ إيه اللي ولادى وانا  
مالكهم موش ابوهم ؟ إيه اللي أبشع أنواع الأنانية قال  
ويسموها أبوة ؟ احنا فين ؟ فى جلسة تحضير ملايكة  
وأرواح ؟ تكونوش نسيتموا اننا بنى آدم ؟ تكونوا نسيتموا احنا  
مين وعاشين فين ؟ احنا هنا يا ناس على الأرض مخلوقين من  
طين وعاشين على التراب ، وبنأكل ونشرب ونكرع .  
الكلام اللي بتقولوه ده ينفع لكتب الإنشا والتربية والأخلاق ،  
إنما علشان البنى آدمين يعيشوا به ، يفتح الله !

صفر : مين أذن لك تكلم يا أحمينا ؟  
م . الأول : أذن لى الكلام الفارغ اللي قاعدين تقولوه .. ما اقدرش اسمعه  
واسكت .

صفر : ما اقدرش لما ييجى دورك أكلم ، ودورك جاى حالا ، انت  
المتهم الثالث .

م . الأول : متهم ثالث أو محكوم عليه انا يهمنى ؟ المهم انى أرد لكم  
عقلكم .. انى أفوقكم من الدوشة اللي سايحين فيها دى .  
صفر : قلنا ممنوع الكلام من غير إذن . امنعه يا دكتور من الكلام .  
الدكتور : من فضلك ، احترم النظام واسكت .

م . الأول : ما انا ساكت بقالى سنين وساييكم تتكلموا . كفايا كم بقى ،

سيبوني بقا اقول اللي فى نفسى .

صفر : امنعه بالقوة يا دكتور . لازم النظام يحترم .

الدكتور : ( ملوحا بالمسدس ) قلنا تسكت يعنى تسكت .

م . الأول : اضرب ، يا ريتك تضرب وتريجنى . انا مستبيع .. الجدع

ياخذ أجلى .

الدكتور : خلاص ، نسيبه بقى يتكلم .

صفر : انت عايز متهم زى ده يفرض على المحكمة إرادته ؟ ده

مستحيل .

الدكتور : أنا رأيى نسيبه يتكلم .

صفر : رأيك ؟ هو حد هنا له رأى غيرى ؟

الدكتور : وله يا صفر ، انت حا تعمل على انا إكان محكمة ؟

صفر : عليك وعلى اللي أتخن منك . كل واحد يحترم نفسه ويعرف

مركزه كويس .

الدكتور : ده انا اللي معينك يا واد .

صفر : انت رشحتنى ، وما دام كلهم وافقوا يبقى انا هنا باسم

الأغلبية .. باسم الشعب .. أنا السلطة العليا . وانا معايا الحق

ورزقى على الله .

الدكتور : ولا تسأل فيه يا أول . اتكلم .

صفر : بتمرد على هيئة المحكمة ؟ اعتبر نفسك مرفود . اما انت

يا أول فإذا أصريت على الكلام غصب عن المحكمة ، فانت

حر . اكلم انما كلامك حا يعتبر خارج الرول ، كأنه ما حصلش .

م . الأول : وانا يهنى ؟ أنا حا اكلم ولو حتى ما حدش سمعنى خالص . أنا بقالى سنين عمال بالاطف واسايس وافوت واجى على نفسى واقول بكره يفهمونى ، لا حد فهمنى ولا حد عذرنى ، بالعكس لاقى نفسى المتهم فى نظر الكل . الجانى اللى فاتح ضبه فى المعارضة فى الأرض . من غير ما تقولوا أنا عارف انها فى الآخر حا ترسى انى ابقى المجرم والمسئول . انتو عايزين تقولوا إيه ؟ بتتهمنى بإيه يا تانى ؟

م . الثانى : هى تهمة ؟ دى حقيقة . طمعت فى أرض وخذتها وجاى بكل ندالة تدخل اخوك المستشفى علشان تنهب أرضه ؟

م . الأول : إيه رأيك بقى انى معترف ان ده حصل .. معترف انى استغللت فرصة عياك وخذت أرضك ، وانى جايب الثالث النهارده علشان اغدر به وآخذ أرضه .. استريح دلوقت ؟

م . الثانى : أيوه كده اظهر وبان على حقيقتك . اظهر وبان ، أمال ساكت من الصبح ليه ؟ وقاعد عمال تلاوع وتكذب وتكابر وتنكر .

م . الأول : علشان من غير ألم تفوت .. قاعد ادى فى حقن بنج علشان تمر . إنما خلاص بقى ، خليها بألمها وقرفها ، خليها بعلبها ، خلى كل المستخبي بيان . كنت عايز اخدره قبل ما اعمل له العملية . عارف انها مؤلمة وبايخه وسخيفة ، إنما لازم اعملها .

وعلشان كده ، علشان باحبه ، علشان موش عايزه يتألم لأنه  
من طينة غير طينتنا .. طينة ما تخلقتش للألم ، قلت ادخله  
المستشفى وآخذ منه الأرض من غير ما يحس .

م . الثاني : أنا موش مصدق ودانى ولا عنيه . ده لازم الدنيا جرى لها والا  
حا يجرى لها حالا حاجة . بقى عشت لليوم اللي اشوف فيه  
محمد الأول بلسانه بيعترف على نفسه يا ناس ! معقول ؟ ده انا  
من كتر ما كان يبسبك كلامه ويبرر تصرفاته ، كنت فى  
مرات باشك فى نفسى واقول يمكن انت يا واد الغلطان ، ما  
يمكن انت ظالمه . أقسم بالله معجزة . والله حاجة تهوس . انا  
لازم أكيد باحلم .

م . الأول : أبدا ، لا بتحلم ولا بتفقر . انت صاحى ، ونا صاحى ، وكلنا  
صاحيين . أيوه يا تانى ويا تالت ، أيوه يا بابا ويا جد .. أنا  
باعترف اهه انى لجأت لأخس الطرق علشان آخذ بيها أرض  
اخواتى .. كانوا يقدرُوا ما يحوجونيش لللف والدوران  
والخداع ده كله ومن نفسهم يدوها لى . إنما هم رخرين من  
الناس اللي فاكرين ان الأرض للشخص المكتوبة باسمه . أنا  
الأرض عندى لى محتاجها ، وأنا كنت ولا أزال محتاجها . ده  
موش بس ادخله المستشفى ، ده انا مستعد اسجنه ، أسلط  
عليه ، أعمل ما لا يعمل علشان أوصل لغرضى . ما حد  
يسألنى انا باعمل كده ليه ؟ أنا لا مجرم ولا نصاب ولا زى  
جدى غاوى فلوس . أنا بس بافترض فرض بسيط قوى ..



بافتراض انى بكره صحيح جات لى ذبحة زى اللى جات  
للمرحوم ابويا الطيب ده ومت ، أنا مراتى ست بيت عادية  
زى أى بيت ، ما تعرفش تشتغل حاجة ابدا ، واولادى أكبر  
ما فيهم عنده تسع سنين ، فيعملوا إيه ؟ يعملوا إيه فى الدنيا اللى  
احنا عايشين فيها دى موش اللى بتكلموا عليها ؟ لا ، الدنيا  
الحقيقة اللى ما لوش بيت فيها بينام على الرصيف .. واللى ما  
معهمش تعريفة ما يقدرش يشتري رغيف .. يعملوا إيه إلا انهم  
ينزلوا الشارع ؟ عارفين الغول اللى بياكل الشرف والكرامة  
والأعراض والأرواح ؟ عارفين الشارع اللى القانون فيه هو  
الذراع والذراع ماسك سكين والوحوش فيه بيسموها بنى  
آدمين ؟ ولادى ومراتى يعملوا إيه فيه ؟ حتى لو عازوا  
يشحتوا الشحاتين نفسهم ح يهدلوهم . وما دام الحرب حا  
تحصل حا تحصل ، فيبقى بدل ما يحاربوا هم بعدى وهم ضعفا  
وعاجزين ، أحارب لهم أنا وانا عايش . وما دام حا اسرق ح  
اسرق فمين أولى من اخواتى انى اسرق منهم ؟ وما دام حا  
انصب ح انصب فمين أولى من اخواتى انى أنصب عليهم ؟

م . الثانى : ويرضى راجل طويل عريض زيك يأكل مراته وعماله مال  
حرام جايبه بطرق خسيصة ؟

م . الأول : ما هو يا كده يا يموتوا من الجوع .. يموتوا ؟

م . الثانى : أنا عندى الموت من الجوع ألف مرة أحسن .

م . الأول : لو مخلف ما تقولش كده أبدا . لو تصحى من النوم تلاقى

قدامك خمس عيال والا حتى عيل واحد صغير ، ومسكين ،  
ويا دوبك بيعرف ينطق الكلمة وتما شهبك ، وطالع من عينيه  
حاجات تكهرب حاجات جواك .. لو تصحى وتشوفه  
وتتصور ازای ممکن يجوع بعدك وما يلقاش غطا ولا هدموم  
ويعيا ويكح ويموت وما يلقاش دوا ، فساعتها موش تهون  
عليك نفسك ، يهون عليك انك تعمل بنفسك دى أى حاجة  
علشان ما يحصلوش كده . أنا موش كنت ابوكم .. أنا كنت  
حيا الله اخوكم . وانتو ما كنتوش صغيرين والاجعائين ، كنتوا  
كبار وعائزين فلوس موش تاكلوا بيها ، إنما تتعلموا بيها ، ومع  
كده كنت مستعد انقلب مجرم ونصاب علشان أعيشكم  
وأكمل لكم تعليمكم .. دلوقت آدى انتم شايفنى فعلا إتقلبت  
نصاب ومجرم ، وعلى مين ؟ عليكم انتم يا أغلى الناس عندى .  
موش لحسابى والله ، لحساب الصغيرين دول . لحسابكم انتم  
لما كنتم صغيرين ، لحساب أى صغيرين . واحنا قدهم خيلنا  
أبونا باع الامتحانات ، وهم دلوقت مخلينى أجراخويا حبيبي  
علشان اغدر بيه ، وكل ده من غير ما ينطقوا ويقولوا عائزين .  
لو بس يعرفوا ينطقوا ويقولوا عائزين . نروح منهم فين ؟  
م . الثاني : يا أخى طيب اتعظ شوية . ده حتى لو عذرناك ما انتاش شايف  
ان الطريقة دى ما بتضمنش مستقبل حد ، ما ابوك جه يضمن  
مستقبلنا بطريقتك دى ضيعه . ده يكفيك تاريخ عيلتنا علشان  
يوريك ان المصايب ما بتحصلش إلا لما الأب اللي زيك بيحاول

يحافظ على ولاده ويجمع لهم أرض والافلوس . اتعظ يا أخي  
من اللي انت شايفه .

صفر : اعذره ، يمكن راخر ما فهمش .

م . الأول : بالعكس ، أنا شايف وفاهم كويس . واكثر من كده متأكد

انه كلام صحيح .. مضبوط . احنا ما ضيعناش الا كده .

وعارف ان لما حاسيب لاولادى الأرض حا يحصل لهم تقريبا

نفس اللي حصل لنا . إنما ما اقدرش اسكت أو أراجع عن اللي

بتعمله .

صفر : أما غريبة ! بقى تبقى عارف ان اللي بتعمله غلط وبرضه

تعمله ؟

م . الأول : ما هو ما دام مستحيل أسيب ولادى للشارع .. ولازم اعمل

لهم حاجة حتى لو عارف انها غلط حا عملها . ده واجبي ،

ما يهمش نتيجه ايه ؟ إنما لازم اعمله .

صفر : طيب يا أخي ما تدور على حاجة صح تعملها .

م . الأول : منين الحاجة الصح دى ؟ دلنى عليها .

صفر : وإذا دليناك ، تعملها ؟

م . الأول : برضه ما عملهاش إلا إذا جربها ناس غيرى وعملوها ونجحت

معاهم . وموش بس غيرى ده لازم ناس قبلى ، لا بد يكون

أبويا عملها وصحت معاه . ما انا لازم اعمل حاجة ميه ميه

مضمونة ، ماذا وإلا أفضل اعمل اللي بتسموه غلط ده على  
طول ..

صفر : حد يا ابني يفضل يعمل الغلط مجرد ان الناس بتعمله ؟ مجرد ان

الصح ما حدش قبله جربه ؟ في شرع مين يحصل كده ؟

م . الأول : في شرع البنى آدمين .. البنى آدمين كده . الناس عارفه ان

السجاير مضره ومع كده بتشربها ليه ، لأنهم بيشفوا الناس

بتشربها . هات لى حاجة واحده الناس ما بتعملهاش لأنها في

حد ذاتها مضرة ، أى حاجة مضرة موش مضره الواحد

يفضل يعملها مهما اتقال عليها لغاية ما الناس تبطل تعملها

فيبطل يعملها . أنا عارف ان اللى باعمله غلط ، دلوقت

بالذات اتأكدت تمام إنه غلط ، متأكد ان الكام فدان اللى حا

اسيهم لأولادى حا يكرروا نفس المأساة ، وفي يوم لا بد

واحد فيهم حا يبقى مكتف التانى وعايز يزيحه من طريقه علشان

ياخد نايه . إنما صدقوني لما بقول لكم انى موش قادر امنع

نفسى ، موش قادر ابطل اللى باعمله . حا افضل ورا الثالث

لما بالرضا أو بالجريمة آخذ أرضه ، وحا افضل ورا العشر

فدادين لما ح اخليهم بأى طريقة عشرين . إذا كنتم عايزين

تحاكموني فحاكموني بقى على كده ، على عجزى ده ، على

البنى آدم اللى فيه واللى فى كل الناس ، اللى يبقى عارف الغلط

وموش قادر يمنع نفسه عن ارتكابه . أرجوكم أنا باكلم جد ،

حاكموني واحكموا على .. عاقبوني ، اعملوا أى حاجة أحس

بيها انى باكفر ، ان الألم اللى جواى اللى طابق على زورى

وخانقنى بيقل ويخف . أى حاجة أرجوكم .

صفر : احنا من الصبح اتفقنا ان ما فيش عقاب ، واحنا عند كلمتنا .

عقابك ان ما لكش عقاب .

م . الثالث : ده فى الحالات دى يبقى أشنع عقاب ، فإيه الجريمة اللى ارتكبتها

علشان يعاقب بالشكل ده ؟

م . الثانى : وانت كمان اللى بتقول كده ؟.. ده كفاية يا أخى اللى عامله

فيك النهارده .

الدكتور : يا صفر أنا معايا المسدس .

م . الثالث : بس هو فى حالتى انا بالذات ما خدعنيش ولا ضللتنى ولا عمل

حاجة من دى خالص .

م . الثانى : إزاي بقى الكلام ده ؟

م . الثالث : دا الحقيقة انا اللى خدعته وخليته انه ممكن يدخلنى المستشفى .

صفر : انت خدعته والا هو اللى خدعك ؟

م . الثالث : أنا ، أنا نفسى كنت عايز اروح المستشفى واستعملته

كوسيلة .

صفر : انت ؟

م . الثالث : أيوه انا .

صفر : طب وتعمل كده ليه ؟ حد يعمل كده ؟ على رأيك حد يجب

يخس مستشفى أمراض عقلية هنا ؟

م . الثالث : أنا ؟

صفر : ليه ، علشان إيه ؟..

م . الثالث : لأنى أنا الجانى الحقيقى . انتو موش بتدوروا على الجانى .. أنا الجانى .

صفر : جاني ، جنائتك إيه ؟ يا ترى انت راخر عملت إيه ؟ الظاهر  
ياما لسه حانشوف من ولاد قارون .

م . الثالث : أنا جنائتي كبيرة قوى ، شاملة ، بعدد كل حرف اتعلمته ، وكل  
قانون من قوانين الكون عرفته ، وكل سطر من كل كتاب  
اطلعت عليه .

صفر : إيه ده كله ، ليه ؟ انت عملت إيه ؟

م . الثالث : هربت . ساعة الجد هربت من دورى ومنكم .. فى وسط  
المعركة بدل ما اضرب فريت واستخبيت جوه نفسى .

صفر : بس لو ما كنتوش تستعملوا الكلام اللى ما يفهموش حدده ؟

وحتى إذا الناس فهمته عيال ما توصل لمعناه يكون المعنى طار .  
استخبيت جوه نفسى لما ذاتى حوصرت وانعزلت عن الذوات  
الأخرى . يا اولاد الذوات اللغوية انتو ، ما تقول لنا ببساطة  
يا أخى قضيتك ، على رايكو ، إيه ؟

م . الثالث : ما هى المصيبة ان ما لياش قضية حتى ولو خسرانه .. حتى

لو قضية باطل . أنا من غير . أنا جريمتى كبيرة قوى ،  
أنا العين اللى الحياة قعدت عشرة مليون سنة علشان  
تعملها ، فلما عملتها اختارت انها تغمض ، وإذا فتحت  
تدعى انها موش شايفه ، وإذا شافت تدعى انها موش  
عارفه ، وإذا عرفت تشكك فى اللى بتعرفه . أنا اللى حاطط  
الكلمة فوق الإنسان ، والقانون فوق الحياة ، والقيمة  
المثالى بمعنى انى عايز كل الناس تبقى مثلى . أنا اللى  
موش عاجبه حد والنتيجة انه مش عاجب حد .

أنا اللي من كتر لومى لنفسى أدمنت الغلط ، ومن كتر ما انا  
عايز اعمل حاجات ما باعملش حاجة خالص ، ومن شدة  
تصميمى عايش متردد .

صفر : أيوه ، بس إيه اللي حصل وخلاك تفر وتستخبي زى ما  
بتقول ؟

م . الثالث : الحريقة زادت .

صفر : حريقة إيه ؟

م . الثالث : اللي انا دخاتها .

صفر : برضه ما فهمتش .

م . الثالث : الحريقة بين الأرض الكبيرة والناس الصغار : بين الحاكم

والمحكوم والمحكومين والحكام . بين الظالمين لأنهم مظالم .

والخايفين من ناس خايفين . بين العلم والدجل . بين الحقيقة

والكذب . الكذب عيني عينك وفي شك وبالبنط

العريض ، ويا ويلك لو قلت تلت التلاته كام .

صفر : برضه وحياتك انت ما فهمت .

م . الثالث : المهزلة الأرضية ! كنت عايز ابقى المتفرج الوحيد على المهزلة

الأرضية بس اندججت قوى ، وولعت النار .. أنا مأساتي ..

صفر : مأساتك إيه بقى ؟ ما انت لسه مسميها مهزلة .

م . الثالث : ما هي مهزلة الناس ، إنما مأساتي انا .

صفر : إيه هي الحكاية اللي بوشين دى ؟

م . الثالث : حياتنا .

صفر : يبعجبنى والله لعبكم بالكلام ده . حريفة كلام بشكل !  
الواحد منكم ما يسبش المعنى إلا وهو ماسكة فى خانة اليك .  
تقدر تقول لى من غير حرفنة كده إيه اللى قومها فى دماغك  
وخلالك تعمل العملة دى ؟

م . الثالث : ما قدرتش اصمد . أعمل إيه ؟ لا قادر اعملها زى ما انا عايز  
ولا عارف اعيش فيها زى ما هى . لا انا البطل علشان اغيرها  
ولا انا أرضى انها تغيرنى .

صفر : والنبي تسهلها علينا وعلى نفسك يا شيخ .  
م . الثالث : أقول لكم إيه بس ؟ أقول لكم كنت عايش مغمض فتحت مرة  
وسألت لقيت طريق السؤال صعب . إنما فى نفس الوقت  
لقيتني موش عارف ارجع واغمض تانى ، لا انا عارف ارضى  
ضميرى ولا قادر اسكته وارشييه . ما عادلش مكان بينكم  
ومكاني الحقيقي على . عايز صفر . لا انا شجاع علشان  
اقدر انتحر ولا جبان علشان اقدر اعيش ، لا جرىء علشان  
اسأل ولا عبيط علشان ما اسألش ، فكل اللى قدرت اعمله  
انى اروح مع اللى ما يبسالوش . موش عن خوف أو جبن إنما  
عن مرض . مع المحرومين ، مع القدرة على العقل والسؤال ،  
أروح من غير شماتة .. لا انا شمتان فيكم ولا عايز كم تشمتوا  
فى . لا انا باعايركم بخيبتكم ولا انتم تعايرونى بقصر ديلى .  
ليكم حياتكم السعيدة المزعومة ، ولى دينى .

صفر : تعرفش تقول لى يعنى باختصار كده وانت محيرنا كلنا ؟ حتى



الدكتور الغلبان محيره معاك . انت عاقل والا مجنون ؟

م . الثالث : بعد كل ده ما عرفتش ؟

صفر : يمين بالله ما عرفت .

م . الثالث : يبقى بقى تقدر تسميني العاقل جدا إلى درجة ان الناس فاهمه

انه مجنون ، أو المجنون جدا إلى درجة انه فاهم انه عاقل .

صفر : سلمت لك مارس خشب الله وكيل . أعمل إيه بقى ؟ أصل

الخيبة القوية ان المحكمة موش متنوره .. قليلة الوعى لا

مؤاخذة . إنما المحكمة برضه حاسة ان كلامك يترد عليه .

يمين بالله لازم له رد . ما تشد حيلك يا سعادة البيه وتعمل

مثقف مرة وادى انت اهه لابس نضارة وترد عليه . قول له

والنبي كل الكلام اللى المحكمة عايزة تقوله وموش عارفه .

الدكتور : اشمعنى دلوقت سعادة البيه ؟ نسيت انك السلطه العليا واسم

الأغلبية والشعب .

صفر : معلهش ، أصل العتب على الكرسي . امسحها في دقن صفرك

الغلبان اللى ما لوش الاربنا وانت .

الدكتور : أصل عيبى انى طيب . والحقيقة عايز فعلا أرد واكلم . حاكم

أسهل حاجة عند الثوالت دول ان الواحد منهم يتهم نفسه ،

أسهل حاجة انه فى صمت وكبريا ينزل ويحتج حتى فى حياته

الخاصة .. يشوف اخوه عينى عينك بيتآمر عليه وعايز ياخذ

أرضه ، فبرضه فى صمت وكبرياء ينطوى ويحتج . بل أكثر من

كده يجارى أخوه فى كل اللى عايز يعمله ، لدرجة توصله انه يدعى انه مجنون علشان يسهل له المأمورية . احنا للأسف كل واحد فينا عبقرى فى الدفاع عن نفسه ولوم الآخرين ، هو العكس على طول الخط .

صفر : يعنى خلاص ؟ وصلت للحقيقة دلوقت و اتأكدت انه موش مجنون زى ما كنت عايز ؟

الدكتور : مين قال انى اتأكدت ؟ أنا كنت باتكلم عن شخصيته .. الشخصية اللى العلم رقى إحساسها لدرجة تقارب ضمير المتدينين المتصوفين والقديسين .. شخصية زى دى صعب عليها قوى انها تعيش فى مجتمع النجاح فيه للفهولة والحدافة والفتونة وشغل البرمجيه والعصابات . مين عارف جرى لها إيه ؟ مين عارف مدى التخريب اللى حصله ؟

م . الثانى : أنا عارف يا دكتور أنا عارف .. ده أعقل منا كلنا .. ده قبل ما يجنن يكون واحد زى اجنن ألف مرة .

صفر : طيب بقى انت بالمناسبة اجننت والالسه ؟

م . الثانى : والله اللى تشوفه .

صفر : أنا رأى انت لا اجننت ولا حاتجنن .. انت بس مهفوف .

م . الثانى : الله يسامحك .

صفر : دى موش شتيمة .

م . الثانى : وان كانت ، الله يسامحك برضه . أنا فى رأى الأول جبان ،

وفى رأى البوليس ما انفعش ، وفى رأىك مهفوف . الله

يسامحكم .

صفر : دا انت موش مهفوف وبس ، ده وعليك البشارة إنت المتهم  
الرابع كان . الفصل الرابع

م . الثاني : أنا ؟ متهم ؟ بايه لا قدر الله ؟

صفر : بليسته طويلة أولها قطع الخلف عند عدالة المحكمة ، وآخرها  
انك وقفت في طريق الشر عايز تمنعه .

م . الثاني : ومنع الشر تهمة ؟

صفر : دلوقت يا ابني بقت تهمة . الدنيا تطورت خالص وشهامتك

م . الثاني : دى بقت رجعية ؟ أخوك ده راضى واخوك ده راضى ، مالك

صفر : انت بقى وماهلم يا ابو الرعاش ؟

م . الثاني : آمال كنت عايزنى اسيبه يوديه المستشفى ؟

صفر : وماله حا يجرى إيه ؟

( ستار )

## الفصل الرابع

صفر : الحكم ، الحكم ، استنوا . لسه ما قلناش الحكم .

صفر : ما تبوظوش .

م . الثاني : أسيب واحد عالم زى ده يروح الخانكة بالتزوير ؟

صفر : موش أحسن ما يروحها بالأصول ؟

م . الثاني : ويروحها أصلا ليه ؟ هو عمل إيه علشان نمرطه كده ؟

صفر : عمل أخطر حاجة .. عايز يغير الدنيا .

م . الثاني : وده عمل خطر ؟

صفر : يوهوه ! خطر قوى . دا انا اسمع إن مرة زمان واحد حب

يعمل عملة زى عملته دى فحرقوه بالحيا . وواحد تاني

حدفوه من فوق مادنه .. احنا إيه ؟ لبسناه القميص ؟ ده

منتهى التحضر .. منتهى الإنسانية والمفهومية . الحمد لله أنا

عايش فى عصر القمصان موش فى عصر الخوازيق .

م . الثاني : وليه القمصان والخوازيق ؟ يعملوا فيهم كده ليه ؟ ما يسيبوا

الناس فى حالها .

صفر : علشان هم موش عايزين يسيبوا الناس فى حالها . عايزين

يغيروهم ، فالناس بيحرقوهم .

م . الثاني : يعنى كنت عايز اسيب الشر ياخذ مجراه ؟

صفر : طبعا تسيبه . وإذا كان أخوك حايثبت انه ( يلتفت للدكتور )

اسمه إيه ده يا دكتور ..؟

الدكتور : متنبى . نبى . صاحب رسالة .

صفر : حايان . وإذا كان لا متنبى ولا حاجة ، إذا كان زى ( ملتفتا

للدكتور ) زى اسمه إيه ده ؟

الدكتور : ( بعد فترة يرفض الدكتور فيها أن يجيب مباشرة معذبا

صفر ) مسيلمة الكذاب .

صفر : مسيلمة الكذاب برضه حايان . جيت انت خسرت الطبخة

يا ابو طحينه وشهامة وتلات فدادين وتلت .

م . الثانى :

انت بتتكلم جد .

صفر : أمال شايفنى ماسك جوزه وباتكلم ؟ الناس اللي زيك التوانى

المتوسطين دول هم اللي بيخسروا الدنيا . عاوزين كل حاجة

تمشى بالأصول .. أصول إيه ؟ أصولهم هم . على قد عقلهم

يعنى .. عقلهم الفارغ المقفول ، عقلهم اللي من أيام ما اتبنت

مصر ما اتغيرش . ما تقدروش انتم تشوفوا حاجة تانية غير اللي

انتم عايزين تشوفوه وواخدين عليه ، لا تبصوا لفرق قوى ولا

لتحت قوى . لا يمين قوى ولا شمال قوى . حتى لما بتشغلوا

مخكم وتتصوروا ما بتصوروش إلا حاجات زى اللي انتم

شايفينها فعلا . وإيه فايدته التصور بقى إذا كا ما حايوريناش

إلا اللي احنا شايفينه والا اللي قادرين نشوفه ؟ انتم عاملين كده

بصراحة زى الفرامل المزرجنة اللي لا توقف العربية ولا بتسيبها

تاخذ سرعتها .  
م . الثاني : أما حاجة تجنب صحيح ! ده انت باينك اتجننت .. انت  
اتجننت يا أخينا ؟

صفر : أدب .  
م . الثاني : أدب إيه ؟ يا أخى قول عقل .

صفر : العقل يعنى بتاع صنفكم ده .. ده اسمح لى قلة عقل بس  
للأسف هو اللى حظه ضارب وسايد . إنما وحياتك انت لافى  
يوم الدنيا هايجه عليكم ومطربقاها على نافوخكم يابتوع  
السايد انتم والعادى والصح واللى ما يصحش . الناس زهقت  
خلاص ما عادتش عايزة الأعقل بتاعكم . عايزه الأسرع ،  
الأنفع ، الأنجح ، إنما القوانين اللى انتم حاطينها لعقولنا دى  
كلبشت عقولنا وعقلت عقولنا ، مع ان اتخلق علشان يعمل  
كل الحاجات اللى بتبان لكم موش معقولة . الله ! — طيب  
ما براوه عليك يا واد يا صفر ما انت بتعرف تتكلم أهوه ..  
تعرف باكلم كويس ليه ؟ لأنى باتكلم بعقل موش خايف حد  
يتهمه بقلة العقل . سايب لا مؤاخذة عقلى هو اللى يتكلم موش  
معقول . والله الواحد لا يفضل يتكلم كده على طول — إنما  
انتم حاتتطربق على نافوخكم قريب إن شاء الله ، ولغاية ما  
يحصل كده خليك انت قاعد ترعش . تخطى خطوة كده  
لقدام وعلى بال ماتعقل زى ما بتقولوا وتفكر إن كانت معقولة  
والا لا ، يكون غيرك سبقك بعشرة . خليك كده لا انت

أرضى زى الأول ولا سماوى زى الثالث .. إنما قاعد تألق  
وتترعش بينهم . حاطط حكاية الحرامى قدامك زى خيال  
المآة للغلط قاعد تخوف به نفسك وتمنعها انك تتحرك أحسن  
تغلط ، والنتيجة انك غلبان غلب . أنا لو منك ما ابطلش  
عياط على نفسى .

م . الثاني : انت بتقول فيها ؟ طيب ما انا من غير ما اتفلسف زيك كده  
قاعد أعيط طول النهار على نفسى ( يتأثر إلى درجة البكاء  
الفعلى ) روح يا شيخ الله يجازيك .. أى والله صحيح ، دا انا  
غلبان غلب .

صفر : اللى بعده ( بلهجة الحاجب ) المتهم ( يتوقف فجأة ) الله ! دا  
ما عايش متهمين ( ثم ناظرا فجأة للعسكرى ) أمال انت  
إيه ؟

العسكرى : أنا العسكرى يا افندم بتاع الأمن .  
صفر : طيب ما تيجى اما نحاكمك بالمرة .

العسكرى : علشان إيه يا افندم ؟ أنا عملت حاجة ؟

صفر : بيتبها لى انك لازم عملت حاجة .. لازم متهم فى حاجة . باين  
عليك كده . أقطع دراعى يمكن لو قرصنا عليك شوية حا  
تعترف .

الدكتور : خلىنا فى الجد شوية يا صفر .

صفر : ما احنا من الصبح فى الجد ، جد علينا إيه ؟

الدكتور : يعنى يا سيد قارون المحاكمة انتهت ونونو ما ظهرتش .

- قارون : واحنا احتجنا لها في إيه علشان تظهر ؟
- الدكتور : إذا كان على الحاجة احنا محتاجين لها قوى قوى .
- قارون : في إيه ؟
- الدكتور : علشان تعرف الحقيقة فين ؟
- قارون : أمال كنا بنعمل محكمة ليه ، موش علشان نعرف ؟
- الدكتور : واحنا عرفنا ؟
- قارون : لازم المحكمة عرفت .
- صفر : عرفت إيه ؟
- قارون : الحقيقة .
- صفر : حقيقة إيه ؟
- قارون : مين المسئول ؟
- صفر : مسئول عن إيه ؟
- قارون : الله ؟ عن اللي احنا فيه ده .
- صفر : واحنا في إيه ؟
- قارون : في المأساة دي . مين المسئول عنها ؟
- صفر : إن شا الله انسخط قرد ما اعرف . ده جايز قوى كلهم مجنى عليهم .. وجايز قوى يكون كلهم جانيين .. وجايز لا كده ولا كده من أصله . جايز المظلوم هو الجاني والظالم هو المجنى عليه ، جايز أى حاجة ، جايز قوى انه يطلع في الآخر أنا المسئول .
- قارون : آدى جزاة اننا خيلناك قاضى . لو عملنا حد يفهم كان زمان



عرف .. إنما انت بس شاطر تقوللى القانون وعدالة المحكمة .

الدكتور : عرفت بقى اننا لسه عايزين نونو ؟

قارون : خلاص ، المحكمة تنادياها .

صفر : وعلى إيه بس ؟ هى حا تقدر تعمل أكثر من اللى عملناه .

قارون : من فضلك بقى سينا نشتغل . نادى عليها وانت ساكت .

صفر : حاضر ، احضرى يا ست نونو .

( انتظار . ولا يحدث شىء )

الدكتور : قلنا دى مستحيل تظهر .. دى تبقى معجزة . دى حا توصلنا

للحقيقة ، ومين الصادق ومين الكذاب .. معقول ده كله

يحصل قدام عيننا ؟

قارون : لا ، إزاي ؟.. دى لازم تظهر . أمرنا الله ، نلجأ للسلاح

الأخير بقى . أنا دى على أنا ( يكتسى وجهه طابعا جادا

خطيرا ) باسم موتى باب الوزير والإمام الشافعى والغفير ،

احضرى يا نونو .

الدكتور : ما فيش فائدة بقولك .

قارون : يبقى لازم فيه غلط فى حاجة . حد فينا كذب أو محبى حاجة .

لو كان كده عمرها ما حا تظهر ( يفتشون فى وجوه بعضهم

بعض ) يا اخوانا بلاش إحراج ، اللى غلطان فى حاجة يطلع

بيها .

صفر : ( يتحنح ) العوض على الله بقى . لا مؤاخذة يا جماعة .. لا

مؤاخذة يا سعادة البية .. الظاهر ان أنا اللى عملت العملية .

العوض على الله بقى الأستاذ محمد الأول ده غمزنى بربع جنيه  
قبل ما يخش علشان أسهل له المأمورية . خد يا سيدى فلوسك  
دى باينها حقيقى فلوس حرام ، من بتوع جدك .

الدكتور : ما دام اعترفت ببقى سماح .

صفر : وإيه الفائدة وأنا غلبان وصاحب كوم ؟

قارون : معلش ، تتعوض ، يا مالسه جايلك مجانيين .. نادى عليها

بقى .

صفر : الأمر لله من قبل ومن بعد . يا ست نونو ، يا ست نونو ( وهو

يكاد يكي ومع صوت عريض أجوف . وبين دهشة

الحاضرين وذهولهم تدخل نونو . نفس نونو الأولى مع

مسحة من النقاء والبراءة مضافا عليها . ما إن يراها الدكتور

حتى يلف حول نفسه فيأدر محمد الأول والثاني لإسناده قبل

السقوط ، بينما ينتفض صفر فى مكانه العالى واقفا لكنه لا

يلبث أن يعود للجلوس حين يجد الدكتور لا يستلم إلا

للحظة . وسرعان ما يتخلص من الأول ويندفع ناحيتها ) .

القضية . استنوا . اسمعوا الحكم . الحكم . محكمة .

اربعة ثلاثة اثنين واحد قدامى يا عسكري .

الدكتور : أرجوكم .. أنا لازم أتأكد منها . ( يقترب منها متفحصا

لدرجة أن يمد يده أكثر من مرة ليتأكد أنها حية وموجودة )

خايف أسألك تقولى لا ، أظب ميت على طول .

قارون : اسأل يا دكتور ما تخافش ؟

قارون : انتى .. نونو ..؟  
نونو : أيوه يا دكتور :  
الدكتور : يا سلام . ( يتمطى ويشاءب وشعور بأعظم سعادة يشع منه . ولكنه ينتفض فجأة منزعجا ) بس اوعى تقولى انك ما كنتيش هنا .  
نونو : إزاي ما كنتش هنا ؟ كنت هنا يا دكتور . وبالأمارة كنت حضرتك بتسألنى أنا مرات مين فيهم .  
الدكتور : يا سيدة زينب . يا سانت تريز . أنا ما عنتش عايز حاجة من الدنيا خالص . دا ولا مين يعملها . طيب ما تجرب كده وحياتك ، آه ، تجرب يعنى . وتجيب لى الدرجة الرابعة أصلها عاملة معايا زى نونو تمام .  
قارون : انت نسيت والا إيه يا دكتور ؟ ما تسألها . انت موش عايز تعرف منها الحقيقة .  
الدكتور : مين قال كده ؟  
قارون : الله ! أمال كنت قاعد تعمل ده كله علشانها ليه .. وخليتنا نلجأ للسلاح الأخير ونستعين بالسر البائع بتاع الميتين كلهم علشان إيه ؟ موش علشان تعرف منها الحقيقة .؟  
الدكتور : أبدا أبدا . أنا كنت حا اموت على إانى أشوفها لمسألة لا تتعلق بالحقيقة أو بعيلة قارون خالص .. مسألة تتعلق بى شخصيا . لو ما ظهرتش كنت حا افضل السنين اللي انا عايشها شاكك فى عقلى .. دلوقت أنا اتأكدت .. أنا عاقل . ( ثم بلهجة

لا عقل فيها ) فاهم يعنى إيه ؟ فاهمين ؟ أيوه . أنا .. أنا

الدكتور حكيم .. عاقل . ثبت انى أنا العاقل وإنكو كلكو

مجانين . نونو أهى يا صفر .. نونو أهى يا عسكرى . يا أول

وتانى وثالث نونو اللى قلتو ما شفتوهاش أهه ، اقتنعم بقى

دلوقت انكم كلكم مجانين ؟

صفر : ارمى . أهو المرة دى مخه بيطلق بجد .

قارون : ما تسألها يا دكتور .. اسألها على الأقل كانت مختفية فين ؟

نونو : مختفية إيه ؟ أنا اختفيت ؟ أنا طول النهار قاعدة فى الصالة بره ،

مستنية جوزى .

الدكتور : جوزك ! ( ثم بشغف غير عادى ) جوزك مين ؟ . ( ثم

مستدر كما بصرخة ) واللا بلاش . اوعى وحياتك تجاوبى .

موش عايز اعرف بالمره . كفاية انك ظهرتى ( بلهجة هائلة

حالة ) كفاية انها ظهرت .

قارون : طيب على الأقل اعرف هى إيه ؟ هى مين ؟

الدكتور : ( كالمنوم مغناطيسيا ) أيوه صحيح ، انت مين ؟

نونو : أنا ؟

الدكتور : أيوه .

نونو : عايز تعرف انا مين ؟

الدكتور : أيوه .

قارون : ده موش هو بس ، دا احنا كلنا عايزين نعرف انت مين ؟

نونو : ( للدكتور بدلال ) عايز تعرف انا مين صحيح ؟

- الدكتور : بجد صحيح .
- نونو : طيب قول لي انت مين الأول وانا اقول لك انا مين .
- الدكتور : أنا .. أنا الدكتور . موش عارفه والا إيه ؟
- نونو : الدكتور ! ( ترفض بأصوات من شفتيها ) ده برواز ده ، ده مجرد برواز ، دى شغلتك . إنما انا عايزه اعرف اللي جوه البرواز إيه ؟ انت الحقيقي مين ؟
- الدكتور : جوه البرواز .. أنا راجل عندى شهادة ومجوز ومخلف ثلاث ولاد وجانى من سنة بنت رابعة .
- نونو : ( رافضة بشفتيها ) برضه برواز .. أنا عايزه اعرف انه من جوه جوه إيه ؟ انت إيه من غير البراويز دى كلها ؟
- الدكتور : من غير براويز .. أما حاجة تحير صحيح .. سنى ٤٥ سنة .. إيه رأيك ؟
- نونو : برضه برواز .. أنا عايزه اعرف انت إيه .. إيه الصورة اللي جوه البراويز دى كلها ؟
- الدكتور : الله ! أما حاجة تجنن . الله ! دانا باين شوية براويز جوه بعض . أنا صحيح مين من غير براويز . أنا مين ؟
- نونو : أهو أنا الصورة اللي من غير برواز خالص . أنا الصورة اللي كل واحد يقدر يحط لها البرواز اللي عايزه .
- الدكتور : صورة إيه ، صورة مين ؟
- نونو : صورة حاجات سهلة قوى تخيلها صعب قوى تلقاها وتلمسها . صورة معانى عايشين طول عمر كم تتكلموا عنها ؟

كأنها موجودة . زى العدالة كأنها ممكنة زى السعادة كأنها حقيقية ، زى الحق كأنه باين . صورة بكره اللي بتستنوه كأنه تمام غير النهارده ، وييجى بكره زى النهارده تقولوا بكره .

صورة أحلام كثيرة بتخلوها واقع وتبنوا عليه الحياة مع انه موش موجود ولا حتى فى الأحلام .. صورة الأم أم ، والحبيبة حبيبة موش مريضة بالحب ، والإخلاص حقيقى إخلاص .

صورة ابتسامة مية المية طالعة من قلب كله بيتسم .. صورة الصديق نرد بيه حتى على الكذابين . صورة انتصار خير على

شر ، عمر حد شاف بعينه خير حقيقى بيتنصر على شر ؟ صورة أمل كل الأدلة ضده وكل اللي حوالينا بينفيه ، وشيء

غامض زى ، شيء ما لهش أبدا ضمان ما تعرفش امتى بيحضر وامتى بيغيب ، مالكش أى سيطرة عليه ، هو الوحيد اللي

بيأكد ويقول : أيوه الأمل موجود .. صورة فيها كل اللي موش موجود فى حياتكم . إنما علشان تعيشوا لازم يكون موجود .

عرفت بأه أنا مين ؟

الدكتور : الكلام زى نونو كل لما الواحد يفكر فيه بقوة ، فلسه برضه ما

عرفتش بالضبط انت مين . انت مين ؟ ( صوت حنيفة من

الخلف ) أنا حنيفة يا حكيم . ( ملتفتا بدعر ) حنيفة .

الحقونى ، دول ظهر واتانى .

حنيفة : ويلحقوك ليه ؟ ما تخافش . أنا مراتك باقول لك . أنا افكرت

دلوقت احنا كنا بتتكلم فى إيه ؟ افكرت علشان تصدق بس

انی مرآتک . علشان ما تتجننش یا حبیبی .

الدكتور : افتكرنى صحيح ؟

حنيفة : أى واعدم شبابى صحيح افكرت .

الدكتور : شبابك ؟ طيب كنا بنتكلم فى إيه .

حنيفة : ده موضوع مهم جدا انا باستغرب نسيتته ازاي ؟ ده أهم

موضوع .. ده انا حافضل اكلمك فيه لغاية ما تشوف لك

طريقة .

الدكتور : فقعتى مرارتى بقى . إيه هو الموضوع اللى كلمتيني عليه ؟

حنيفة : موضوع صهيتك اللى موش فاهماها .

الدكتور : صهيتى عن إيه ؟

حنيفة : عن اننا نعمل حاجة للولاد .

الدكتور : نعمل إيه لإيه ؟

حنيفة : باقول نعمل حاجة للولاد . انت عارف ، ما حدش ضامن

عمره . والكل حاشاوروا عليهم بعد عمر طويل وهم

متبهدين ويقولوا أهم دول يا عينى ولاد حكيم .. وشرف بابا

اشرب ساعتها صبغة يود على طول .. واعمل حسابك احنا

يا مولاي كما خلقتنى ما لناش غير ماهيتنا وبنصرفها على دابر

المليم ( المليم )

الدكتور : جميل يا حنيفة . آمال حانعمل لهم إيه بقى ؟

حنيفة : أنا ما ليش دعوة ، ده شغلك وانت حر فيه . إنما لازم اضمن

مستقبل ولادى .

الدكتور : ( يبدأ يتحرك في الحجرة وكأنه يفتش عن شيء ) فعلا ،  
بالضبط كده لازم نضمن مستقبلهم .

حنيفة : أيوه لازم يعيشوا كويس علشان يجوا بعض .. الفقر يموت  
الحب يا حكيم .

الدكتور : فعلا ، فعلا يا حنيفة ، علشان يجوا بعض . فين القميص  
يا صفر ؟

صفر : أهوه يا سعادة البيه . مع العسكري أهو . عايزه ليه إن شاء  
الله ؟

حنيفة : أنا قلت لك وانت حر ( وتخرج ) .

الدكتور : ( وقد تناول القميص من العسكري وراح يرتديه بمنتهى  
الهدوء ) أنا حر . فعلا أنا حر . أنا حر . إني حر . انا  
حا ضمن مستقبل قلت لك حر للأولاد . حنيفة الأولاد  
ما حدش ضامن قلبهم على بعض .

صفر : إيه اللي عملته ده يا سعادة البيه ؟

الدكتور : عملت إيه ؟ يا ضمن مستقبلهم ، حا اضمنه قوى يا صفر .  
اربط لي القميص وجمد قوى علشان نضمنه خالص .

الدكتور : اربط وقرط يا صفر . لازم الضمان يكون جامد . ضمان  
حنيفة ومستقبل نونو . النجدة يا حننونو .. أبجد هوز حطى  
كلمن خمسة .

صفر : يا سعادة البيه أنا ما ليش دعوة ، أنا صاحب كوم .



## مؤلفات الدكتور يوسف إدريس :

### ( أ ) مجموعات قصص قصيرة :

- ١ — أرخص ليالى .
- ٢ — جمهورية فرحات وقصة حب .
- ٣ — أليس كذلك .
- ٤ — قاع المدينة .
- ٥ — البطل .
- ٦ — حادثة شرف .
- ٧ — آخر الدنيا .
- ٨ — لغة الآي آي .
- ٩ — النداهة .
- ١٠ — بيت من لحم .
- ١١ — أنا سلطان قانون الوجود .

### ( ب ) المسرحيات :

- ١٢ — ملك القطن وجمهورية فرحات .
- ١٣ — اللحظة الحرجة .
- ١٤ — الفرافير .
- ١٥ — المهزلة الأرضية .
- ١٦ — المخططين .
- ١٧ — الجنس الثالث .
- ١٨ — نحو مسرح عربى .
- ١٩ — البهلوان .

### ( ج ) روايات :

- ٢٠ — الحرام .
- ٢١ — العيب .
- ٢٢ — رجال وثيران .
- ٢٣ — العسكرى الأسود .
- ٢٤ — البيضاء .
- ٢٥ — بصراحة غير مطلقة .
- ٢٦ — اكتشاف قارة .
- ٢٧ — الإرادة .
- ٢٨ — مفكرة د . يوسف إدريس ( جزء أول )
- ٢٩ — مفكرة د . يوسف إدريس ( جزء ثان )
- ٣٠ — جبرتي الستينات .

مكتبة مصر  
٣ شارع كامل صدقي - البجالة

الثلثون ٢٠٠ قرش

دار مصر للطباعة  
سميد جودة السحار وشركاه